

# \* رادوبي \*

سامى خرك



# رادوبي

سندريلا ف الأصل مصرية

طبعة ثانية 2024

سامي حرك

اسم الرواية: رادوبي (سندريلا ف الأصل المصرية)

المؤلف: سامي حرك - كاتب مصريات

التنسيق: صفا حرك

الناشر: حقوق النشر محفوظة للمؤلف

samy.harak.9@facebook.com

whatsapp:01286175455

رقم الإيداع: 2019 /26817

I.S.B.N.2-11-6782-977-978

التيمة الدرامية للرواية وأبطالها ووقائعها من زمن الألف الثالثة (2343: 2283) قبل الميلاد، فترة حكم الملك بيبي الأول من الأسرة 6، لها مصادر أسرية (أثرية) مصرية، منها بردية انكتبت زمن الأسرة 12، التي معروفة دلوقتي باسم بردية شستر بيتي، لسه محفوظة ف المتحف البريطاني.



عن حكاية شاب قوسي حب واتجوز أميرة من العاصمة مناف، خلفو بنت سموها رادوبي، أما كبرت خطف النسر فردة جذمتها ورمها ف قصر أمير، وبعد التدوير بيعرفو ان رادوبي بنت خالة الأمير، وأما بيتقابلو يبحو بعض وبيتجوزوا!

الرواية دي مكتوبة بالحرف النبطي الديموطيقي، باللغة المصرية الحالية، سنة 6261 مصري/ 2019 ميلادي/ 1735 قبطي/ 1441 هجري - بأقرب لغة لكلام المصري القديم في زمن الدولة القديمة/ الأسرة 6، ورغم إن التيمة الدرامية معروفة ومشهورة

بإسم "سندريللا"، وإنكتب عنها كثير، إنما عرضها هنا فرصة  
عشان نتعرف عالحياة ف مصر القديمة، مكانة البنات والستات،  
معاملة وحقوق الصنایعية والشغيلة، قيمة العمل والإنتاج، مكانة  
الفن والفنانين، معاني أسامي الأشخاص والبلاد، شكل البيوت  
والشوارع والوظائف، الهدوم والفلوس، المحاصيل والمكايل  
والأدوية، الأكل والشرب والحلويات، دا غير شرح لشوية  
عادات وأعياد!

ممکن اللي بيقرأ يلاقي الكلام مكتوب بطريقة مختلفة عن اللي  
متعودين عليها ف الكتابة بالحرف النبطي (العربي)، ويفتكر إنه غلط  
ف الإملا، إنما الرواية مكتوبة حسب قواعد اللغة المصري، وملتزمة  
-بس- بقواعد كتابة اللغة المصري.

## خارجة



- سلامات يا سنفر، البقية ف حياتك يا ابني، لسانا جاين من خارجة أختك، كئا ف الجبانة يا حبة عيني، دفنا ستوتة، شد حيلك يا قلبي!
- شتاات، شتاات، روحتي يا بتي مع الأموات، شتاات شتاات شتاات، نور العمر عدا وفات!
- مسكينة ستوتة، كانت عيانة أوي، انتا عارف طبعن بعيها بقالها كثير وياما جبت لها أعشاب تداويها!
- يا دوبك انتا سافرت من هنا، وسرخت م الوجع، جبنا لها حكيم واثنين!
- عشرين يا كبدي بتعاني وبتتألم، سخنة نار، غلبنا معاها بكل اللي نقدر عليه، كمادات ولبوسات ومراهم ولبخات، من شورة مجرب لوصفة طبيب!
- ليلة موتها جتني ف المنام ست الدار "نبية-حوة"، قالت لي فكري بتك بالإعترافات، حفضيها الأذكار والصلا، خلاص

سهم القدر نفذ، مكانها محفوظ عندنا ف جنة العلاي مع  
الأرواح الطاهرة، الكاكات والنطرات!  
- البلد كلها حضرت خارجتها!

سنفر دموعه سائلة، بينهنه وماسك طرف جلاية أمه ومش قادر  
يطلع أي كلام، صعبان عليه أمه اللي كانت كأنها بتكلم نفسها،  
من الحزن والألم، وبجرد ما هدي طبطب عليها بإيده يواسيها:

- البقية ف حياتك يا أمه، أنا موش قادر أسدج إنها خرجت  
وموش راجعة!

- ربنا يرحمها، وييشبش الطوبة اللي تحت راسها، كانت  
أطيب إخوانها!

- معقولة يا ستوتة يا بتي؟ رضاعة ووكل وشرب ونضافة  
وذواق ولعب وتربية وعلام وشغل ودحك وجواز وخلفة،  
أيام وشهور وسنين، كل ده يخرج وميجيش، يطلع  
وميرجعش تاني؟

- شوفت خارجة ستي وخارجة أماتي، وكنت مستنياكو  
تحضرو خارجتي، أقوم أنا اللي أحضر خارجة بتي؟

- شقا عمري راح هدر؟ حبيتي يا بتي!

- شتاات شتاات شتاات، روحي يا بتي مع الأموات،  
شتاات شتاات شتاات، نور العمر عدا وفات!

سنفر قرب من أمه وسند بإيديه علا كفافها:

- افتكري "وزير" و"تحتي"، افتكري "است" و"حوة"، أكيد هيه معاهم ف نعيم الراحة وسعادة الأمان!
- اتصبري يأمه، أكيد ستوتة أختي مع الأبرار!

حصة مسحت دموعها من فوق الكولة الكبيرة اللي مغطية صدرها، وقالت لابنها:

- الظاهر إن الطيب ملوش نصيب ف الدنيا دي، ياريت يكون نصيبها أحسن هناك ف جنة العلالى وغيطان اليارو!
- طيب عأقوم أنا أروح الجبانة، عشان أطل علا توربتها، وأروي شجرتها!
- روح يا ابني، وخذ معاك فرعة الصفصافة الخضرا دي كمان إزرعها جحب توربتها، عشان تعيش مع وزير، روحها عتطل علينا من ورقتها!
- حسرة عيني عليكى يا ستوتة يا ضي العين!
- شتات شتات شتات، روحتي يا بتي مع الأموات، شتات شتات شتات، نور العمر عدا وفات!

الأب "عظفي" قاعد ف فسحة الدار، شايف دخلة البيت وطال عالأوضتين اللي بينهم سلم خشب بيطلع لأوضة الخزين، ساند



عالحطة كأنه حطة من نفس طينها النى، مجممز قابض بإيديه  
الإثنين علا نبوت من فرعة شجرة جميز، عينية حمرا وخطوط وشه  
بالطول والعرض مليانة كراميش، بقت مجاري لسيول نحتها الزمن  
بعلامات السنين، من دموع عينية!

عطفي بص ناحية مراته، كلمها وإيده ساندده سدره، يحاول يوقف  
نوبة الكحة الخشنة:

- اتصبري يا حصة، استهدي يا حصة!
- قومي إتصبري معايا بقراية وردين صلا وذكر ل وزير!
- اصبري يا حصة، دا الصبر اتخلق للولاياء، جيل ورا جيل!
- اصبري يا حصة، يا اسم علا مسما، بقرة عفية ياخذو من  
وراها زغاليل!

عطفي بينهنه بصوت مكتوم، وبيشاور بإيده ناحية سنفر:

- اسمع كلام أماتك يا سنفر يا ولدي، روح إزرع ل روح  
أختك شجرة، عشان يقف عليها الطير!
- وزير الشجرة، يخاوي طيور الأرواح!

سنفر أمن علا كلام أبوه:

- مادام شجرة وزير حية، يبقا كل روح طيبة حية!

- إُدْعِهَا يَا أَبَهْ إُدْعِهَا!

حصّة لفتت وشها ناحية جوزها وقالت له:

- أمانة عليك يا عطفي تخلي الحضرة الجاية كلها عشان روح  
الغالية ستوتة!

- اخدمني يا راجل، إعملها عشان بتك، أنا ياما خدمتك  
وخدمت الحضرة، مخلتش من جهدي جهد، كل اللي  
قدرت عليه عملته، نضافة ووكل وشرب وبخور، ياللا يا  
عطفي قوم، يا إسم تاج العز منور راس وزير الكون!

سيل دموع انسكب، بلل هدوم عطفي:

- ياريت شجرتي انقطعت قبل شجرتها، ياريت شجرتي انقطعت  
قبل شجرتها!

سنفر حب يغير جو الحزن، اللي مالي الدار، طلب من أبوه  
يعمرها بحضرة زار:

- أنا جايب للحضرة حزمة ورق كركيه أصواني!

- يا سنفر يا إبني إحنا معندناش مواعيد للحضرة قبل سبت  
العاشورة الجاي!

- إنما شوف يا سنفر، إتنا مسافر واللقا مواعيد، يامن عالم بالحي والميت، اتنا تروح تزور توربة أختك وتزرع شجرتها وتسقيها بنفسك، تو متخلص تيجي طوالي نعمل حضرة مخصوصة ل وزير!
- لازم نحضر حيينا معانا، لازم وزير يحضرنا!

## وزير



نقر خفيف عالطار .. تطويحتين يمين وشمال  
لعله يحضر الغالي .. لعله وزير يآنسنا .. ينور فوق ف العالي  
يسيب الغرب ويجينا .. ينجينا ويرقينا .. بلمسة إيده يشفيننا!  
صوت مكتوم بكف الإيد .. ف وسط الدف رباني  
ياريتها تدوم ساعات العيد .. ويحيي وزيرنا من تاني!  
بترنمة بترتيلة بتنغيمة .. بحور الآه تروينا  
بدقة زار لزوارنا .. حضور ال سي ينورنا  
نقر خفيف عالطار .. تطويحتين يمين وشمال  
لعله يحضر الغالي .. لعله وزير يآنسنا .. ينور فوق ف العالي  
يسيب الغرب ويجينا .. ينجينا ويرقينا .. بلمسة إيده يشفيننا!

## قصص



- اسمع يا سنفر! توك واصل من صوان أبو، زرت أختك ف الجبانة، وعملت حضرة تهد الحيل، ولساك ما إتغديت يا حبة عيني!
- صحيح يأمه، كانت سفريه جامدة، تعبت فيها أوي، بس حضرة وزير خدت التعب كله، كنت حاسس بنور وزير اللي كان مالي المكان، حسيت إنه حضر بنفسه وشرفنا، أنا مطمئن علا ستوتة يأمه، مادام وزير حي، روحها عتعيش وتتهنا ف جنة العلاي!
- ربنا يجعله بفايدة، إقعد إتصبر بلقمة!
- حاضر يأمه، وأنا م النجمة عصحا عشان أزور توربة ستوتة أختي تاني وأسقي شجرتها كمان، وأوصي عليها حرس الجبانة، وبعدين أروح أستعد للسفر وأكمل رصة البضاعة ف المركبة!
- لسه فاضل معاك حاجة من بضاعة صوان؟

- طبعن يأأمه، بضاعة صوان آبو، والتحف اللي اشتريتها من طيبة، والأقواس اللي كنت متفق عليها مع صنايعية قوص، عشتغل بيهم ف سفرية مناف!
- ريج بدتك شوية يا حبة عيني، دي سفرية كبيرة، ليلتين ثلاثة أربعة، يعني سفرة طويلة وموش سهلة، لازمك راحة عشان تصح لنفسك ولبضاعتك، حقك وحق الناس أصحاب الأمانات!
- أيوه، صنايعية الأقواس وإصحاب الورش كلهم بيرفضو يحاسبوني، وكلتهم لا بياخدو ذهب ولا سبيكة، ويقولولي نتحاسب أما ترجع لنا بالسلامة!
- شوف يا سنفر، تاخذ معاك الفروة دي تتغطا بيها م النداء والطل، وإياك تنسا دلالية بت، طوالي تدليها حوالين رقبتك، بركة وحماية وجب الشر، زاي ما كانت بتتعلق ف رقبة البقرة حصة ذات نفسها!
- كمان أمانة عليك يا قلبي متسافر وحديك تاني، خد معاك زنون، واد المرحومة ستوتة أختك، يتيم ومقطوع من شجرة، أهو يوننسك بارضيك، إييد لوحديها متصفقش، وأما ترجعولنا بالسلامة تحضرو أربعين ستوتة، عشان طير الباتاعت روحها عتطير ف العالي، وتيجي وتحضر معانا يوم الأربعين تقوم تظمن علينا وتشوف ضناها!

صباحية ثاني يوم، قبل طلعة الشمس، ومن معاد النجمة اللي لسه منورة السماء، أبوه وأمه وإخواته وإعمامه وعماته وإخواله وخالاته وجيرانهم، معاهم شوية من أهالي مدينة الأقواس "قوص"، طالعين يودعو سنفر وزنون!

زنون واد اسمر نحيف، صوغير بس طويل بالنسبة ل سنه اللي معداش عشر سنين، مجمع خصلة من شعر راسه الأسمر الناعم ف ضفيرة صغيرة م الجنب، سماره غامق، لافف وزرة بيضا علا وسطه، وكولة بابت مشغولة بزهرة اللوتس مغطية صدره وضره من حوالين رقبته، بصواب كفافه كان قابض عالدفة، بيوجهها يمين وشمال زاي ميقول له خاله سنفر!

أبوهم عطفي حياهم برفعة إيديه الإنتين:

- بحر يا زنون بحر، بحر ناحية مناف، يفتحها علينا وعليكو الفتاح!

بعد ما زنون سمع الدعا وشاف التحية والتوديع من جده وقرايبه، خد إشارة حركة الدفة من خاله سنفر، اللي من تحت وجب رجليه ظهرت صرر وشكير البضاعة اللي جمعها سنفر من خير وصنعة أهالي الجنوب!

سمسم وفول وكركيه ودوم وليسون، زيت بذرة اللوتس وحنا  
وكل للعين!

صرر وشكاير صغيرة، إترصت ف إركان المركبة، موزونة  
ومتقدرة، بالتورة والوقة والصاع والشوكر، كل شكارة مكتوب  
عليها الإسم والوزنة!

ف قعر المركبة، حزم من عيدان الأقواس، صنعة "قوص" اللي بقا  
عليها طلب كبير من أهالي بحري، لزوم صيد الطيور ف برك  
واكوام البراري!

الخال "باقي" حياهم من بعيد واتمناهم السلامة، برفعة ايديه وفتحة  
كفوفه الإيتين لفوق:

- متنساش تجيب شوية رومان، من منفلوط وانت راجع!

العمة "نينت" حيتهم من بعيد واتمنتلهم السلامة، برفعة إيديها  
وفتحة كفوفها الإيتين لفوق:

- وصيتك يا سنفر، حاجة البت، الغويشة والإسورة  
واخرخار، عشان الشوار!





بمجرد ما دخلت المركبة وسط الماية، وشقت لنفسها طريق، رفع  
المجاديف من الماية، وقام فرد الشراع ووجهه عكس تيار الهواء  
عشان يعمل مقاومة، وبالفعل الشراع عمل عب مليون هوا، دفع  
المركبة لقدام!

الماية بتلاي مع شعاعات الشمس، اللي بدأت تعلا ف السما!  
يمين وشمال عالبعد، ساطر جبال ناحية الشرق وناحية الغرب،  
محددة الوادي الأخضر وصايناه من غدر الرملة الصفراء!  
يمين وشمال خضار الغيطان، اللي مليانة خطوط سمرا بلون الطينة،  
جواها زروع، محددها جسور طالع منها شجر عالي!  
غيطان وفلاحين وبهايم، وطيور بتنزل تلقط من الأرض الدودة  
والغلة وبراعم الزرع الطرية، وجأة ترجع تطير من تاني!

## مينا



ماية ترعة حابي بتجري علا مهلها، ناحية بحري!

مركبة سنفر بقت عارفة طريقها، عايمة قريبة م الشط، ف التلت  
الأولاني م الشط الشرقي، بعيدة شوية عن تيارات المراكب  
الكبيرة اللي واخدة قلب النص، يعني اللي ف المراكب بيقو شامين  
ريحة الغيطان وحاسين بأنفاس الناس!

صوت م الشط، حياهم برفع ايديه الإثنين لفوق:

- يا مبحر أمانة عليك، إدعيننا عند الكريم فتاح!

النيل بين قوص وقفت بيضيق ويبقا شبه ترعة كبيرة، مش بحر  
هادر، الناس عالشطين بيقو شايفين بعض وبينهم كلام، وكان  
يقدر ويشاورو ويحيو ويلاغو الصيادين والمسافرين عالمراكب!

ساعة واحدة ولمع ف السما شعاع لماع، شعاع بنينة مسلة قفت،  
مدينة النظر "مينا"، رب الخصوبة والرجولة!

علا مدا الشوف، غيطان خس ققط المشهور بورقه الواقف  
العريض، جنبها غيطان مزروعة بصل وغيطان مزروعة توم!  
عالشط بياعين من الفلاحين ينادو علا حزم البصل والخس،  
المربوطة بعيدان برسيم:

- صون عافيتك بفحل البصل!
- فررح أهل بيتك، وادخل عليهم بطل!
- يطهر العينين، يروق الصداع ويجلي الدماغ!
- حزمة بصل تقضي عالعي!
- طلب مينا يا خس!
- ورور طري ومايتك ترياق!
- هدية البرابي يا خس!
- وصية الرجالة الجامدين يا خس!

نطة واحدة، وبقا سنفر عالشط، وسط بياعين الخس والبصل،  
بعود زفون ربط عشرين حزمة خس، وناول البياعة سبيكتين،  
ورجع ثاني للقارب!

زنون وهوو يساعد خاله سنفر فرص العشرين حزمة، سألة:

- الناس دي بتزرع الخس ده كله ليه؟ الخس موش زاي  
البصل، يعني مينفعش يتخزن، بعد يوم واحد بيدبل

ويبيوظ، المرحوم أبويا كان يزرع خط واحد خس عشان  
وكلنا، وبارضو كنا بنعلفه للبهائم، بدل ما يبيوظ!

سنفر كان ماسك ربطة العند، بيوجه بيها الشراع، اتكلم وهو  
باصص ل فوق:

- قفط دي بيتعمل فيها عيد كبير ل النظر ميناء، مرتين ف  
السنة، مرة ييجي الشبان قبل ما يبلغو سن الجواز، عشان  
يتختنو ف البربا زاي وزير، قبل الحج، يقضو عشرتيام ف  
العيد، هوما وأهاليهم، ومرة تانية يحضره العرايس والعريسان  
اللي لسه متجوزين جديد، من كل البلاد والعزب اللي  
حوالينا، يوم 29 كيهك ثاني يوم من نهاية الموسم الحج،  
بتبقا فيه مسابقات للمهارات بتاعت كل عريس، وكان  
يجيبو عرايسهم عشان يجاورو البربا بتاع ميناء، بارضو مدة  
عاشورة كاملة، يحتفلو ب ميناء، رمز الحصوبة، عشان يخلفو  
صبيان وبنات...!

زنون رجع براسه ل ورا، ودحك:

- ههههه، ويعيشو ف تبات ونبات ويخلفو صبيان وبنات،  
زاي تباتا ونباتا بتوع الحواديت!

- الناس اللي يحضرو العيدن دول، مياكلوش لا لحمة ولا سمك!
- طب بيا كلوايه، ويغمسو عيش البتاو بآيه؟
- سنفر كل كلامه، وجاوب كأنه مسمعش السؤال:
- أكلهم كله م الغيطان، خضار وفاكهة، بيغمسو العيش المرحح والمفقع والبتاو بالفول الحراتي والفول المدمس والخس والبصل والكرات والسريس والجرجير والقتة والشمام، طول العشريام!
- عشان النظر مينا مبيقبلش الا الهدايا اللي من الخضار، واللي عاوز يحتفل ب مينا، لازم يمشي ف سكتة، عشان تحل بركتة، وينول اللي بيتمناه!
- طيب طيب، دول عرسان وعاوزين يخلفو، احنا بقا لا عرسان ولا حاجة عنعمل بكل الخس ده ايه؟
- دا احنا موش عنلحق ناكل منه ولا حزمة واحدة، والباقي عيدبل ونرميه!
- ههههه، اياك فاكر اننا عنا كل حاجة معانا!
- ههههه، يا واد دي تجرة، بيع وشرا يعني، الحزم دي عنبيع منها للمراكبية والصيادين والمسافرين اللي ف الطريق!

- خليك فاكر أما تبيع حاجة منهم، الخساية الواحدة  
بسحتوب، والحزمة بسبيكة، وإن فضل حاجة يبقا ناكلها يا  
سي زنون!

يادوب سنفر مكلمش كلامه مع زنون، الا وسمعو صفافير  
وطرطرشة ودوشة!

مركبة كبيرة جنحت شوية وقربت منهم، شائلة حمولة زكايب  
وبلايص وطواجن وطين صلصال، ريسها سأل سنفر:

- معلهش يا بلدينا، إنتا عارف بقا إن المركبة بتاعتنا كبيرة  
أوي عالمراسي الضيقة دي زي المرسا بتاع قفط، يعني  
مقدرناش نقف فيها، ممكن بقا تدينا حزميتين م الخس  
الققطاوي الورور ده!

زنون بقا فرحان ومتباها بحكمة خاله ومعلمه، وهوه بيناول حزميتين  
الخس للمراكبي، وياخد منه تمنهم سبيكتين، كل حزمة بجحة  
سبيكة واحدة!

صياد من أهالي قفط، مركبته ورا مركبة سنفر، كان حاطط  
إيديه علا ودانه، مغمض عينيه ويغني بحس حلو، أغنية عيد  
النظر مينا:

يا مننا يا مننا .. انتا حبيبنا كلنا  
يا مننا يا مننا .. يا أغلا حاجة عندنا  
رضاك علينا يا مننا.. خلاها جنة ربنا  
خسك مالي أرضنا .. وحبك جوه قلبنا  
يا مننا يا مننا .. انتا حبيبنا كلنا  
يا مننا يا مننا .. يا أغلا حاجة عندنا



## بان بان



كل عب هوا بينفخ شراع المعنذت بتقرب المشوار، مع صوت  
طرطشة وكركرة الماية، دوشة نعر السمك، مع نقنقة الضفادع،  
وسريخ التماسيح، ونبح الكلاب عالشط، الطريق يير، والماية بتسابق  
المراكب، والعزب بتجري، والبلاد بتفوت ... علامة كل بلد نور  
بان بان مسلتها!

المسلات طخانات، مش بس منظر وهيبة ووسيلة لكاتبه التواريخ!  
المسلات ف الأساس تجسيد لرمز مهم من رموز الفكر المصري،  
البان بان اللي متجلد بالذهب علا راس كل مسلة، بيمثل الشكل  
اللي بدأ بيه الكون من المحيط الأزلي، ووجوده بيضمن إستمرار  
الحياة وتجديدها!

كمان المسلات علامات ومنازل، هداية ونور، للعاير والمسافر!  
المسلات من حجر واحد، طخانات، أحجام ومقاسات، الطويلة بتبقا  
عالشط، والأقصر شوية بتبقا ف بداية طريق الجبانة، أما الكبيرة

والعريضة والعالية خالص دي بتتخط قدام الأهرامات، رفيعة وطويلة قدام البرابي، زينة وهيبة لبوابات القصور!

مسلة ققط .. مسلة دندرة .. مسلة قنة .. مسلة دشنة .. مسلة  
جرجة .. مسلة سوحاج .. مسلة أحمين .. مسلة طحطة .. مسلة  
طما .. مسلة سيوطي .. مسلة ديروطي .. مسلة منفلوطي .. مسلة  
دشلوطي .. مسلة بهنوسا

سنفر كان يحكي ويشرح لزنون وظيفة المسلات الطخانات،  
وأيديه الإيتين سأندين علا كتاف القارب، باصص ناحية المراكب  
وبارضو بيرد عالصيادين:

- اتفضل لقمة هنية يا بلدينا!
- توشكر، عاوز أدله بسرعة شوية يمة بحري، قبل عشية!
- ربنا يقويك، أي خدمة!
- احنا وانتو، منتحرمش منكوا!

زنون يببص عالغيطان والعزب، مبهور بطرح الجنانين، عنب وتين  
ورومان وخوخ، ألوان الورق واللوز والنوار، بلح النخل ومام  
الدوم وتين الجميز وجدة الزيتون، سجر السنط والشين واللبخ  
والصفصاف، بوص الترع وغاب البرك وتيل الجسور، الكنان  
والسمسم والقمح والشعير والفول والشمام والبطيخ والقتة والقرع

والتوم والبصل والكرات والخس، الملاثة والكركيه والليسون،  
ال دراوية والزفون والبرسيم، السريس والجلادين والرجلة واللفت  
والفجل والجرجير!

عالتلال العالية باين من بعيد مباني كثير، برابي ربابي، ومسلات  
طخانات، عواميد الجد وزير، وتماسيل الجدة است!

الغيطان عمرانة بالفلاحين، رجالة وستات، كتف ف كتف، إيد  
ويا إيد، ، اللي يحرت واللي بتفحت، اللي بيروي واللي بتنصف،  
اللي بيلووط واللي بتخطط، اللي بيعلف واللي بتسقي، اللي يبدر  
واللي بتشتل، اللي بيعزق واللي بتنقي، اللي يقص واللي بتحش، اللي  
بيدرري واللي بتجمع، اللي بيكبس واللي بتكنس!

بينهم آمال وأماني، بيعبرو عنها ويلخصوها ف مواويل وأغاني!

خليك وسط الناس، ومتنساش ربك أبدن

إعمل خدك مداس، تبقا الآشيه معدن

راعي ضميرك ف شغلك، مال النتاش يغور

اكسب غيرك بأدبك، تملا بالخير بحور

احفظ سري وسرك، ومتفضحش المستور

خليك وسط الناس، ومتنساش ربك أبدن

اعمل خدك مداس، تبقا الآشيه معدن

الشاطر يصحاحم النجمة، والشاطرة تغسل له الهدمة

الشاطر بالهمة يقوم، والشاطرة متعرفش النوم

الشاطر مخلص طوالي، والشاطرة دحكتها تلالي

خليك وسط الناس، ومتنساش ربك أبدن

اعمل خدك مداس، تبقا الآشيه معدن

سما الغيطان مليانة طيور جديدة، تشكيل المجاميع الطائيرة، مربعات  
ومسلسلات، نجوم ودوائر، طول وعرض، فوق وتحت، جنة طير  
كبيرة، متلونة بريش العصافير والزرراير والنسور والصقور والغربان  
والحمام واليمام والقمرى والسمان والقنبر والشرشير والوز والكراكي  
والقطاطي والدحاريج!

زنون بقا مبهور بشكل الطيور ف السما وعالشجر، طيور عارفها،  
وطيور عمره ما شافها، عالم جديد بالنسبة له، من يوم ما قدر  
عالمشي وكانت أمه توديه الغيط عشان يساعد ويشغل مع أبوه،

وبينام ف الدوار، ودي أول مرة يسافر فيها بعيد عن غيطان  
قوص، من يوم ممات أمه!

- نفسي أعرف يا خال سنفر، البرابي والمباني دي كتها  
اتعملت إمتا؟

- نحتوها وسنفروها وكتبوها اززاي؟

- اسمع يا زنون، اتفرج بس دلوقتي!

- لسه مشوارنا طويل، عقولك كل حاجة، ومسيرك عتعرف  
أما ييجي وقتها، عبقا اشرحها لك كتها!

- ولا يعني مش عتبطل زن؟

- ههههه، يكونشي عشان كده سموك زنون؟

زنون اتقمص وزعل أوي، عقد بين حواجه وكششر وهوه  
باصص ف وش خاله:

- يعني اسمي معناه اني زنان؟

- لآلا، لا يا واد لا، ههههه، أنا بهزرامعاك، أهو اتنا كده  
فعلن زنان!

- بس أصل إسمك ده من حاجة حلوة ومهمة أوي، إسمك  
من إسم صوت المحيط الأزلي (نون)، ده الصوت الوحيد  
ف العالم اللي مبيبطلش، ههههه، صوت هدير الموج اللي

شغال من يوم ما ظهر البان بان ف محيط النون، وعيفضل  
كده لآخر الزمان!

- فين محيط النون ده؟

- محيط النون محاط الكون كله، ف وقت م الأوقات  
مكنش فيه غيره، الدنيا كتها كانت عبارة عن مائة ولس،  
وفضلت كده ملايين السنين، وبعدين ظهر من وسط  
المحيط بان بان كبير، شكله زاي اللي بتشوفه دلوقتي فوق  
خالص علا روس المسلات الطخانات والأهرامات  
الميلات دي، فوق البان بان الكبير اللي ظهر من وسط  
مائة المحيط، وقف أول بنا ف الوجود، الطير اللي بنا الكون  
الكبير ده كله، طير ال "بنو"، اللي باض بيضة فقست وطلع  
منها كل حاجة حية، عشان كده بنكتب عاليض دعواتنا  
وطلباتنا اللي بنرسمها وبنلونها قبل ما ناكلها ف حب شمو ..  
شمو انسيم يا وااااا!

- ياه، دي حكايات حلوة أوي، عايز أعرفها كلها،  
وبالتفصيل، ههههه!

زنون باصص ومركز أوي، عينيه بتلعب، فرحان بصحبة خاله:

- يا سلاااام، دي أول مرة أعرف معناة إسمي!

- كنت فاكر إن إحنا بنتولد إ كده بأسامينا!

- لالا، احنا مبتولدش لا بأسامينا ولا بأفكارنا!
- فيه حاجات بصحيح ملناش فيها ومش بإيدينا، يعني محدش ييختار لا لونه ولا طوله، وكان محدش ييختار لا لون شعره ولا لون عينيه!
- الأفكار والأسمي أهالينا هوما اللي بيدوهالنا، وأما بنكبر شوية يبقا من حقنا نختار اللي يعجبنا ونغير اللي ميعجبناش، ونقدر كان نضيف الإسم اللي يعجبنا، عشان كده لازم الإسم يبقا له معنا!
- طيب معناه إسمك إتنا إيه؟
- معقولة يا واد متعرفش يعني إيه سنفر؟
- معمركش سنفرت حاجة ولا إيه؟ سنفرتها يعني لمعتها وذوقتها وخليتها ناعمة وجميلة؟
- اللي بيسنفر، يعني اللي يذوق وييجمل!
- مفهوم مفهوم يا خال، يبقا عشان كده الحطة الخشنة اللي بننصف بيها، واللي النجارين والنحاتين بينعمو بيها الخشب والحجر، اسمها "سنفرة"!
- طيب سؤال ثاني، معلش آخر سؤال!
- وليه آخر سؤال، يا واد لسة مشوارنا طويل، ليلتين كان ونوصل مناف، وبعدين نقعد لنا قد عاشورة كده ولا

حاجة، وبعديها نرجع ل قوص ثاني، يبقا عنعمل إيه،  
وعنتسلا بإيه؟ إسأل يا زنون إسأل!

- أنا عارف إن اللي بيموت بيرجع يعيش ثاني ف جنة العلاي،  
ده لو كان طيب وبرئ زاي المرحومة أماتي، يعني اللي  
بيتولد بيعيش شوية وبيموت، وبعدين بيرجع يعيش ثاني،  
سؤالي بقا: أهم حاجة ف العيشة دي إيه؟

- عارف يا واد يا زنون، سؤالك ده محير كل الناس،  
وسمعت له جوابات كتيرة، كل نظر وكل بربا وكل  
كاتب، حتا كل إنسان عادي يفكر، يشوفها من ناحية،  
حتا كل واحد بيبقا له جواب مخصوص، اللي بيقول أه  
عيشة وخلاص، واللي شايفها امتحان اللي يتنجح فيه ياخذ  
البراءة ف المحكمة ويضمن حياة الخلود ف الآخرة، واللي  
شايفها رسالة، واللي متأكد إن ربنا محدد نصيب الخلق،  
وعمل سبب لكل فعل، وهدف لكل حياة!

- طب جوابك إنتا إيه؟

- أهم حاجة عندي إن ضميري يكون مرتاح، لا أضر حد  
ولا حد يضرني!

- جواب سهل أوي، طب مفيش غير الجواب ده؟



- زاي ما قلت لك، فيه جوابات كتيرة أوي، أما أنا كنت ف سنك بارضو سألت أبويا نفس ذات السؤال، قاللي العيشة دي رسالة، سلف ودين، زاي ما بناخد لازم ندي!
- يا سلام علا جدي، وجواباته الحلوة!
- بس مرة كنت ف صوان أبو وسمعت كاتب السوق بيطيب خاطر واحد ييشكي له م العيشة، قال له: لازم تستحمل تعب العيشة، واللي تخاف منه ميجيش أحسن منه، إحنا بنعيش عشان نعرف ونتعرف، اللي لا يعرف ولا يتعرف أكيد موش عايش، واللي عنده المعرفة يبقا عنده كنز غالي، المعرفة اللي عندنا لازم ننقلها لولادنا وأهالينا واصحابنا، احنا كل يوم بنعلم وبنتعلم، جيل ورا جيل!
- الكاتب رفع راسه وكرر كلامه:

احنا كل يوم بنعلم وبنتعلم، جيل ورا جيل!

سنفر رفع راسه، باصص عالسما، وقال جملته بتصميم:

- أنا معرفش هدف للعيشة، ولا يبقا لها قيمة ولا طعم، إلا بالمعرفة وكتر المعارف!

فجأة سنفر سكت وكأن البحر كله بقا ساكت، طلع صوت يقول:  
سمع هوووس، لما واحد م الصيادين بدأ يغني بصوت حياني  
وصريح موال عن الغوربة، إسمه موال الغريب:

أنا أعما وكفيف .. مش شايف لون أرضي .. بيقولو سماري لطيف!  
سامع زن فوداني .. (انسا انك ترجع تاني) .. وبسдж أي ظريف!  
بقا كلامي مش عاجب .. أرطن شرقي وغربي .. بيقولو بلاش  
تجاوب!

حاسس جوايا نار .. (انسا كلام الهزار) .. وبسдж كذب  
الخاب!

كلامي دا يبقا عيب؟

اسمي بقا غريب؟

وبدال ما ازرع ف أرضي .. أكل أكل الغريب؟

أنا أعما وكفيف .. مش شايف لون أرضي .. بيقولو سماري لطيف!  
سامع زن فوداني .. (انسا انك ترجع تاني) .. وبسдж أي ظريف!

أنا أعمأ، ومش عارف .. جوايا كنز المعارف!  
بسمع همس الشفايف .. حاسس بيهم وشايف!  
مفتاح السر عندي .. لسة شايله ف يكاني!  
بوكرة أحكم زماني .. وأقطف لوز الأمانى!  
نوار العقل يفتح .. الهمة تقوم تصحصح!  
وشجر الحب يطرح .. فرحة ف كل مطرح!  
أنا أعمأ وكفيف .. مش شايف لون أرضي .. بيقولو سماري لطيف!  
سامع زن ف وداني .. (انسأ انك ترجع تاني) .. وبسدج أي ظريف!

## بهنوسا



ع الحال ده، مر نهارين تلاتة، باتو ليلتين ف الماية، اللي يجوع  
يكسر لقمة من عيش البتاو مع حطة جبنة، ويتبلع بشوية ماية،  
متونسين ف رحلة النيل بالماويل والغناوي وبصحبة الصيادين!

بمجرد ما مركبة الشمس تسافر للبر الغربي، تتجمع المراكب  
عالشط، يتلم المراكبية والمسافرين، يتحاوطو حوالين نور راكية  
نار كبيرة، اللي ينام ف الدفا، واللي يقضيها كلام وحواديت  
ولعب وهزارا!

صيحة صوت الديوك، وشقشقة نور الصبح، تصحي النائم وتنبه  
الحالم، طسة ماية ببركة حايي، تنعش الكسلان وتفوق  
الونحمان، وكل واحد منهم يبدأ يومه بورده وترايله، كل حي  
له رب يدعيه ويصليله!

صح النوم، صح النوم

صحصح صحصح بقا م النوم

فتح عينك، شوف اليوم  
هم شوية، ياللا وقوم  
نشط نفسك، بلاها هموم  
صح النوم، صح النوم  
صحصح صحصح بقا م النوم  
اصحا، وسمعي التكريعة  
بلا تمطبعة، بلا تكويعة  
كثر النوم يجيب الوجيعة  
صح النوم، صح النوم  
صحصح صحصح بقا م النوم  
غير ريقك، والبال رايق  
طسة ماية، تخليك فايق  
تعب الساعة يطير ف دقائق

صح النوم، صح النوم

صحصح صحصح بقا م النوم

اللمة اتفضت، والجمعة اتفرطت، كل مركبة عارفة طريقها،  
اللي مبحر مع الماية نازل لتحت، واللي مقبيل عكس التيار  
طالع لفوق!

من فوق شواشي سجرة جميز عالية، ظهرت زغلة شعاع نور  
الشمس، معكوسة زاي المراية، من ذهب البنينة الكبيرة، ل  
مسلة طخانة بهنوسا!

- أدينا وصلنا لهنوسا، بلد الهنا، اللي ليها نصيب كبير من  
اسمها ال (هنو-سا)، يعني حجاب الهنا!
- البلد دي لها مكان كبير ف قلبي، كل ما بقرب منها بفرح،  
أصل الأماكن كده، مكان يفرحك ويسطك ومكان  
يقبضك ويغمك، مكان إذا وصلته يبقا ياسعدك ياهناك،  
ومكان يقربك لقضاك!
- استعد يا زنون دي محطة راحتنا ف تالت ليلة، بس دي  
موش راحة وبس، دي بلد الحبايب يا واد، بلد خالتك  
ستيتة، وجوزها بانوبي، وكان ولاد خالتك سمر وسمير!
- زمان سمر كبرت، نفسي أشوف ولاد خالتي!

زاي ميكون بانوبي كان سامعهم، لأنه كان يجري عالشط  
ويشاور لسنفر:

- تو ما سمعت خبر قرب وصولك يا واد خالتي، جيت لك م  
البلد جري!
- لك وحشة يا بانوبي يا جوز أختي، كده تفوت قوص  
وتشغلنا عليك يا راجل!
- الأرض الجديدة محتاجة شغل يا سنفر، ومينفعش أهملها!
- ربنا يوفقك يا خوي، يديك خيرها ويكفيك شرها، أهلنا  
بس مشغولين عليكو ويحبو يطمنو!
- البقية ف حياتك ف أختنا ستوتة، سمعنا الخبر الإسود من  
مراكبية قوص!
- ربنا يبقي حياتكو، ويطرح البركة فيكو!

سنفر استقبل نسيبه ف المركبة، لأن ميقدرش يفتوت بضاعته:

- سامحني يا خوي، كان ودي آجي معاكو للدار، بس  
مقدرشي أفوت المركبة والبضاعة اللي فيها، دي حقوق  
الناس يا خوي!
- ولا يهملك يا ابن خالتي، ماهو عشان كده أنا جيتلك،  
وكان ستيتة أختك جاية ورايا تسلم عليكو، إنتا وزنون!

شويتين ووصلت ستيتة، حاطة حواية علا راسها، شايلة فوقها  
سبت مليون عيش مررح وبتاو وفطير بالجينة وزلعة عسل!

- شتاات شتاات شتاات، روحتي يا ختي مع الأموات،  
شتاات شتاات شتاات، نور العمر عدا وفات!

- البقية ف حياتك يا ستيتة!

- البقية ف حياتك يا سنفر، البقية ف حياتك يا زنون، تعالا يا

حبيبي ف حضن خالتك، ربنا يعوضك وي طرح البركة فيك!

- ستوتة موش بس أختي الكبيرة، دي كانت رفيقتي

وونيسي وصاحبتي، أيامي الحلوة عشتها معاها، ربنا يكتبها

مع الطيبين، ويندبش الطوبة اللي تحت راسها، ويعلي

مكانها ف جنة العاللي وغيطان اليارو، آمين آمين آمين!

سنفر طبطب علا كتف أخته، وبعدين فرد إيديه وبص  
عالحاجات اللي كانت جايهاها:

- ايه ده كله يا ستيتة؟

- تابعة نفسك ليه يا ختي، أماتك عاملة لنا الزاد والزواد كله!

ستيتة ولا كأنها سمعت حاجة:

- العيش المررح الطري ده ملفوف جواه وزه مطبوخة،

بالأونصة والكبدة اللي عارفة إنك بتحبهم يا خوي!



- منتحرمش منك يا عصفورة الستات!
- ههههه، إيه يا واد يا سنفر، لازم تفكرني بمعناة إسمي يا واد، وحشني هزارك يا آخر العنقود، ربنا ما يحرمني منك ولا من طلتك عليا!
- طمني عليكو عاملين إيه يا ستيتة ف العيشة هنا، ويا الأرض الجديدة دي؟
- بخير يا خويا، نعمة وفضل كبير، ربنا يديمهم علينا!

بعد السلامة والتحيات، زنون أخذ سمر وسمير الصغيرين، وقعدو عالشط يلعبو بلعبة من الخشب كان عاملها زنون، شوية ونزلو المركبة قضو الليلة ف النيل مع خالهم وبضاعته، حكاكهم الحواديت اللي سمعها من أبوه وأمه وجده وستة، وحكاياته مع السفر والتجارة، بلغهم سلامات جدهم وستهم، وإاداهم هدايا لعبة البقرة الصفرة وشخشيخة حتحور!

سمر قالت لخالها سنفر:

- أنا فرحانة يا خال، إنك بتشتغل تاجر، عشان تسافر كل شوية وتيجي تزورنا، أنا بفرح أوي يا خالي أما بشوفك!
- بس كنت عايزة أسألك يا خال: انتا ليه مشتغلتش فلاح ف أرضك، زاي جدي وأبويا وبقية قرايينا؟

- أنا فلاح بزرع ف أرضنا طول السنة، وبين مواسم الزراعة بسافر أتاجر!
- طب اتعلمت التجارة دي ازاي؟
- التجارة موهبة وهدية م الأرباب، من وأنا صغير كنت ببادل حزم البرسيم والخس بتاعنا مع بصل وتوم جيراننا!
- كان أنا اتعلمت التجارة من سيرة أول فلاح وبارضو تاجر، حيينا وزير!
- يا خبر يا خال، إنتا كل حاجة تقلبها جد، ههههه!
- يابت الأفكار عن الآخرة دايمن معانا ومالية حياتنا، وبتصحح ضمائرنا، أنا اترريت ف بيت مشغول بسيرة ومديح وزير!
- التجارة فيها كتير من سيرة وزير، كان رحالة بيسافر وبيزور الناس، وينقل خبرته وحكمته بين البلاد، عشان كده قدر يعلم الناس الزراعة والأغاني وعزف الناي ولبس الهدوم!
- وغير اني ماشي علا سيرة وزير بقا، أنا ف التجارة بسرحد علا رزقي، زي ما بسرحد للغيط، وساعات بكسب م التجارة ف سرحد واحدة، أد اللي بنكسبه م الغيط طول السنة!
- وأهو اللي بيدجي م التجارة بيساعد ف الزراعة بارضو!

- ياه، يعني التاجر الواحد ممكن يكسب من التجارة أد اللي بيكسبه عشر فلاحين من الأرض؟ دي تبقا مهنة حلوة أوي، وتبقا كان أكثر مهنة بتكسب!
- لالا، التجارة ربح وخسارة، وكل واحد وشطارته، إنما أكثر مهنة بتكسب، ومضمون إن مفيش فيها خسارة، هيه مهنة الكتابة، عشان كده عايزك تتشطري انتي وأخوكي سمير، وتفهمو اللي بتتعلموه ف البربا كويس!
- يبقى عشان كده بيعملو للكاتب صور وتماثيل ف كل بلد؟
- الكاتب كل الناس محتاجاه، الحاكم والمحكوم، الغني والفقير، هوه ضمير الناس، اللي يبسجل والي ينقل أفكارهم وأحلامهم، شكوايهم وأغانيهم، طلباتهم وأوامرهم، ف حياتهم عالارض وبعد كده حياتهم ف جنة العلاي وغيطان اليارو!
- الكتابة موهبة بارضو؟
- صحيح الكتابة عطية م الأرباب، لازم ربة الكتابة سيشت ترضا عن أم الكاتب عشان تخلها تنقل لمولودها الموهبة دي، بس كان محتاجة تعليم وتدريب مدة طويلة، من أول ما الواحد يقدر يحرك صوابعه، بيتعلم ف البربا رسم ونحت الحروف، ويعرف كان أصل كل حرف، عشان حروف الكتابة لها أصل وسر من الطبيعة!

- والكاتب بيكسب كثير بقا؟
- كل كاتب وشطارته، وكل واحد ونصبيه، إنما ممكن اللي يكسبه الكاتب من رسالة واحدة لتاجر تكفيه المصاريف طول الشهر، ولو الرسالة دي كانت لواحد من أمرات الجيش أو الحكام أو العمد، يمكن ياخذ الكاتب منهم اللي يكفيه طول الموسم، أما اللي يكتب بقا لحساب قصر الملك، يبقا يا بخته ويا سعده يا هناءه، ممكن يكسب اللي يكفيه العمر كله، ويا ما سمعنا كثير عن كتّاب إداهم الملوك أراضى وقصور!
- وبعدين موش حرفة التجارة وحرفة الكتابة بس اللي بيكسبو يا سمر، كان الحرف الثانية بتكسب بارضو، الفلاحة والسقاية والحلابة والطبابة والنجارة والبنية والحدادة والنساجة والخياطة والغنا والعزافة والرسم والنحاتة، كل مهنة لها ميزة، وكل حرفة لها عازة، إحنا بنكل بعض، المهم اللي بيدشغل شغلانة يكون يحبها ويخلص لها، زاي الأغنية دي ما بتقول:

كل حاجة أعملها .. آخذ حنة منها

كل أرض أرويه .. يبقا نصيبي فيها

اللي يحب شغله .. قلوب الناس تشاغله

اللي يظبط عمله .. كل الناس تعامله

الفلاح مرتاح، والتجارة شطارة

الكاتب غالب، والطبابة طيابة

النجار منشار، والحدادة سعادة

الرسام فهم، والنحاتة نجابة

كل حاجة أعملها .. آخذ حنة منها

كل أرض أرويها .. يبقا نصيبي فيها

اللي يحب شغله .. قلوب الناس تشاغله

اللي يظبط عمله .. كل الناس تعامله

- سقفة يا سمير، ياللا يا سمورة، غني يا زنون:

الفلاح مرتاح، والتجارة شطارة

الكاتب غالب، والطبابة طيابة

النجار منشار، والحدادة سعادة  
الرسام فهم، والنحاتة نجابة  
كل حاجة اعملها .. آخذ حنة منها  
كل أرض أروياها .. يبقا نصيبي فيها  
اللي يحب شغله .. قلوب الناس تشاغله  
اللي يظبط عمله .. كل الناس تعامله

- بقالنا كثير معندناش إلا الشغل ف الغيطان، ربنا يخليك  
لينا، فكيت علينا، وريحتنا يا سنفر، ربنا ما يحرمنا منك يا  
حبيبي يا خويا!
- كفاية كده النهاردة، ياللا يا ولاد نسيب خالكو بقا،  
عشان لسه قدامه سفر ومشوار طويل، ربنا يعينه ويقويه!
- ايه يأمه بقا، عاوزين نغني كمان شوية!
- وبعدين يا سمير، خالك تعبان، وإحنا وانا شغل ف الغيط،  
وانتا واختك حتروحو البربا تتعلمو الكتابة، ولا هنقضها غونا  
يا واد يا لعي إنتا؟

زنون لف لعبته الخشب ف شكاره فاضيه، وإداها ل سمر، ووصاها  
تحافظله عليها أمانة لحين رجوعهم م السفر!

ستيته قربت شويه ووشوشت أخوها، حلفته بالنطرو  
المتقدسين، است وحتحور ونيت وطاوبه، إنه ما يغيب عنهم  
كثير، ودايمن يشقر عليها:

- أخوي أنا وحدانية، صحيح أنا متجوزه واد خالتي، بس طلة  
واد أمي وأبوي عليا بالدنيا كتها، إسمع يا سنفر تفوت علينا  
وانت راجع تحضر معانا السبوع، عشان خلاص النونو  
الجديد، قرب يوصل بالسلامة!

- وخلي بالك من زنون يا سنفر، دا ابن الغالية!

مع تبشير الصباحية، وصل تاجر بهنوسي، طلب يشتري وزنتين  
ليسون وكركرية، واشترا سنفر منه توين قماش كان شفاف  
مشغولين بالذهب!

عالشط، كان واقف بانوبي يودع نسيبه وابن خالته، وهوه شاييل  
إبنه سمير، بيقول لمراته ستية:

- هيوحشنا أوي الواد سنفر، صحيح إنه لسه شاب صغير إنما  
دماغه توزن بلد!

- التجارة خلته يسافر ويزور كل البلاد، عرف كل عزبة  
بتزرع إيه؟ وبتشتغل ف إيه؟ ومحتاجة إيه؟ وكان السفر  
كسسه حاجات كثير، أهمها الخبرة ف معاملة الناس، بقا  
بيعرف اللي بيزعلهم إيه؟ واللي بيفرحهم إيه؟ بقا فاكر  
مواعيد المواسم والأعياد، اللي كل سنة واللي كل شهر واللي  
كل عاشورة، بقا حافض كل النصوص، وعارف كل  
الطقوس!

عالشط، كانت سمر واقفة بتعيط، وهيه ماسكة ف ديل جلابية أمها،  
بتمسح دموعها بإيدها اليمين وبتشاور، بتودع ابن خالتها زنون  
وخالها سنفر، رافعة إيدها وتتحرك كفها المفتوح لفوق!

أخوها سمير وأبوها وأمها فضلو واقفين بجيهم، برفعة إيديهم وفتحة  
كفوفهم لفوق!


بعد الوداع، اتحركت المركبة بالمسافرين، سنفر كان قاعد مستعد  
للتجديف، فارد رجله جوات الكاينة، ضهره ساند عالصندوق  
اللي ف ضهر راس حتحور، يجدف بإيديه ويبدندن:

- رالا رالا .. رالا رالا .. رالا رالا ...

- لالا لالا .. لالا لالا .. لالا لالا ..



## الأسد والفار



زنون نام شوية، وبعدين صحا يفرك ف عينيه بإيديه ويتتاوب!

- إيه يا واد؟ صحيت دلوقتي ليه؟ رييح كان شوية!
- لا، موش قادر أنام، عشان فيه حاجة بفكر فيها!
- إيه يا سيدي، اللي شاغل بالك عاد، ههههه؟
- شوف يا خال، كل مبنقرب نوصل للسوق، وأحسب إني تقيل عليك ومعطلك، أخاف متنجحش زاي أما بتكون لوحديك، وكنت هقولك تسيبني عند خالتي ستيتة، أستناك هناك ألعب وأشتغل معاهم، وبعدين وإننا مروح تبقا تفوت تاخدني معاك!
- أنا لسه صغير عالسفر والتجارة، وحاسس إن مليش عازة عالمركب عاد!
- ههههه، اسمع يا زنون، صحيح أنا ختك معاي عشان خاطر أختي، المرحومة أمك، إنما كان ختك عشان خاطر إنك

شاطر وبتسمع الكلام، ومتفتكرش عشان إتنا صغير يبقا ملكش عازة يا واد! ههههه!

- أومال اللي هيمسك لي الدفة مين يا بو عقل طخين؟
- طب إسمع بقا أما أحكيك حدوتة من حواديت جدودنا القدام:

كان يا ما كان ف سالف الوقت والزمان، ملك اسمه الشمس (رع)، عادل وحقاني، ومن كتر عدله وحقانيته بقا من أساميه (حقا)، وعشان كده كل ملوك مصر اللي جم بعده، بقو كان ينقال عليهم (حقا)، يعني بدل ما يقولو الملك فلان، يقولو الحقا مينا، الحقا جاسر، الحقا خوفو، الحقا خفرع، الحقا ونيس، وكده لغاية دلوقتي، يعني أدينا احنا كان بنقول الحقا بيبي، وده لأن (رع) كان أساس فعل الحق ف مصر، يعني ملك مهم، ودلوقتي بقا نظرو نذير متقدس من كل العالم!

رغم إن الحقا رع، كان ملك قوي وحقاني أوي، وفيه كل الصفات الحلوة، اللي قلتها وغيرها، إنما يفضل إنه كان إنسان، زاي أي إنسان بيكبر ويعجز ويضعف!

أما كبر ف السن، ناس شافته بيقع وهو يحاول يطلع سلام جنية  
القصر، وناس تانية شافت العساكر بتاعته بتسندة عشان يركب  
حمارته!

- الملك وقع يا جدعان، ههههه!
- الملك مبيعرفش يركب، ها ها أو أو!

الشابة العفية حتحور، أميرة القصر، والبنت البكرية للشمس رع،  
سمعت التريأة من الناس ف اتضايقت ومبقتش مستحيلة،  
وراحت جابت سلاحها وجمعت العساكر وصممت إنها تأدب أي  
حد يتكلم وحش أو يترياً علا أبوها الشمس رع، وفعلن بدأت  
تضرب ف الناس اللي متجمعين بره القصر، اللي ليهم شكاي من  
الموظفين أو اللي ليهم طلبات من الملك، لولا إن الملك طلعلها  
وشخط فيها قدام الناس، ونهاها إنها تعمل كده تاني، وقال لها:

- إياكي تضربي شعبي وناسي، طب أعمل إيه أما أقف قدام  
الميزان، وتتوزن أعمالي قدام ريشة الماعت، أنا مسؤل عن  
رضا وسعادة شعبي، وعمري ما أتسبب ف تعاسة أو ضرر أو  
ظلم لأي انسان برئ!
- يابنتي قدام الميزان إيدينا وعيننا وقلوبنا بتشهد علينا!

الحقار ع مكلش جملتين من كلامه، إلا وبنته غضبت، مشيت  
وسابت القصر، زعلانة من أبوها اللي وقفها عن تأديب الناس اللي  
بتترى عالملك، وزعلانة من الشعب اللي مبيقدرش المسؤولية اللي  
شايلها عنهم الملك!

حتحور كانت بتعرف علوم السحر، زاي أبوها وقرائهم وكل اللي  
شغالين مع الملك، إتحولت لصورة بقرة شابة صفراء، ومشيت علا  
ضفة ترعة حابي، بلاد تشيلها وبلاد تحطها لغاية ما عدت الجنادل  
كلها، وقربت من غابة الشجر، وهناك اتحولت لصورة مرات  
الأسد (سخت)، عشان تقدر تعيش بين وحوش الغابة!

السنين عدت، والملك كبر سنه وزاد ضعفه، والإهمال بقا باين  
عالقصر وجنينته، الفلاحين سابو الأرض بايرة، والمخازن بقت  
فاضية، والشوارع بقت برك مائه، الخلاصة إن البلد باظت!

الحقار ع جمع الوزراء والأمراء، اتشاور معاهم:

- إنتو أهلي وإصحابي قبل ما تكونو موظفين عندي، قولولي إيه  
العمل؟ قولولي أعمل إيه؟ .. أعمل إيبليه؟ حتحور كانت  
سندي وعزوتي، هيه اللي كانت بتنظم القصر، وبتشرف  
عالعمال والفلاحين!

- لازم حتحور ترجع، لازم تبعت لها تصالحها وتطيب خاطرها، عشان ترضا ترجع هنا ثاني!

الحقار بعد ما خلص إجتماعه، طلب من وزيره الهوا (شو)، ياخذ معاه القرد (تحوتي)، ويسافرو لغاية غابات أفريقيا، وهناك هيلاتي حتحور، واخدة شكل اللبوة (سخت)، يحاولو يطيبو خاطرها ويقنعوها ترجع لمملكتها وقصرها!

القرد تحوتي، نط قدام الملك وقال له:

- طب واحنا عرفنا ازاي إنها ف غابة أفريقيا؟ مش لازم جلاتك نتأكد الأول عشان منسافرش ونضيع وقت عالفاضي، يا مولاي الحقار لازم نحسب كل خطوة قبل ما نخطيها!

- ياللا ياللا بططل لماضة، إمشي إعمل اللي بقولك عليه، أنا بارضو الشمس رع، سحري ونوري ف كل مكان، مهمن ضعفت أفضل أنا الضي والدفا للعالم، وحفيدي الصقر حور ياما طار وشافها ف مكانها واطمن عليها، وكان إنتا معاك الهوا شو، اللي محدش يقدر يستغني عنه، لا حاكم ولا محكوم، لا كبير ولا صوغير، لا غني ولا فقير، مملكة وزير بس هيه المكان الوحيد اللي مفياش الهوا شو!

القرد والهو وصلو الغابة، وراحو لمكان حتحور، اللي أول مشافت  
القرد تحوتي، قلبت نفسها لصورة اللبوة سخمت، وجريت وراه  
عاوزه تقطعه بسنانها:

- حصل إيه يا حتحور؟ حصل إيه يا أميرة؟ أنا جاي مع  
الهو شو عشان نرجعك لأبوكي وبلدك وقصرك ومملكتك!  
- ياللا يا مستشار السو، موش إنتا اللي دايمن تشاور ل الحقا  
رع بالحكمة والتواضع، عشان كده السفلة اتجراو علينا  
وضاعت هيبة الملك الشمس!

حتحور اللي إتحولت لشكل سخمت، اتهمجت عالقرد توت،  
ومسكته من ديله، ف نط القرد نطة كبيرة سابت حنة من ديله  
بين سنان ونياب سخمت!

القرد تحوتي طلع شجرة كبيرة، وعلا أضعف وأرفع فروعها  
استخبا، عشان يضمن إن سخمت حتا لو طلعت وراه الشجرة،  
موش هتقدر تقف إلا عالفرع الجامدة!

القرد بقا يصرخ م الألم، وينده عالهو شو عشان يلحقه ويغيته!

الهوا شو، نزل عالارض بتيار دوار، طير الورق الناشف ناحية  
وش سخمت، ف غمضت عينيها عشان تحميها، ورجعت خطوة ورا،  
وف لحظة بصت لقت شو إتحول لصورة الأسد نوري!

حتحور إتهزت من شكل وهية نوري، إنما فضلت مرجرة  
وغضبانة ومصممة إنها لازم تقتل القرد تحوتي:

- ده مستشار أبويا، شخص ملوش أي لازمة، ولازم  
أخلص منه دلوقتي، وبعدين انتا جايه معاك ليه؟ كان  
كفاية أوي إنك تيجي لوحداك تبغني برسالة أبويا، مين  
القرد ده اللي هيتوسط بين ملك وأميرة؟
- الحقني يا شو، الحقني يا أمير الأمراء، بقا بدمتك أنا مليش  
لازمة، دا أنا اللي اخترعت الكتابة، وأنا اللي اكتشفت  
التقويم، وأنا اللي بحدد مواعيد الأعياد، وأنا اللي بنظم  
السجلات .. الحقني يا خويا الحقني، غيتني من الأميرة  
الشرانية دي غيتني!

الأسد نوري، نفس فروته، وركز عينيه عند سخمت وقال لها:

- اهدي يا حتحور، انتي أميرتنا، وعندك ضمير وأخلاق  
الأمراء، لازم تحكي عقلك، واسمعي مني الحكاية دي:

- كان فيه زمان أسد، بيملك كل الغابة دي، مفيش أسد لا ف حجمه، ولا ف قوته، ولا ف طول ديله، أو كبر فروته، وف يوم كان نايم تحت شجرة، وحس بحاجة بتقع فوق دماغه، ف اتنفض وصحا!

- مين اللي فزع ملك الملوك ووحش الوحوش، وصحاه م النوم؟

- الأسد بص عال حاجة الطرية الصوغيرة اللي وقعت عليه، لقاها فار، قام داس علا ديله بضوافره وقال له:

- بقا إنتا يا فار يا حقير، اللي تتجراً وتفزعني وتصحيني م النوم، دا أنا هطحنك وأعجنك وأخبزك وأشويك وأقلبك، يا حشرة يا تافه!

- أرجوك يا مولاي الأسد العظيم، أنا صحيح تافه وضعيف، وأكلي موش هيكفي لا فطارك ولا غداك، إنما لو سيبتني أرجع لولادي هكون ف خدمتك يوم محتاجني!

الأسد الملك دحك وجسمه بقا يتهمز من كتر الدحك، وكأنه سمع نكتة، وف دحكه رفع ضوافر قوائم إيديه لفوق، ف فلت الفار وجري بعيد عن الأسد!



- بقا أنا اللي محتاجك إنتا يا فار، دا أنتا موش مكفي ربع  
ضافر من ضوافري، وأنا سيبتك بس عشان موش عارف  
أمسكك بآيه!

- الفار طللع راسه من تحت ورقة شجر كان مستخبي تحبها،  
وقال للأسد:

- يا مولاي، إحنا كلنا مخلوقات ربنا، وكل واحد فينا له  
دور، عالموم أنا عند كلامي، وأول محتاجني سيادتك  
سمعي زئيرك وشخيرك، ها ها أو أو!

الأسد حاول يلحق الفار ويمسكه، إلا إنه فص ملح وداب!

مرت الأيام ودخل الغابة صياد، معاه شبكة كبيرة، نصبها وخبأها  
بورق وفروع الشجر ف حته، وراح يدور علا غداه ف حته تانية!

الأسد الملك داس عالارض، غاص ف كومة الورق اللي الصياد  
مخبي فيها الشبك!

الأسد دخل بأيديه ورجليه جوه الشبكة، وكل ما يحاول يطلع  
نفسه، خيط الشبكة يتعقد ويتلخبط ويمسك فيه أكثر وأكثر!

الأسد صرخ وزأر .. ههههه .. وكان شخر، زاي ما الفار إتوقع!

- الحقوني غيتوني .. الحقو الملك .. غيتو الأسد!

من بعيد إتجمعت كل الحيوانات، خافين من الصياد اللي أكيد  
هيوصل بسرعة، وكان موش عارفين يعملو إيه ف ورطة الأسد!  
شوية ودخل الفار وقال للأسد:

- أنا بمجرد ما سمعت زئيرك وشخيرك جيت طوالي، ههههه!

ضحك الفار ضحكة بينت سنايه اللي كانت شغالة بتقرقض ف خيط  
الشبكة، لغاية ما عمل فتحة خرج منها الأسد!

الأسد بعد ما طلع م الشبكة، وخلصت الورطة، شكر الفار  
وأتأسف له، وقال له كلامك صحيح يا فار، كلنا خلقه ربنا،  
ومأدام سبحانه هو اللي خلقنا يبقى عاوزنا، ونبقا مهمين، وكل  
واحد مننا له دور بيأديه، وميتكبرش علا غيره بيه!

سخرت سمعت من شو حكاية الأسد والفار، وفهمت المقصود  
والحكمة منها، وندهت عالقرد توت ينزل، وقالت له:

- ياللا يا مستشار الغبرة، إنزل إنزل، تعالا إنزل متخافش،  
خلاص أنا راجعة معاكم، بس قوللي أقدر أعمل إيه  
عشان أساعد أبويا، وترجع مملكته زين الممالك، وتبقا له  
هيبه الحق المالك!

## حروان



زنون بعد ما سمع الحواديت راح ف سابع نومة، وسنفر واصل السفر مع جريان مائة النيل، ماسك دفة مركبته وف إيده جبل الشراع، لحد ما سمع صوت زنون اللي صحا م النوم وييشاور ناحية النور اللي يبهرق من بعيد:

- ايه النور ده كله يا خال؟ أكيد ده بان بان مسلة كبيرة أوي!

بان بان مسلة حروان كان بيزغلل عينين الصيادين والبحارة والمسافرين ف المايه، فرحتهم كبيرة بقرب الوصول بعد الرحلة الصعبة، اللي راجع بيته بعد غيبة طويلة، واللي هيزور أهله، واللي هيقتضي حاجة، يبيع أو يشتري، واللي هيعتبر حروان محطة بس، يريح فيها شوية وبعدين يكمل رحلته وطريقه.

مسلات حجر طخانات، وأهرامات حجر مايلات، وقصور وأسوار وبيوت من الطين الني لونها أبيض عالشط، مدينة حروان مدينة

جميلة وشوارعها كبيرة ونضيفة، ومزروعة شجر وورد، والحركة فيها  
كثيرة بتنافس العاصمة مناف!

- واد يا زنون خلاص قربنا نوصل يا واد، دي مدينة حر  
أون، اللي متسمية علا إسم أقدم عواصم الدنيا مدينة  
"أون"، وش أون يعني، أو حروان زاي ما بلدياتنا  
يسموها، انما أهاليها والبحاروة بقو يقولو عليها "حلوان"!
- مادام وصلنا حروان يا واد، يبقا خلاص باقي فرقة كعب  
ونوصل مناف!
- طيب أنا عاوز أكل حطة بسبوسة من بتاعت حروان،  
كانت أمي بتعملها لنا ف البيت وبتقول ان دي البسبوسة  
الحرواني!
- ماشي ماشي، جريت ريقنا ربنا يجازيك، بص كده،  
شايف الست اللي واقفة هناك عالشط وساندة صينية  
البسبوسة عالصور، عايزك تروح تشتري منها حطة بسبوسة  
بسحتوب، أنا عاقرب المركبة منها أوي وإنتا بسرعة تطلع  
تجيب لنا البسبوسة!

زنون بعد ما وصل للحلوانية بتاعت البسبوسة، رجع سند عالصور  
وشاور نخاله سنفر وسأله:

- فيه عندها هنا كمان تحت الصينية خلطة كشري، شعرية بالعدس بالشطة، الصحنين بسحتوب، وبتسألك عاوز البسبوسة بالتين ولا بالجميز ولا بالعجوة ولا بعسل النحل؟ .. أكيد يا خالي بتحبها بعسل النحل زاي أماتي!
- ههههه، ماشي يا زنون عارف يا واد أختي إن مزاجك كده، خلاص هات لنا صحنين كشري، وهاتلي البسبوسة حسب مزاجك بعسل النحل!

سنفر ربط مركبته بجبل بمرسا ف الشط، وطلع قعد مع زنون يا كلو الكشري ويحللو بالبسبوسة، كانوا واقفين جنب الحلوانية بتاعت الكشري والبسبوسة، ساندين عالسور الحجر، اللي يادوب فاصل شط النيل عن سكة البلد.

- ايه يا بلدينا، عجبتك البسبوسة بتاعتنا؟
- تسلم ايديكي يا ست الستات، حاجة حلوة جوي، والكشري كمان عال العال!
- محسوبتك الحلوانية ست الدار، دي صنعتنا اتعلمناها أب عن جد، وأم عن ست، من أيام ما كانت بلدنا حلوان دي عاصمة لمصر كلتها!
- يا سلام، بقا حروان دي كانت عاصمة مصر قبل مناف!

- أيوة أيوة، حلوان دي قديمة أوي، موجودة من سنين  
كتيرة قبل ما الملك مينا يوحد الأرضين ويبنى مدينة مناف  
ويخليها العاصمة!

- منورين حلوان يا حبايبي، ياريت كل ما تنزلو من قبلي تبقو  
تيجو تشرفونا!

زنون بقا كاتم دحكته، كل ما يسمع الحلوانية بتقول (حلوان)  
باللام، وخاله سنفر ابتسم، وقرص زنون ف رجله عشان يبطل  
دحك وقال له:

- ياللا ياللا نشوف مصالحنا ونلحق طريقنا!

فك حبل المركبة، وبص ناحية الحلوانية بابتسامة وداع:

- بعد إذنك يا ست الستات، عشان لسه طريقنا طويل،  
واللقا نصيب، يعني أتمنا نشوفكو تاني بخير ف أقرب فرصة!

## مناف



مسلات كثير نورت، وعزب وبلاد عدت، وكل ما يغلبه النوم،  
أو تخذل إيديه ويقوم عليه التعب، يفتكر مهمته وتجارته وناسه اللي  
سايهم ف البلد، يصحصحه الشعور بالمسؤولية، ويقويه الإيمان  
بالقدر، ويتجدد نشاطه بالأمل!

فجأة بتظهر من بعيد أنوار بنابن مسلات مدينة مناف، عاصمة  
النصر والأفراح، بلد "بتاح"، الكريم الفتاح، بقصرها الكبير،  
وسورها الأبيض الطويل!

دراعين ثلاثة أربعة، بعد ميتقابل الفرع الكبير، فرع الأهرامات  
مع النهر العظيم، ويتحول ونس حركة الصيادين الهادي، لزحمة  
وربكة، حتا دقات ضرب المجاديف اللي كان سنفر وزنون بيدندنو  
عليها، بقت كركبة ودوشة وهيصة، مراكب ف كل ناحية،  
قوارب من كل الأحجام، كبير وصغير ووسط، ولكل الأغراض،  
نقل وصيد وفسحة ومواصلات وحراسة، مراكب أهالي  
ومراكب جيش ومراكب كهنة!

- الحرس هنا بقا واجب، ولا زمن الواحد ينتبه كويس  
ويفتح عينيه أوي!

سنفر كان بيكلم زنون ويفهمه، وبارضو يفكر نفسه وبينبها!  
حركتهم بقت بطيئة وهوما بيتفرجو عالعجايب الكثيرة، ضفة  
الشرق كانت صفوف مباني بيوت وتماسيل وقصور وجناين  
ممدودة، وضفة الغرب جبال وجبانة ومسلات وأهرامات عالية!  
حركة الناس ف الشرق، فلاحين مع بقرهم وتيرانهم وحميرهم ف  
الغيطان، يمحرتو أو يجمعو أو بيعزقو، أو ييسحبو مايه م التربة  
الكبيرة بالشواذيف!

حركة الناس ف الغرب، كهنة وكتبة ومشرفين ومهندسين، عمال  
ونجارين وحدادين وبنائين ونحاتين ورسامين وفنانين، شغالين ف  
تأسيس هرم ل الملك بيبي!

- دي أكبر بلد ف الدنيا يا خال؟  
- عندنا ف قبلي، صوان أبو وطيبة وأيدوس بلاد كبيرة  
برضيك، بس مناف دي عاصمة مصر كتها، اللي بناها الملك  
مينانعرمر!



- تقصد الملك نعمرم اللي وحد مصر كلتها، ياما سمعت عنه ف  
البلد حكايات كتيرة، بس أنا كنت عاوز أعرف معناه  
إسمه إيه؟

- نعمرم، بتنكتب بصورة سمكة النعر، عارفها يا واد؟ السمكة  
اللي بنشوفها كتير ف الماية دي اللي كل شوية تقب وتنط  
وتنعر بصوت عالي، وجب شكل السمكة رسمة منحات المر  
اللي بيرمز للأهرامات، يعني كده الإسم كله (نعر-مر)  
معناه صوت الهرم العالي!

- يعني الملك نعمرم بنا مدينة مناف، وسماها كان؟  
- هوه سماها البناية الجميلة (من-نفر)!  
- طب ليه دلوقتي بنقول عليها مناف؟  
- مناف أو منف، ده اختصار الإسم!  
- مناف اسم الدلع يعني، ههههه!

اتنين من العمال السقاين، كانو واقفين بيروقو مكان ف النهر عشان  
يملو منه مائة للشرب، انزعجو أوي لما قربت منهم مركبة سنفر:

- بلاش عكارة يا جدع إنتا وهوه، يا للا إتحركو بالخنفسة  
بتاعتكو دي بعيد شوية، عاوزين نملا مائه نضيفة، نشرب  
منها ونسقي الناس الشغالة!

التاجر سنفر بلع خشونة كلام العمال، وابتسم لهم وقال:

- يا ألف بركة بالناس الطيبين، لا مؤاخذه أصلنا لسة واصلين  
من قوص قبلي!

السقاين الإيتين اختشو من الشاب الصوغير، اللي أخرجهم بأدبه:

- طب معلهش معلهش، علا مهلك يا بلدينا، بس خد بالك،  
النهاردة مش يوم عادي، دي مناسبة بتعمل من السنة  
للسنة، والإستعدادات ليها بتبقا كلها طوارئ مستعجلة، يبقا  
لازم تلاقيلك مطرح لمركبتك أو مرسا من بدري قبل  
الزحمة، بس ياريت المرسا بتاعك يكون بعيد عن هنا  
خالص وبسرعة، عشان بوكرة عندنا عيد موسم ونة الشبارة،  
والشط كله محجوز والماية هتشغي بالناس، وكل أهل البلد  
هيقوف الماية بيصطادو سمك الشبار!

## ؤنة الشبارة



مع غروب الشمس، سنفر سمع صوت جاي م البربا الكبير، أما  
بص ناحيته لقا إنه شايف كاهن قفاه طويل، لافف وسطه بوزرة  
كّان، وجسمه من فوق عريان، واقف عالسطح، ماسك وزه  
بيطيرها وبينادي بعلو صوته:

- يا وزه ناحية قبلي، قولي ل اللي حتقابليه، ييجي يشرفنا،  
عندنا بكرة عيد ؤنة الشبارة!

وبعدين الكاهن طير وزه تانية وتالته ورابعة، ف باقي النواحي:

- يا وزه ناحية بحري، قولي ل اللي حتقابليه، ييجي يشرفنا،  
عندنا بكرة عيد ؤنة الشبارة!

- يا وزه ناحية اليمين، قولي ل اللي حتقابليه، ييجي يشرفنا،  
عندنا بكرة عيد ؤنة الشبارة!

- ياوزة ناحية الشرق، قولي ل اللي حتقابليه، ييجي يشرفنا،  
عندنا بكرة عيد ؤنة الشبارة!

سنفر سأل الصيادين عن عيد الشبارة ده، ف واحد منهم رد بقرف وترياة:

- ده العيد اللي الصيادين بياخدو فيه أجازة، هأ هأ أو أو!
- أجازة للشعب، عشان يبقو صيادين، المنافين كلاتهم بقو بيصطادو، وبينزلو يجيبو السمك بنفسيم، والصيادين اللي هوما أب عن جد صيادين ولاد صيادين، يقعدو يتفرجو عليهم، يعني نصوع احنا بقا؟

بقية الصيادين دحكو، إنما شرحو لسنفر بهدوء وبالتفصيل، حكاية عيد ونة الشبارة!

- أول يوم من تاني عاشورة، ف شهر بؤونة، كل سنة!
- المنافين يحتفلو بعيد إسمه (عيد ونة الشبارة)!
- أهم حاجة ف حفلة ونة الشبارة دي، إنها صيد جماعي، بنستقبل ونصطاد شبورة سمك الأونة، اللي جاية م الجنوب مع تباشير مائة الفيضان، وبعد الصيد بيتحول الشط كله لحفلة أكل سمكة الأونة (الشبارة)!
- اسم العيد نفسه (بان-ونة)، نسبة لاسم سمكة الأونة، ومعناته إن شبورة سمك الأونة ببيان ويظهر ف المعاد ده!
- سمكة الأونة، هيه نفسها الشبارة؟

- عشان كلمة شبارة من كلامنا الأصلي (شبارت)، يعني سرب أو شبورة!
- منظر شبورة سمكة الأونة، خلانا نقول عليها ال (شبارة)!

صباحية العيد، شكل البلد إختلف، الفلاحين يسرحو بيهامهم للغيطان أو يسيبونها ترعا عالشط قصادهم، وبينزلو بالجوابي، وبالشبك الصوغير، رجالة وستات مشمرين هدومهم، أو قالعين خالص، ونازلين ف الترعة الكبيرة، كل مجموعة بتحوط ف حدود منطقتها، ويستقبلو شبورة السمك اللي جاي، الصيد للكبار، واللعب والبلطة للصوغار، عالشط حلل ومواعين واسبنة مليانة سمك، وأول ما الشمس تحما وييجي وقت الضهر يخلصو صيد ويطلعو م الماية، ووقتها بيتحول الوادي كله ل ناس قاعدين متحلقين حلقات حلقات، حوالين الإفران والكوانين، وسفرة ممدودة ل عزومات أكل الشبار، مشوي ومقلي وطواجن!

سنفر مقدرش يشارك المنافين ف حفلة صيد الشبار، عشان يحرس البضاعة اللي معاه، خد له جنب بعيد شوية، قريب من قصر كبير، شبه قصور الملوك والأمرا!

الحارس بتاع جنينة القصر شاور ل سنفر وزنون، وسألهم:

- انتو سايين اللهمة بتاعت عيد ونة الشبارة وقاعدين هنا لوحديكو ليه؟
- معلهش يا عمنا، أصلنا توك جاين من قوص قبلي، ومعندناش فكرة بالعيد بتاعكو ده، ومعانا بضاعة عنزل بيها السوق طوالي، بعد هيصة صيد الشبار دي متخلص والناس ترجع لأشغالها!
- بس انتا ازاي متعرفش عيد ونة الشبارة؟
- أيوة معرفوش، لأن عندنا ف نفس اليوم (10 بؤونة) عيد تاني، إسمه عيد الوادي (انة)، بختفل فيه بالزهور، وبنزور أهالينا ف الجبانة!
- كمان منقدرش نشوف أسراب وشبورة الأونة دي لا ف قوص، ولا ف قبلي كله، لأن عندنا مائة ترعة حابي جارية وغويطة، ف مبيظهرش فيها الشبار بالشكل اللي أنا شوفته هنا ف مناف، ف نفس اليوم!
- أيوة يا سيدي، ما احنا كمان عندنا بختفل بارضو بزهور عيد الوادي (انة)، بس أما نخلص صيد ونة الشبار، آخر النهار بقا، الناس بتنصف البيوت وبتتشطف وبتلبس الهدوم الجديدة، وبنروح كلنا نزور الجبانة ومعانا زهور السوسن والبردي والفل والريحان والورد من كل صنف، وبكل ريحة حلوة، ومن كل شكل وبكل لون!

زنون عجبته حكاية العيدين اللي ف نفس اليوم دي، ودخل معاها  
ف الكلام:

- يعني عنديكو عيدين ف يوم واحد، بعيدتين .. ههههه!
- أيوة يا صغنون، وكان ثاني يوم هيقا عيد نقطة إزة، يعني  
ضامنين عيدية تالطة للصغنين .. ههههه!

الحارس حسي الجنائي خد نفس طويل، وسرح بعينه ناحية  
السما وقال:

- تعرف يا بلدياتنا لو أنا الملك، كنت أخلي السنة كلها  
أعياد، موش تمانين عيد وبس، لأن الأعياد أحسن وأهم  
اختراع بعد نتيجة السنة والكتابة، النتيجة نظمنا الوقت،  
والكتابة سجلت أفكارنا، بس الأعياد دي ترياق الفرح  
والسعادة، الأعياد هيه اللي بتحسنا إننا عايشين، الواحد  
يحسب عمره بالأعياد اللي يتحتفل بيها، وبعدين الأعياد دي  
عمرها ما عطلتنا عن شغلنا، أهو الواحد بعد ما يخلص  
شغله، يروح يفك عن نفسه ف العيد، يفرح ويتسلا ويغير  
جو، وأهو الناس يشوفو بعضهم ويصفو اللي بيناتهم إن  
كان فيه أي عكارة، ويدحكو وينبسطو، والعيال أهى  
بتهيص وبتفرح باللعب والهدوم الجديدة وكان العيديات يا  
صغنون، ههههه!

- يا سيدي ربنا يكثر الأعياد، ويملا الدنيا فرح وسرور!
- حسي الجنائني استريح للشباب القوسي، ولقاها فرصة يروح يقضي  
طقوس العيد، ويصطاد مع الناس:
- طيب، شوف يا بلدينا، هوه الوقوف هنا ممنوع عشان ده  
حرم جنينة قصر الأمير تتي، انما انتا شكلك شاب كويس  
وابن ناس طيبين، خليك بقا مع بضاعتك ف الحتة دي،  
اركن مركبتك هنا، بس أمانة تخلي بالك م الجنينة  
ومتخليش حد يعدي سورها، عبال ما ألحق أصطاد لي  
شوية مع جماعتنا، عشان آخذ منابي من الشبار، ومتقلقش  
هجيلك منابك لحدك، ومشوي كان، بس خلي الواد  
الصوغنن ده يجي يساعدني، عشان يشيل معايا!
- ياللا يا واد، حب معايا حب، ياللا نروح ال حب!
- أيوة أيوة، خدني معاك ياعم أبلبط شوية، زهقت من  
قاعدة المركبة!
- كده يا زنون، بعني عشان شوية سمك، ههههه!
- حب معايا حب، ياللا نروح ال حب!
- حب معايا حب، ياللا نروح ال حب!
- حب معايا حب، ياللا نروح ال حب!



## مارية



- يا نبيتو، يا اخواتي، يا أهل بيت الأمير تتي، أخو الملك  
بيبي، حامي الديار، عالي المقدار، القائد المغوار، هههههه،  
إنتو فين يا نااااا؟
- بطلي الزيتة بتاعتك دي يا مارية، بلاش دوشة، وبعدين  
إيه اللي إنتي عاملاه ف نفسك ده؟
- دي خلقة أميرة دي؟ قولي لي طايقة ريحتك اززاي؟  
إياكي تكوني روحي الزرية تاني!
- طبعن كنت ف الزرية، أومال هكون فين؟ كنت بنصف  
المكان اللي يجيلنا منه الأكل!
- وهو حد كان اشتكالك؟ ما كل واحد عارف شغلته،  
الفلاح يجيب البرسيم والدرابية والخضرة، والعلاف يجيب  
التبن وقشر البذرة اللي بتاكلها البهايم، والكلاف بينصفهم،  
والحلابة بتحلبهم، وبعدين طواجن الحليب بتتوزع عالطباخين  
والجبانين والخضاضين وبتوع المنفحة والعجانين والحلوانية،  
كل واحد بياخد اللي يكفي شغلته، انتي موش مطلوب

منك غير انك تقعدي أميرة ف القصر، تهتمي بدروسك،  
ونضافتك وشياكتك وبس!

- يا نبيتو يا حبيبتي، أنا מבجش القعدة ف البيت، أنا متعتي  
كلها أما بساعد أبويا وأمي، مجرد مروري عالغيط والجنينة  
والزربية، أو أراجع خيط نسيج الأنوال الجديدة، أو أساعد  
ف تنظيم براىخ النحل اللي ف جنينة غيط البرسيم، بحس  
بوجودي، وكان لازم نقرب من الناس الشغالة، كلنا ولاد  
تسعة يا أميرة النبيتو والمزاج الكويسيتو، ههههه!

- طيب، طيب، مدام بتلسني علا اسمي، خدي عندك بقا...  
يا زيزت يا زيزت، يا زيزت يا زيزت، حد يندهلي عريفة  
القصر زيزت!

- مالك يا نبيتو؟ فيه ايه؟

- موش إنتي كنتي بتدوري علا أختي الأميرة مارية، عشان  
تحفضيها زاي ما بابايا قالك، أهي مارية جت أهيه، تعالي  
بقا استلمها، ههههه!

- طيب يا ستي شوكرن، ومتنسش انتي كمان تسمعي لي اللي  
حفضتيه من نشيد صلاة ستنا أزة، عاوزة أسمع الصلاة دي  
بالكلام والألحان قبل الغدا!

- ايه يا زيزت يا عسولة انتي؟ بقا حببتي زيزت بتسأل عليا؟  
بتنام وبتحلم بيا؟ دايبة ف جمالي؟ طالبة القرب مني ولا  
حاجة يا ختي؟

- بوريه منك يا مارية، بوريه بوريه، بس لو مكنتش بحبك  
زاي بناتي وأكثر، ياللا قدامي يا بت يا أميرة إنتي، غيري  
هدومك دي وإغسلي ونضفي نفسك، عشان تسمعي اللي  
حفضتيه م الإعترافات، قبل ما يجي سمو الأمير، يطين  
عيشتي وعيشتك!

- طيب خوشي معايا الحمام، وقوليها كمان مرة، وبعدين أنا  
هاقولها وراكي، لعلك أنا فاهماها كلها كويس، وطول  
عمري بسمعها وبدرسها، بس حكاية الحفض صم دي هي  
مشكلتي، بس أوعدك بقا المرادي هحفضها صم من أول  
مرة، ياللا قولي بقا وأنا هسمع وراكي زي اللبلة:

أنا لا قتلت ولا حرضت علا قتل حد!

أنا لا انتقمتم ولا حرقت!

أنا لا خووفت ولا أرهبت حد!

أنا لا ضربت ولا عورت حد!

عمري مقصدت أزعل حد!

عمري مقصدت أضر إنسان ولا حيوان!

عمري ما كنت السبب فدموع إنسان!  
أنا لا ظلمت حد، ولا حققت علا حد!  
أنا لا سرقت، ولاخت بالغضب حاجة حد!  
أنا لا باكل أكثر من حاجتي، ولا بمنع الأكل عن حد!  
عمري لا بوظت المحصول، ولا كسرت الشجر!  
عمري محرمت حد من حقه!  
أنا لا بحب شهادة الزور، ولا بحب التزوير!  
أنا لا بكذب، ولا بتكلم وحش عن حد!  
أنا مبوقعش الناس ف بعض!  
عمري ما استغفلت حد!  
عمري ما استحققت حد!  
عمري ما اتنصت ولا اتجسست!  
أنا حقاني، بحب الحق، وبحكم بالحق!

- شوفتي يا زيزت يا بتاعت الأونطة نتيجة الحفض من غير  
فهم، أنا بنت وانتي ست، يبقا نقول أنا حقانية! أنا حقانية!  
نفهم موش نحفض يا ست يا عريفة، ها ها أو أو!

العريفة زيزت كتمت غيظها وكلمت وكأنها مسمعتش ولا كلمة  
من كلام مارية:

مبستعجلش ف الحكم عالناس!  
أنا بحترم المقدسات!  
لا ظلمت عامل ولا قطعت عيشه، ولا حبسته!  
عمري ما غضبت من غير سبب!  
عمري ما عطلت الماية الجارية، ولا قطعتها عن حد!  
عمري ما وسخت الماية، ولا بوظت الأرض!  
بخلي ماية حابي نضيفه، مبرميش فيها حاجة أبدن!  
عمري ما استغليت اسم ربنا، لا ف شغلي ولا ف حياتي!  
أنا لا بحتقر ولا بزعل النطرو الأرباب!  
عمري ما سرقت البرابي بيوت ربنا!  
أنا لا بصرف فلوس بزيادة، ولا بخلي!  
عمري ما طمعت ف اللي عند جاري!  
أنا لا زنيت ولا أغتصبت  
أنا لا بسرقت حاجة الميتين، ولا بستمهم!  
أنا بفتكر المناسبات وبحافظ عليها!  
عمري ما خت ولا بددت فلوس الصدقة!  
أنا لا بمنع ولا بعدل علا حد ف صلاته!  
عمري ما دبحت الحيوانات المتقدسة!  
أنا لا بمكر، ولا بقاوح!  
عمري ما اتعاليت ولا اتعنطظت!

عمري ما اتفشخرت ولا فشرت!

أنا بعمل شغلي أول بأول!

أنا لا بخالف النصوص، ولا بخون العهود!

- بس خليكي فاكرة يا عريفتنا يا شطورة، انك بتقري  
الإعترافات دلوقتي ف الحمام، يعني لو أنا فتننت عليكي للكاهن  
الكبير، معدش هيدخلك البربا تاني، وبدال ما انتي دلوقتي  
كاهنة أوانطة، احتياطية يعني، موش هتعرفي طريق البربا  
تاني!

- تعرفي إنك مليانة شريا بت يا سمو الأميرة مارية، حاسة  
انك نسخة تانية من حتحور، ساعات بتبقي البقرة بت  
الهادية الأمور، وف سانية واحدة بتتبدي وتبقي واحدة  
جبروت أمنا الغولة، اللبوة الشرائية سخمت!

- بقا عاوزة تفتني عليا للكاهن يا مضروبة انتي، عشان بعلمك  
وبحفضك، هوه أنا عارفة الأليكي ف أي حنة تانية؟

- سيبك سيبك، أنا ممكن أفهم، وفاهمة الإعترافات دي  
وكل نصوص وزير وتحتوي وأزة وسيشت، اللي اسمك من  
اسمها، وكل الحاجات دي بتتباع ف السوق، وكتبة القصر  
طول النهار بينسخوها، انما موش ممكن أبدن أقدر أملا مخي  
بالكلام ده، وأسيب جنة ربنا اللي مالية الأرض، بالطول  
وبالعرض، أنا ممكن أحفض أصناف البذرة، أسامي

المحاصيل، ألوان الورد، أعداد الوز والبط والحمام، مواعيد  
هجرة العصافير، إنما النصوص دي متآخذنيش بقا، أفهم  
آه، أحفضها لأ لأ لأ، وألف لأ!

- أنا عارفة إنك شاطرة وفاهمة كويس يا مارية، بس لازم  
النصوص دي تتحفّض يا بنتي، دي موش حاجة بنتسلا  
بيها، دي أخلاقنا اللي عايشين بيها، وهنتحاسب عليها بعدين،  
يوم طلوع النهار، أما تقف كلنا قدام الميزان ف محكمة وزير!  
- ياللا بقا خلصي حمامك، وحصيلني عالقاعة عشان نكتب  
كل اللي حفضناه!

- ماشي يا اسطا ماشي!

- أوسطا؟ آه ياني منك، لو مكنتش بحبك، واضح إن معنا  
اسمك عامل لك حجاب حاميكي، مخليكي محبوبة، وكل اللي  
بيقرب منك يحبك، يا مارية يا مفترية، ههههه!

## سوبك



سنفر شاور ل زنون من بعيد، كان متابهم بعينه وهو ما  
بيصطادو الشبار، بس كان قلقان عالواد وكل شوية يبص عليه  
ويشاورله عشان ميتأخرش مع الحارس حسي، وانه هيستناهم  
لغاية ما يرجعوا، هناك ف ضل شجرة الصفصاف الكبيرة،  
وبالفعل حرك مركبته شوية لغاية ما وصل تحت فروع  
الصفصافة، اللي عاملة زاي ماتكون تعريشة جوه النيل!

يادوب حركة المركبة هديت، ومد إيديه يطلع قصبة الناي، عشان  
يقسم عليه شوية نغم يتونس بيهم، إلا وشاف التمساح العظيم  
سوبك، متمدد بيتشمس عالشط، سنفر اتعررف علا سوبك من  
ديله الطويل، وفكه المخيف، وعارف كان إن التمساح سوبك سوكر  
مبيهاجمش الناس من غير سبب، عشان كده سنفر بدأ يغني ترتيلة  
تبعد عنه شرور التمساح:

مرحباك مرحباك .. يا سوبك النظر الجبار .. يا سندنا ف الغيط  
والدار



مرحبابك مرحبابك .. يا سوبك يا بو التماسيح .. بهديلك، أذكار  
ومديح

مرحبابك مرحبابك .. يا سوبك يا بو النابات .. لك طلعات لك  
هيبات

مرحبابك يا ملك النون .. مرحبابك بكل لون .. مرحبابك مرة  
ومليون

دي الترتيلة اللي سمعها وحفظها سنفر من صياد ف دندرة، ووصاه  
يحفظ تراثيل سوبك، عشان دي اللي هتصونه من غدر التمساح  
المكار، وكان أبوه كان محفظه تراثيل ثانية!

مرحبابك مرحبابك .. احترامك جوه بابك .. آه من ديلك آه من  
نابك

مرحبابك مرحبابك .. لو جيبتي تحت دارك .. أحميها واستحمل  
نارك

مرحبابك مرحبابك .. يا سوبك عارفين مقدارك .. بس ابعد  
ليلك ونهارك

سنفر كان عارف إنه موش لازم يبطل التراثيل ل التمساح، ولازم  
يفضل مصحصح وبكل تركيزه ف حضور الوحش العظيم، ولو

ناوي يبطل يبقا لازم يبعد عن مكان التمساح، وده اللي فكر فيه،  
وبالفعل بدأ ينفذ، بس بمجرد ما مسك مجداف القارب، عشان  
يتحرك، إلا وسمع صوت نبج كلاب، بص ناحية الصوت لقا كلبة  
بتنبح وتجري رايحة ناحية التمساح، وصبية شابة طالعة من جنيحة  
القصر بتجري وبتنادي للكلبة عشان ترجع لها!

يظهر ان الوقت كان فات عالتفكير والحسابات، وبقا مفيش مجال  
ولا فرصة للرجوع، الكلبة إتهورت ورايحة بتجري زاي السهم ناحية  
قدرها، والصبية كان أكيد مسيرها تلاقي نفس المصير لو دافعت  
عن الكلبة!

سنفر إفتكر حسي حارس جنيحة القصر، اللي وصاه عالجنيحة وكأنها  
أمانة عنده، مستناش ولا فكر كثير، عمره ما خلف وعده، ولا  
عمره إتأخر عن نجدة محتاج، خلع فردة م الجداف، وضربها ف  
المائة جامد عملت طرطشة وفرقة، نط م القارب للشط، ووقف  
قدام التمساح، رافع الخشبة وعينه بتطق شرار، خلاص معدش  
وقت لا للغنا ولا للتراتيل، المواجهة حصلت والأدب موش  
جايب أي نتيجة:

- ياروح ما بعدك روح، صحصلي كده شوية بقا يا سوبك،  
يابو عين باردة!

الكلبة لسه بتنبج عالتمساح، إنما بطلت جري، ووقفت جنب سنفر،  
يعني الكلبة بغريزتها قدرت الموقف، وعرفت إن عدوهم هو  
التمساح، دقيقة والصبية لحقت بالكلبة، ووقفت وراهم تسرخ،  
وتنادي عالعمال والشغالين!

التمساح كان قرا الموقف، اتهمز أما سمع طرطشة وفرقة المجداف  
عالماية، كان ثلاثة ضد واحد، والهيصبة دي كلها علا ايه؟ هو  
مكنش قصده أي حاجة، ولا ناوي يعمل حاجة، مجرد إنه كان  
عايز يتشمس شوية، ومفهمش ليه الجماعة دول معترضين، رغم  
انه قبل ما يفرد جسمه هنا شم الأرض كويس، ومكنش فيها  
أي ريحة تحدد صاحب المكان!

علا أي حال، التمساح قصر الشر، زكر براسه الطويلة، مرة شمال  
ومرة يمين، وغير اتجاه ديله، وبسرعة جر ناعم، انسحب ونزل  
غطس ف الماية!

الصبية اللي اسمها "مارية"، كانت بتمشا ف قصر أبوها الأمير،  
بتسمع لنفسها الإعترافات اللي بقالها كتير مش قادرة تحفضها،  
وجفأة من بين الشجر سمعت صوت نباح كلبتها، الأميرة بصت  
ناحية الصوت، وفهمت لما شافت كلبتها اللي كانت بتلعب مع  
جراويها، ظهر لهم تمساح، حاولت تستنجد بالحرس، إنما بصت  
شافت البحار الشاب اللي راكب القارب بتاعه، جري ناحيتهم

يجدف، وأما وصل للشط رفع خشبة المجداف، وضربها علا وش  
الماية لغاية مطرطشت وفرقت جامد، لدرجة إن التماسح سوبك  
خاف وجري نزل إستخبا في الماية.

الأميرة إنبسطت من جراءة وقوة البحار الشهم، اللي واجه التماسح  
لوحده عشان يدافع عن كلبة وبنت ميعرفهاش، قربت منه سلمت  
عليه وشكرته، قدمت له زهرة سوسن، ونادت علا وصيفتها عريفة  
القصر "زيزت" عشان تجيب له كباية كركرية، وقالت للعمال  
والحراس اللي وصلو عالهبهة والصوات والسريخ:

- خلاص خلاص يا جماعة كل واحد يرجع لشغله، البحار  
ده قام بالواجب وزيادة!

الأميرة وهيه واقفة مع الشاب سألته عن إسمه وسبب وجوده،  
والتوقيت المعجزة اللي نجاها فيه من التماسح اللئيم، الشاب شكر  
ربنا اللي خلاه يكون موجود في الوقت ده، وقال للأميرة إن إسمه  
سنفر وهوه جاي من مدينة قوص، بيع سمس ودوم وخير ربنا  
اللي بيطلع من أراضي الجنوب، وحسب اللي بيطلبه مني أهالي  
البحاروة، من أقواس وسهام وقماش، وانه تكان يشتري وبيبيع  
تكان، وانه لقا المكان جنب سور القصر هادي فوقف بمركبته بعيد  
عن هيصة الصيادين، مستني وصول ابن اخته من ونة الشبار!

الأميرة قالت للعريفة زيزت:

- شوفي كده القماش اللي مع التاجر الشاب ده، أكيد هيعجبك حاجة منه نشترها للقصر؟

العريفة قلبت ف البضاعة اللي ف مركبة سنفر لحد ما شافت توبين كنان شفاف مشغولين بالذهب:

- ياه دي حاجة حلوة أوي أوي، أحسن قماش شوفته السنة دي، دول توبين حلوين ينفعو يا سمو الأميرة فساتين جميلة ليكي وللأميرة نبيتو!

العريفة اشترت التوبين الكنان الشفاف للقصر، ومن غير ما سنفر يحدد التمن، مدت الأميرة إيدها ف شنطة العريفة طلعت صرتين فضة كبار، وناولتهم ل سنفر:

- دول كتير كده يا سمو الأميرة!

- لا لا لا مش كتير ولا حاجة، كفاية انك وصلتهم هنا لباب القصر، الحاجات الغالية المخصوص دي كنا بنبتع ناس تسافر عشان تلاقي اللي يليق بالقصر وتلف ف البلاد أيام وعاشورات ما بين سيوطي وديروطي لأنحمين وبهنوسا!

شوية ووصل الحارس الجنائي حسي، ووراه زنون شايل شيكارة  
فيها سمك شبار!

- أنا آسف يا سمو الأميرة، أصلي كنت سمعت خشخشة  
كده جاية من ناحية السور الثانية، قلت أشوف يمكن  
يكون هناك حرامي ولا حاجة!

طبعن الحارس حسي الجنائي كان بيكدب ويحاول يداري عملته  
وغيابه عن مكان نوبته وحراسته، وإنه ساب مكان شغله وراح  
يصطاد الشبار!

سنفر ابتسم وبص لابن أخته:

- اتأخرتو كده ليه يا زنون؟  
- ولا اتأخرنا ولا حاجة يا خالي، يا دوب اصطدنا شوية  
الشبار دول بس، ولما سمعنا الهيصة هنا عم حسي قال  
كفاية كده وياللا نشوف إيه اللي يحصل ف جينة القصر!

الأميرة بصت ناحية الجنائي حسي، وقالت له:

- ياه كل اللي ف الشيكارة دول حرامية يا حسي؟ والواد  
الصغنون ده هوه اللي مسكهم كمان، طيب يا حسي طيب،  
أما بس ييجي سمو الأمير هاخليه يحاسبك كويس!

- سامحيني يا سمو الأميرة، أنا صحيح رحت أصطاد شوية  
عشان خاطر الواد الصغتن ده، بس أنا كنت سايب مكاني  
راجل، مش كده يا بلدياتي؟
- كده يا حسي كده، معلش أستأذنكو أنا عشان لسه  
هنطلع السوق نبيع البضاعة اللي معانا!

الأميرة مارية حطت ايدها علا راس زنون وهيه باصة ناحية سنفر  
وقالت:

- يعني خلاص مش هنشوفكو تاني؟
- لأ أزراي، سموك تؤمرينا، احنا بعد ما نخلص أشغالنا، حا  
نبقا نيجي نطمن علا حسي كل يوم ف نفس المعاد!

الأميرة وشها اتغير، بقا لونه أحمر، ابتسمت أما سمعت كلام سنفر  
المباشر، وبصت لحسي الجنائي وقالت:

- بلدياتك دول يا حسي اتصرفو بشهامة، نجدونا م التمساح،  
ولازم نشكرهم كويس، ومادام بلدياتك مهمين أوي كده  
وكنت مستأمنهم عالقصر ف غيابك، يبقا لازم عالأقل  
تضيفهم ف أوضتك طول فترة وجودهم ف مناف لغاية ما  
يخلصو مهمتهم ويسافرو، ولا عاوزني أقول للأمير عشان  
يشكرهم ويضيفهم هوه بنفسه؟

- لا يا سمو الأميرة، ف عرضك بلاش سمو الأمير ياخذ خبر،  
وأنا ليا الشرف إن الشاب الشهم ده وابن أخته يباتو  
عندي، أهو يسلونى بارضو!

كان ده أحسن حل عشان سنفر يلاقي مكان كويس يبات فيه  
بالليل ويربط قاربه بأمان، وبالفعل بقا ينزل سوق مناف مع زنون  
يبيعو ويشترو، وكل يوم ف نفس المعاد، كان سنفر يجدف  
بالقارب ف النيل، ويروح يرسي تحت شجرة الصفصافة الكبيرة،  
والأميرة "مارية" لما تشوفه تبسم وتشاور له، وساعات تروح تقابله  
وتتكلم معاه لحد ما قلوبهم اتعلقت ببعض.

خلاص المهمة قربت تنتهي، والبضاعة اتباعت، وكان سنفر اشترا  
طلبات أهله وجيرانه، يعني بقا جاهز عالسفر، بس قلبه كان انشغل  
بمارية، وبقا عايز يشوفها ف كل وقت، وعايز يتكلم معاه ف أي  
حاجة ولأي سبب!

ف الليلة اللي قبل ليلة السفر مجلوش النوم، بقا قلقان وحياران، بص  
ل اللي معاه ف الأوضة، حسي وزنون، لقاهم كل واحد منهم رايح  
ف سابع نومة، أحلام وهمهمات زنون بصوت مكتوم، وشخير  
ونهجان حسي العالي، قام خرج وقف بره الأوضة، باصص  
عالسما، سرحان ف ضي النجوم، اللي كان شايف مواقعها وعارف  
معظم أساميها نجمة نجمة، الضي الكبير لنجمة السنة اللامعة زبدة،



ونور الوناسة النونو للنجمة جنوغة، وملايين من نجوم ال ضيا،  
فرداني ومجاميع، بينهم نجوم رش السما ونجوم سلاسل الصبا  
والساح ونجمة الصباح!

مش بس سنفر اللي كان سارح مع النجوم ف طرف جنينة القصر  
قدام أوضة الجنائي، كان من الطرف الثاني كانت الأميرة مارية  
فاتحة شباك أوضتها وسارحة بارضو ويا النجوم!

الصبح مع شأشأة النهار، وزقزقة العصافير قبل ماتطير، مع صيحة  
أول ديك، نزلت مارية زاي عادتھا تصحي عمال الزرية اللي  
متأخرين ف النوم، عشان يقومو يشوفو أشغالهم، ينضفوا ويحلبوا  
ويعلفوا ويسقوا، قبل ما أي حد من سكان القصر يصحوا، بس لأنه  
يوم جديد بإحساس وشعور جديد عليها، سابت طريق الزرية  
ومشيت من ناحية أوضة الحارس حسي الجنائي، وهناك شافت  
سنفر كان لسه قاعد قدام الأوضة، ساند ضهره علا جذع شجرة  
وماسك ركبہ بإيديه الإنتين، رافع دقنه باصص لفوق وسرحان!

- يا صباح الخير يا اللي معانا، واضح انك ما نمتش كويس!
- تكونشي فرشة النوم اللي عند حسي مش مريحاك؟
- يا صباح زهر السوسن الراق، لالالا الملايات والمخدرات  
والفرشة اللي إنتي بعتهالنا طرية ومكفية وكل حاجة عال،  
بس الصراحة إني ما عرفتش أناام خالص الليلة دي!

- ليه بقا؟ عشان بتفكر ف السفر؟
- أنا فعلن بقيت جاهز للسفر، بس مش عايز أسافر وأسيب قلبي هنا معاكي!

مارية اتخضت واتلخبطت وبقت مش علا بعضها، عينيها بتبرش، قلبتهم بين الأرض وبين سنفر، لفت وشها شمال ويمين، ومش عارفة تتلم علا روحها:

- يا خبر! انتا كمان كده، ده أنا طول الليل بفكر ازاي إنك هتسافر ومش هشوفك تاني، انتا بقيت قريب مني زاي ما يكون اللي بينا معرفة وعشرة سنين ... أأأأأ ... معلش لازم أمشي عشان أروح أصحي العمال وأشوف أحوال الزرايب!

سنفر لحق الأميرة قبل ما تمشي، وقال لها:

- اسمعي بس، عاوز أشوفك تاني قبل ما أسافر، عشان خاطري لو ليا خاطر عندك، فيه كلام كتير عندي عاوز أقوله لك!
- خلاص قبل غروب الشمس بساعة، نتقابل هناك عند صفصافة الشط!

سنفر راح جهاز بضاعته ف المركبة، وقبل الغروب راح وقف جنب شجرة الصفصاف مستني مارية، قلقان مش عارف هيقول لها إيه، وهيوصل معاها لإيه، هيه أميرة بنت أمير وهو تاجر فلاح ابن فلاح، وبقا يلوم نفسه ويأنبها:

- ليه بس يا قلبي تتعلق بحاجة عليوي أوي كده؟

في المعاد، من بين الفروع والجدائل الطويلة اللي نازلة من شجرة الصفصاف، مارية مدت إيديها بشويش وخبطت علا كتف سنفر اللي كان ساند عالشجرة وسرحان بيقلب ف حكايته مع مارية بينه وبين نفسه!

مسك ايديها وشدها عليه، واثبتو هوما الإيتين ف جزع الشجرة، كأنهم جزء منها:

- أنا حبيتك أوي يا مارية، ومش عارف أسافر وأسبيك كده من غير ما أقولك إني بحبك، أنا حاسس ان حتحور اختارتنا لبعض، بس ازراي؟ إنتي أميرة وأنا فلاح!

- مادام حتحور هيه اللي اختارتنا لبعض يبقى مفيش حاجة هتفرق بينا، والحب مبيفرقش بين أمير وفلاح، كلنا ولاد السما والأرض، نوة وجب، شوف بقا أنا دلوقتي لازم أدخل القصر، عشان زمان أبويا الأمير رجع من مجلس


الحقا وأول حاجة يعملها أما بيدخل البيت انه يسأل عليا،  
عشان عارف إني دايم بسرح ف الجنينة والزريبة مع  
الفلاحين والجنينة والعمال، ومادام انتا خلصت شغلك  
وبعت بضاعتك ولازم تسافر الصبح مع شروق شمس رع،  
يبقا لازم نقعد مع بعض شوية عشان متنسائش بسرعة،  
الليلة دي نقضيها سوا تحت جميزة شونة القصر، هناك جمب  
الزريبة كان ساعتين!

- أنساكي اززاي بس؟ دا انتي بقيتي ف قلبي وف كل كياني،  
هستناكي ف المعاد يا أحلا وأجمل وردة نورت حياتي زاي  
ما نور رع بيملا الكون!

- ياسلام ياسلام عالكلام الحلو اللي بينقط عسل، ياللا  
متأخرش بقا!

مارية قبل ما تمشي وتسيب سنفر، شبت علا طراطيف رجليها،  
وطبعت بوسة علا خد سنفر وراحت تجري ناحية القصر!

## ناهية



ف المعاد وصل سنفر، مع ضلمة الليلة اللي كانت من غير قمر، تحت  
الناهية، اللي هيه شجرة الجميزة، مكانها ورا زريبة البهايم، سنفر خد  
له مكان وقعد وسط كومة قش مغطية جدر الشجرة، يادوبك  
نزل ف القش، إلا وسمع دحكة مكتومة، بص ناحية صوت  
الدحكة، لقا حبيبته مارية حادفة نفسها عليه، وبالنشان والمقاس  
المضبوط، راسها جوه صدره، وإيديها حوطت راسه، وصوابعها  
بقت بتلعب ف شعره!

دقايق متعة اللقا روت الشوق الطويل، صحيح ساعات الدقايق  
بتساوي سنين!

- وحشتني يا سنفر، ولا أقولك يا سنسن!
- وحشتيني يا مري!
- اسمي مارية، مين بقا مري دي!
- انتي بتدلعيني بسنسن، وأنا بدلعك ب مري!

- مارية يعني حبوبة، وانتي حبوبة فعلن، وأي حد يعرفك لازم يحبك، انما مري يعني الحب، كل الحب، وانتي بقيتي عندي بكل الحب اللي فآكون!
- لالا لالا لالا، عشان كلامك الحلو ده، انتا كده تستاهل مليون بوسة!
- طيب اديني بقا شوية م المليون بتوعي دول، ههههه!
- اتقلبو جوه القش شمال ويمين، غطسو مبقوش باينين، دقائق بملايين السنين!
- مارية مدت ايديها، من الأرض عند جدر السجرة، نقت تينة جميز مفتحة، نضفتها بإيديها، وقربتها من بوق سنفر!
- كل حطة، وسيب حطة!
- هم هم، ههههه!
- الدحكة كانت مالية وش مارية، وهيه بتمد إيديها وبتجيب كان واحدة، وسنفر خدها فرصة يقرب منها، نفخ فيها طير القش اللي علا تينة الجميزة!
- كده كلت الجميزاية كلها، أنا كنت عاوزة آكل من نفس مكان ما بتاكل!
- طب خدي حطة منها، واديني حطة!

- لا يا حبيبي بالهنا والشفاء، خدّها انتا كلها، هم هم، ههههه!  
بعد ما قربت الجميزة من بوق سنفر، خطفتها ودفستها فبؤها!  
سنفر مد إيديه، وجاب لها مكان جميزاية، وصمم إنها تاكلها،  
وضحكو كثير!

- كفاية كده النهاردة، أحسن حد يحس بينا!  
- متقلقش أنا محددة المكان ده كويس، دي حتي  
ومنطقتي، أنا اللي بشرف عالزريبة بنفسي، عارفة كل حاجة  
هنا، كام بقرة وكام جاموسة وكام تور وكام حمار، كام  
فلاح وكام كلاف وكام حلاية وعلافة وسقاية، وأنا اللي  
بحدد لهم حركتهم بالدقيقة وبالسانية، مين يروح فين ومين  
يعمل ايه!

- شوفتي أدينا دخلنا ف حاجات بعيدة عن لحظتنا الحلوة  
دي، ههههه!

- طب قوللي، ايه اكرت حاجة عجبتك فيا؟  
- كل حاجة فيكي جميلة، ومقدرش أقول عن حاجة واحدة  
بس، لأن قلبي هوّه اللي أمرني أحبك، وحتا لو مكنتيش  
حلوة، مادام قلبي حس بيكي يبقى مش هب غيرك أبدن!

- يا خبر علا كلامك الحلو اللي بينقط عسل ده، بس بارضو  
عاوزاك تجاوب علا سؤالي، عايزة أعرف اللي جواك، قول  
بقا اللي عجبك فيا بجد!
- بجد إنتي أجمل وأحلا واحدة شوفتها وحسيت بيها، إنتي  
أول حظي، من أول ما إيدك لمست إيدي بزهرة السوسن  
كل حاجة فيكي بقت حبيبتى، يعني إيديكي حبيبتى،  
عينيكى حبيبتى، شفايفك حبيبتى، خدودك حبيبتى، ..!
- أيوة بس انتا بتهرّب م السؤال، ومجاوبتش بكلامك الحلو  
اللي يستاهل كمان مليون بوسة، أمممممممو!!
- طب، بلاش أنا، قوللي أكثر حاجة بتعجب أي راجل ف  
الست اللي يحبها؟
- روح الست، هيه أهم حاجة، الكا هيه الفكر والخيال،  
حاجة محدش ييشوفها انما بنحسها، وهيه اللي بتقرب الناس  
أو تبعدهم عن بعض!
- يا خويا يا حبيبي، أنا مبسألش عن الكا والبا، أنا سؤالي  
بالتحديد عن ال (جت)، ايه اللي بيعجب الرجالة ف شكل  
وجتة الست؟ عينيها؟ شفايفها؟ ايديها؟ شعرها؟ رجليها؟  
وسطها؟ بطنها؟ زهرها؟ قصدي كده بالتحديد!



- معلهش أنا عايزة أعرف، لأن مقدرش أسأل السؤال ده لأي حد، دلوقتي إتنا الراجل الوحيد اللي أقدر أقول له كل اللي جوايا ومنكشفش!
- أنا فرحان أوي بيكي يا مارية، ومش مصدق إني معاكي، حبك ليا ده خلاني أحس كأني وصلت للسما وماسك النجوم كلها بإيديا!
- طب، طب طب جاوب بقا!
- عينيها؟ ولا شفايفها؟ ولا شعرها؟ ولا رجلها؟ ولا لبسها؟ ولا ريحتها؟
- كل الحاجات دي مهمة، وبيتعمل منهم خلطة، بتكون الشخصية اللي ممكن يحبها الراجل ف الست و كان اللي ممكن تحبها الست ف الراجل!
- موش عارفة أوافقك ولا لأ، عمومن ده رأيك، ومتشكرة انك قولتهولي، بس أنا كنت حاسة انك موش مجرد فلاح يجيب بضاعة م الجنوب ويبيجي يتاجر بيها وبس، كلامك ده كأنك كاتب أو كاهن بتقرأ الكتب، وعندك معارف تحوتي وامحتب، يعني انا أما بتكلم مع فلاحين وعمال زريبة القصر، بحس بالفرق اللي بيني وبينهم، نتيجة القراءة والكلام مع الكتبة والكهنة، معاك موش حاسة بأي

فرق، بالعكس حاسة انك سابقني ف حاجات كثير، قوللي  
معارفك دي خدتها منين؟

- أبويا فلاح وزيري، بيعمل حضرة ل وزير كل سبت  
عاشورة، ويبيجي المداحين يسهرو ويتكلمو عندنا ف البيت،  
وبسمعهم وهو مأ يحكو حكايات وزير واست وآتوم ورع  
وتحوتي، واتعلمت القراءة والكتابة ف البربا، وكان اتعينت مع  
كهنة الأونطو، الكهنة الأوانطة يعني، اللي بيشتغلو ف  
البرابي وقت المواسم والأعياد بس، أما معارفي الحقيقة ف  
خدتها من السفر، مشاهدة الأماكن ومعاملة الناس!

- كفاية كده يا حبيبي النهاردة، مركبة الشمس قربت تظهر  
وتدخل ف السما، وهيسألو عني، عايزة قبل ما أسيك أبقا  
متطمنة عليك، خد بالك من نفسك ومن بضاعتك الغالية  
دي ومن زنون كان، بس لازم توعديني إني هشوفك تاني  
إمتا؟ وإزاي؟

- من النهاردة بقالي هدف كبير، وهو القرب منك، ولو  
ينفع هاروح الصبح أفتح سمو الأمير بإني معجب بيكي  
وعايز اتجوزك!

- لا يا حبيبي مش هينفع كده، انتا تسافر بالسلامة، وأول  
ما تقدر ترجع تاني، هكون شاورت أختي الكبيرة نبينو  
والوصيفة زيزت أمينة السر بتاعتي، ولو ينفع تتقدم للأمير

هقولك المكان والوقت المناسب، ما إحنا لازم نستعد  
كويس وندرس أي خطوة بخطيها، زاي ما اتعلمنا ف  
البرابي من كهنة تحوتي والكاهنات السيشتات!

- طيب، هوه أنا لازم أرجع قوص عشان أحاسب صنايعية  
الأقواس اللي ليهم حساب عندي والناس اللي ليهم تمن  
بضاعة، وكان عشان أسلم الحاجات اللي الناس طلبوها مني  
هناك، وأشتري بضاعة جديدة أرجع بيها، بعد ما أحضر  
أربعين أختي ستوتة، ربنا يرحمها، وبعد الأربعين أرجعلك  
علا طول، واللي توصلي له بعد مشاورة أختك ووصيفتك،  
هنفذه علا طول.

من طلوع الشمس كان سنفر وزنون راكبين ف المركبة، بعد ما  
ودعو حسي وشكروه الضيافة!

حسي فك لهم جبل المرسا، وسنفر عشان يحرك المركبة جدف  
شمال ويمين لغاية متعدلت المركبة ف النيل، وقبل ما يفوت حدود  
أرض القصر، لقا حبيبته معاها إثنين من الستات السقاية، واقفين  
بيوردو البهايم عشان تشرب من ترعة الأهرامات، كانت مارية  
سائدة علا ظهر شابة بقر صفرا وايدها اليمين فوق راسها زاي ما  
تكون بتشاور وهيه باصة عالمركبة بتفارق!

سنفر فضل باصص علا مارية وحاطط ايده علا سدره ف وضع  
السلام، وييتكلم:

- وجه الدفة كويس يا زنون، ياللا عاوزين نساfer لبلدنا بسرعة  
عشان نلحق نرجع هنا ثاني!

قبل ما المركبة تسيب فرعة ترعة الأهرامات وتقبل ناحية الجنوب  
ف بحر حابي الكبير اللي كل شوية مايتة بتعلا وبتزيد، قطف من  
جنب الشط زهرة سوسن زرقا، جسدت صورة حبيبته ، روح  
حية وريحة حلوة، بقا سامع دقات قلبه بتزيد، ولقا نفسه بيغني  
موال الزهرة البراوية.

آه يا زهرة براوية، نبتت فينا الآمال

شادة عودها بعرق مادد، شققت صخر الجبال

شمس دافية وماية حلوة، عيشة يرسمها الخيال

يقطفوها تقب ثاني

يقطعوها ترد ثاني

والي تبنيه ف الليالي، ياخده منها الغدر ثاني

يسألوها الصحة إيه؟ تقول تمام!  
يسألوها عاملة إيه؟ بارضو تمام!  
طول ما هيه العيشة جاية، يبقا دي أرض السلام!  
أدي للناس ريحة حلوة  
أبقا باللون لوحة حلوة  
أسمراني وأبيضاني وأخضراني، كل لون يتغنا غنوة!  
آه يا وردة حلاونية، آه يا آية م الجمال  
مهما طال الليل عليكي، تفضلي نول المنال  
فرجة هايلة، وصورة خائلة، شمة منها وأبقا عال

## سبوع



بمجرد ما وصلو بهنوسا، سابو المركبة أمانة عند واحد مراكي من معارف بانوبي نسيدهم، وراحو لبيت ستيتة وبانوبي وسمرو وسميرو!

سنفر خد معاه هدايا فرحة سلامة أخته وسلامة المولود الجديد، اللي كان مجهزهم وعامل حسابه عليهم وهوو ف مناف، شمع ألوان وملبس وحلاوة نداغة للعيال، وكيس خلطة السبع حبوب بتوع السبوع، قمح وشعير وفول وحمص وعدس ورز وحلبة!

أما زنون ف كان جايب معاه هدية لوحة خشب صغيرة متلونة بشكل المربعات، مع علبة فيها قطع خشب نحتها بنفسه للعبة السنة، عليها رسومات رع وتحوتي وهوما يلعبو لعبة السنة، هدية لاولاد خالته، سمر وسميرو!

ف الشارع اللي فيه بيت أخته، زنون لمح سبع بنات لابسين لبس شكله ولونه واحد، مبيشوفهوش إلا عالكهنة اللي بيدشغلوه ف البرابي، كانت البنات طالعة من باب البيت بيدحكوه، وكل واحدة شايلة ف إيديها لفة!

- بركة قومتك بالسلامة يا ستيتة يا ختي!
- بركة رجوعك بالسلامة يا اخويا يا حبيبي، ازيك يا سنفر،  
وازيك يا زنون، وحشتوني كثير يا ولاد، وحشتوني يا  
حبابي، لساكو واصلين وجايين دلوقتي؟ يعني هبابة وكان  
هيفوتكو السبوع!
- معلهش يا ختي اتأخرنا يوم واحد ف طلعة ترعة حابي،  
المراكب كانت كتيرة أوي وزحمة من مناف لحد حروان،  
يا دوبك فلتنا وقبلنا علا طول، بس بس بس سمع  
هوووس، مين القمر اللي منور الدنيا ده، مين الجميل اللي  
انتي شايلاه ده؟
- دي بنوة قمرية واسمها سنفرة، سميتها علا إسمك يا غالي  
عشان تبقا معايا طوالي، أديني يادوب كملت سبعتيام من  
ساعة ما ولدت، ولسه بنات البربا التحتورات ماشيين من  
عندنا دلوقتي!

زنون كان ماسك ايد النونو الصوغيرة، وسأل خالته:

- ودول كانوا بيعملوايه هنا؟ هوما اللي جابو سنفرة عاد؟
- ههههه إيه يا واد يا زنون لساك صغنون ما تعرفشي؟ سنفرة  
بنتي يا واد ولدتها من بطني، بس السبع بنات دول، يبيجو  
م البربا عشان يكشفو عالمولود، وساعات يخذوه معاهم لو

محتاج رعاية ف الماميزي بتاعت البربا، بيت الولادة والمواليد  
يعني، بيدشوفو صحته ونضافته ولبسه، ويتأكدو من سلامته،  
ومن نظام رضاعته، وبعد كده أكله وشربه وعلاجه،  
وييسجلو اسمه وتاريخ ميلاده واسم أبوه وأمه وعيلته كمان،  
سبعتيام كل حتحورة منهم تراعيه مدة نهار كامل، وف  
اليوم السابع يجو ياخدو هديتهم، شوية من السبع حبوب،  
عشان كل واحدة منهم بتحب نوع معين من الحبوب دي،  
بس بياخدوها مش مخلوطة، كل نوع ف لفة لوحده،  
ويفرقوها بينهم، وكويس إنكو جبتو معاكو كمان السبع  
حبوب المخلوطين دول، عشان الحتحورات خدوم اللي  
كان عندنا، وبكده يبقو خلصو شغلاتهم وانتهت مهمتهم،  
يخلو بقا مسئوليتهم، وتبقا الأم هيه اللي مسئولة عن  
مولودها، وأنا اطمنت منهم علا صحة وسلامة سنفرة بنتي،  
أما كشفو وشافو ودانها وعينها وايديها ورجليها وعظمها،  
واتأكدت إن كل حاجة تمام التمام، زاي أتوم بدر التمام،  
ببركة تاورة وحقا وبهمة ونشاط السبع حتحورات،  
عشان كده بقا خد معاك يا واد يا زنون الغربار اللي هناك  
ده ف إيدك، وتعالو يالالا اسبقوني عالفسحة بتاعت البيت،  
هناك جيراننا وعيالهم ملهومين عشان ندق الهون ونغني  
لسنفرة ف حفلة السبوع بتاعها.



حلاقاتك برجالاتك  
هنحط الحلقة ف رجلك  
حلاقاتك برجالاتك  
حلقة ف ودانك وايدك  
حلاقاتك برجالاتك  
ذهب وفضة ما يغلو عليك  
حلاقاتك برجالاتك  
نورت وشرفت البيت  
حلاقاتك برجالاتك  
ياللا اكبر واسبق عالغيط  
حلاقاتك برجالاتك  
راقينك رعيت وتاييت  
حلاقاتك برجالاتك

يا قلب أمك يا عين أبوك

حلاقاتك برجالاتك

ولاد عمك يهشتكوك، وولاد خالتك يدلعوك

حلاقاتك برجالاتك

بيتك عزك، أهلك سندك، كل الناس يحبوك

حلاقاتك برجالاتك

حلاقاتك برجالاتك

حلاقاتك برجالاتك

سنفر وبانوبي فضلو واقفين قدام البيت يبسلمو عالمعازيم  
ويودعوهم، الأهل والجيران وعيال الحتة، والناس اللي جت تهي  
وتحتفل بسبوع سنفرة، لغاية ما بقولو حديهم، بانوبي قال لسنفر:

- ياللا يا واد خالتي تخش تريج شوية، زمانك تعبان اياك!
- تعبان صح يا خوي، بس التعب لا ف ايديا ولا ف رجليا،  
التعب جواني يا بانوبي، أنا بس عاروح أقعد أتكلم شوية مع  
اختي قبل ما نسافر، عشان عايز أتشاور معاها ف حاجات

شغلاني أوي وتعباني أوي، وهيه بقا ستيتة بعد كده تبقا  
تقولك يا خوي!

ستيتة عدلت نفسها ف دخلة سنفر عليها، وقالت له:

- مالك يا حبيبي، وشك متغير السفره دي ليه، مالك  
سرحان علا طول ف إيه؟ إيه اللي شاغل بالك يا خوي؟  
إياك تكونش عاوز تتجوز يا واد؟ ألف مين تتمناك يا حبة  
عين اختك، بس شاور إتنا عالي تعجبك!
- العجيبة يا ستيتة يا اختي إن فراستك ونباهتك دي ملهاش  
زاي، إنتي كأنك نشنتي بالسهم ونشانك طلع مضبوط، أنا  
بالفعل بالي مشغول، بس مشغول بواحدة مش من هنا  
خالص ولا حتا تعرفيها، قلبي مشغول بواحدة آية ف الجمال  
والذوق، بس المشكلة إنها مش من توبنا يا ستيتة، دي  
أميرة بنت أمير، ساكنين ف مناف وعندهم قصر كبير!
- يا حسرة قلبي عليك يا خوي، وبركة رع ووزير إتنا عندنا  
أهم من أكبر ملك وأحسن من أي أمير، بس الماية ما  
بتطلعش ف العالي يا واد أمي وأبوي، أقول إيه بس، طب  
ياللا احكي بالتفصيل عن كل حاجة من ساعة ما سبتنا  
لغاية ما رجعت بالسلامة، عشان أقدر أفيدك وربنا العالم  
بالحال، يسهل الصعب ويروق البال!

سنفر حكا لأخته كل اللي حصل من ساعة ما سابها ف بهنوسا،  
والعهد اللي بينه وبين مارية، من إنه يرجع لها ثاني ف أسرع وقت  
بعد ما يتحضر أربعين أخته ف قوص، علا ماتكون هيه كان  
إتساورت مع أختها ووصيفتها!

ستيتة بصت للنونو سنفرة، اللي كانت فاتحه بؤها وبتقلب  
وبتدحك وهيه نايمة، دحكت ستيتة هيه كان ووشها إتملا بالرضا  
والسرور وقالت لأخوها:

- عارف يا واد يا سنفر المثل اللي بيقول: "خدو البشارة من  
وشوش البكارة"، أهى البراءة والبكارة قالت كلمتها  
خلاص، شوف دحكة سنفرة دي بعد ما خلصت  
كلامك؟ مقضية يا خويا مقضية، ببركة بتاح ووزير، وكل  
نظر ونذير، هتنول غرضك وهيلا مقامك عشان تطول  
العالي كله وتقطفه بايديك، اسمع مني وافتكرك كلامي  
كويس، بس أما تروح بلدنا بالسلامة تشاور أبوك، دا  
حافض كلام وتراتيل الأرباب، فكره كثير وقلبه كبير، أنا  
وأختك المرحومة ستوتة كنا أما ننوي نعمل أي حاجة،  
كانت أمنا تقول، اسندي حملك عال كبير يا بتي، شاوري  
أبوكي، شاوري عطفي حبيب وزير، فكره كثير وقلبه كبير!

سنفر بقا مرتاح بعد ما اتكلم مع ستيتة أخته، والحمل اللي كان  
شايله خف، الغمة راحت، والأمني والآمال اتجددت، نده  
زنون، وودعو بهنوسا وأهلها، وركبو مركبتهم فاردين شراعها  
ومقبلين عكس التيار ف ترعة حابي الكبيرة، قاصدين الكريم،  
راجعين بلدهم قوص!

## أربعين



صوان كبير منصوب قدام بيت عطفي، صاحب حضرة وزير،  
عالجانين صفين كنب خشب مرصوصين بنظام، قاعدين عليه  
الأهل والجيران، وبينهم كاهن أوانطة عجوز كان بيرتل ترتيلة  
الأربعين، وشرح لهم إيه اللي يحصل للميت من ساعة تغسيله  
ودفنه لحد يوم الأربعين:

- بركة وزير، وهمة حور الصقر العالي، التور القوي، وببركة  
قرونه المدببة اللي فوق راسه وجدایل شعره المعمولة من  
الفاروز البكر الطاهر!
- يا كل الأرواح الكبيرة الصاحية، إعلموا إن الأوزيرة ستوتة  
بنت حصّة، مرت روحها من هنا بسلام، الحق منور  
قورتها ف الليلا دي، ليلة طلوعها وعومها ف النهر العظيم!
- الليلة دي، ليلة الأربعين، بركة رع ووزير عيتجدد شبابها  
وعتبقا روحها باقية معانا شايفانا وسمعانا، منورانا ومآنسانا،  
طول ما رع ووزير باقين!

- الليلة دي ليلة الأربعين، عتفضل روح ستوتة بنت حصة  
طايرة حوالينا، مفوقانا ومنعشانا بريحة السوسن الطاهرة،  
الوردة اللي فتحت بنور رع!

- خلاص وصلنا لليوم الأربعين، بعد ما اتمتعت الجتة بحماية  
أسية ونبية حوة ونية وسركة، الربات النظرات النذيرات  
اللي يحمو الجتة أربعين يوم، كل واحدة منهم بتحرسها وتحميها  
مدة عشرتيام، يعني عاشورة كاملة، وببركة رع ووزير تكون  
المرحومة خدت البراءة من محكمة وزير بفضل بركة دعا  
أبوها عطفي صاحب حضرة وزير، وببركة دعا أمها الصالحة  
حصة، وببركة دعا كل اللي عرفوها وحبوها، وهيه دلوقتي  
ساكنة ف جنة العلاي وغيطان اليارو، ساية معانا البا  
روحها اللي بتتحول ف يوم الأربعين لطير بيرفرف دلوقتي  
علينا، سامعنا وشايفنا زاي ما انتو سامعيني وشايفيني، طير  
روح ستوتة بنت حصة بيقبل عزراكو وبيا من علا دعاكو،  
آمين آمين آمين!

قبل ما الكاهن يخلص جملته، الصوان بقا كله همهمة وتهليل من  
المعزيين الحاضرين، وكل واحد منهم بيدعي بطريقته للمرحومة  
ستوتة بنت حصة:

- ربنا يرحمها برحمته!

- ربنا يبشيش الطوبة اللي تحت راسها!
- بركاتك يا وزير يا رئيس المحكمة، اشمها بعطفك!
- يا ستنا است مدد!

بعد صوان عزا الأربعين مخلص، وسنفر سلم عالناس وودع المعزيين، راح ناحية أبوه عشان يفتحه ف موضوع مارية، وكان عشان يعرفه انه هيسافر صبح ثاني يوم بعد ما جمع بضاعته ورتب أموره، ويادوب قعد جنب أبوه إلا ولقاه بيقول له:

- اسمع يا سنفر يا بني متقلقش خالص علا شغل الغيط، وركز بس ف تجارتك أحسن، وأنا محضر لك فلوس تشتري بيها أرض تبني عليها بيت ليك ف حروان، عشان هتحتاج تبات فيه بين السفريات وكان عشان تخلي فيه مكان ينفع مخزن لتجارتك، فاكر الفلوس اللي كنت بتديها لي بعد كل سفيرة؟ أديني حوشتهم لك كلهم مع الفلوس الكثير اللي جبتها المرة دي، واحنا مش محتاجينهم هنا، لا ف الغيط ولا ف البيت، كبر بيهم تجارتك، وخلي بالك من نفسك ومن زنون ابن اختك، وزير زارني ف منامي وأمرني أعمل كده، ووصاني كان أبلغك أمانة إنك تحافظ علا كلامك ووعودك متخلفهاش أبدن، ياللا يا حبيب أبوك قوم استعد وجهز نفسك لسفريتك وربنا قادر ينجحك ويسعدك!



المفاجأة خلت سنفر مش قادر يتكلم ولا يرد علا أبوه بأي حاجة،  
بعد ما قرا كل اللي جواه، وبعد ما حل له كل المشاكل، ووفر  
عليه كل الكلام، لقّا نفسه بيوطي علا إيد أبوه بيبوسها وربما نفسه  
جوا حضنه.

## نبيتو



الأميرة "مارية" دخلت علا أختها الكبيرة "نبيتو" زعلانة وبتعيط:

- مالك يا مارية؟ بتعطي ليه؟ اتكلبي يا بت؟ حد يقدر يزعلك؟ دا انتي قادرة ومفترية وكل اللي ف القصر يخافو منك، ومحدث يقدر يدوس لك علا طرف، ياللا قوليلي يا حبيبتى انتي زعلانة ليه؟
- الشاب اللي قولتلك قبل كده إني بحبه وإن هوه كان يحبني، وصل من بلده قوص إمبارح بالليل، وقلت له يطلب مقابلة الأمير عشان يطلبني منه للجواز، زاي ما اتفقت معاكي ومع زيزت، إنما الست "نجفة" مديرة القصر رفضت تخلي سنفر يقابل أبويا الأمير، طب ليه بقا؟ وهيه مالها؟ طب أنا هشوف أبويا الأمير وهقول له بنفسى!
- فيه حاجات لازم نفكر فيها كويس قبل ما نقولها، وأي كلمة هيطلعها أبونا الأمير خلاص مش هيرجعها تاني وهفضل سارية علينا طول العمر!

- هوه ايه اللي حصل؟ وهوه أنا أول واحدة تحب؟ وبعدين مين اللي عاوز يتجوز أنا ولا حد ثاني؟
- شوفي يا مارية، انتي مش بس أختي، انتي صاحبتني وحببتني، وأنا فعلن قلت لك خلي سنفر يطلبك من الأمير، انما انتي عارفة إني متجوزة أمير بارضو، وكل مايسافر عشان شغله ف الجيش باجي أقضي الوقت هنا معاكي، حتا ولادتي لإبني "أحموسي" من سنتين كانت بارضو هنا عشان أبقا معاكي أطول وقت، يعني باختصار تهمني مصلحتك أوي، وبخاف عليكي أوي أوي أوي، واللي أنا شايفاه ان اللي حصل ده كويس، وان نجفة مديرة القصر اتصرفت كده، لأنني استفسرت من أبويا الأمير عن جواز أميرة من فلاح، رفض وقال تبقا أميرة مجنونة ومتستاهلش تعيش مع الأومرا، ونجفة كانت حاضرة وأنا بجس نبض أبويا عشان أعرف رأيه قبل ما يطلب سنفر مقابلته وتحصل مشكلة، كل الحكاية إني ملحقتش أنبهك، عشان اضطريت أروح القصر بتاعي ف حاجة مستعجلة ومقدرتش أقابلك وأحذرك، ومن ناحية ثانية مخيش عليكي يا اختي، أنا وزيزت افكرنا إن سنفر ممكن يتأخر ف الرجوع أو حتا ميجيش خالص!
- طيب أنا أعمل إيه دلوقتي؟

- أرجو كي متسرعش وتعملي حاجة تندمي عليها، لو صممتي  
تواجهي أبوكي الأمير، ممكن يحبسك أو يؤمر عساكره  
يعدو حبيبك عنك بأي طريقة، عشان كده لازم تهدي  
شوية وبعدين تقابلي حبيبك وتفهميه اللي حصل، وتشوفيه  
ناوي علا ايه، واثأ كدي ان أنا معاك في كل الأحوال  
بروحي وبكل اللي أقدر عليه!

## بيتك بيتك



الأميرة مارية سابت أختها الأميرة نبيتو، وحبّت تشغل نفسها  
بحاجة لغاية ما تهّدأ، عشان تقدّر تاخذ قرار صح، راحت الزريبة  
تنضف تحت البهايم وتعلفهم وتحل رباطهم عشان تسقيهم،  
والعمال والكلافين والسقاين أما شافو الأميرة بتشتغل بنفسها  
وبأيديها بقو يجرو وراها:

- خلي عنك يا سمو الأميرة، العفويا سمو الأميرة!

الكلاف يشوفها بتنضف يقول لها:

- سموك سيبيني انا منضف الصبح وهنضف أنا تاني!

والعلاف يشوفها بتشيل بأيديها تبّن من الزكية وتفردّه قدام  
البهايم، يقول لها:

سموك سيبيني أعلف أنا، البهايم واكلة وشبعانة من الصبح، بس انا  
هعلفهم كان من تاني عشان خاطرك!

والسقاية أما شافتها بتحل رباط البهايم عشان تسقيهم، قالت لها:

- سموك كنتي معانا من ساعة واحنا بنوردهم من التربة، لسه معادهم مجاش!

مارية كانت متلخبطة، خافت من أبوها علا حبيها، عرفت ان ممكن سنفر يتأذي بسببها، وبقت بتأنب وبتعاتب نفسها، إززاي هيه مفكرتش ف كده؟ وليه؟ وهيه اللي كانت فرحانة وعيازاه يروح يقابل أبوها ويسلم له نفسه!

مارية فانت علا أوضة حسي الجنائي، ندهت عليه وسلمت له جواب، ونبت عليه محدش يفتح الجواب ده ولا يقراه إلا سنفر، ويسلمه بنفسه ويخليه يجي بسرعة، من غير ما أي حد ف القصر ياخذ خبر، ورجعت تاني لأختها نبيتو:

- شوفي يا نبيتو أنا قلبت حكايتي انا وسنفر من كل ناحية، احنا معملناش حاجة غلط، ولا فيه ضرر مننا لأي إنسان، ولا خالفنا تعاليم النطرو الأرباب، بالعكس أنا مقدرش أخالف اللي اتريت عليه ودرسته ف البربا، مش طول عمرنا بنتعلم نحافظ علا عهدونا ونلتزم بيها، وأنا عهدي والتزامي مع سنفر، وحيبي كمان صدق معايا ف عهوده وجاني ف المعاد، يبقا مكافاته إني أسلمه لأبويا يخلي العساكر

يضر به أو يطردوه أو حتا يقتلوه، ده ميرضيش أي حد  
قلبه سليم، و كان ميرضيش ربنا!

مارية ختمت جملتها الأخيرة وانفعلها باين علا وشها، وبقا واضح  
إنها خدت القرار اللي مش ممكن ترجع فيه:

- خلاص يا نبيتو يا ختي، بمعدش قدامنا غير إننا نسيب  
القصر، يتك بيتك، بيتك بيتك، بيتك بيتك!

- ايه يا مارية اعقلي، مش ممكن تهربي وتسيبينا دا انتي أشجع  
وأجراً بنت عرفتها، اززاي مش قادرة تواجهي المشكلة  
وعاوزه تهربي؟

- أنا لو عليا اواجه العالم كله ومخافش علا نفسي، إنما الحكاية  
دي هيتأذي فيها سنفر، وأنا مقدرش أعيش من غيره،  
ومش ممكن أتجوز أي حد غيره!

- انتي عارفة إن أنا معاكي ف أي حاجة تختارها، بس أنا  
خايفة عليك أوي!

نبيتو قربت من مارية وحضنتها، ودموعها ساحت عشان خايفة  
علا أختها!

بعد شوية سنفر وصل بالمركة، ودخل أوضة حسي الجنائي،  
مارية قابلته وحكت له كل اللي حصل، وعرفته إنهم لازم يهربو

بيتك بيتك، يعني من غير ما أي حد ماياخذ خبر، إلا نبيتو أختها  
وحسي الجنائني!

نبيتو أما شافت أختها مصممة خلاص، وخذت قرار هروبها بيتك  
بيتك مع حبيبها سنفر، وإنهم عايزين يتجوزو بعيد عن القصر، وكان  
اتأكدت من أمانة ورجولة سنفر، وإنه هيحافظ عليها، ساعدتها  
وجهزت لها صندوق كبير فيه هدوم ومجوهرات، من لوازم  
الأميرات، وقالت لها:

- الحاجات دي فيها اللوازم اللي ممكن تحتاجها ف الغربة،  
وفيه نصيبك من مجوهرات المرحومة أمنا، ومنها جزمته اللي  
متحلية بالذهب والماس اللي كنتي بتجربها وانتي صغنة،  
وكان معاكي عشر صرر ذهب وعشر صرر فضة، وأرجو كي  
يا مارية تحاولي تطميني عليكي، وف أول فرصة أول ما تهدي  
الأمر ترجعي لقصرك وأهلك!



## عقبال



سنفر خد مارية وطلع بالمركبة بسرعة من ترعة الأهرامات، وجدف لغاية ما وصل حلوان، لأنه أول ما وصل من قوص عدا علا حلوان وسأل الست الحلوانية عن أرض علوز يشتريها عشان يبني عليها بيت ومخازن زاي ما طلب منه أبوه، وبالفعل اتوفق ف حنة أرض كويسة، بمساعدة جوز الحلوانية اللي اسمه حمص، واتفق مع البنايين والتجارين إنهم يدأويشتغلوه، ولغاية ما المباني تخلص أجز منهم أوضة وسكن معاهم في بيتهم!


سنفر نده عالحلوانية بتاعت البسوسة، وكان معاها جوزها حمص، اللي أول ما شاف المركبة رسيت جنبهم، شاور لسنفر وقال له:

- ياه انتا متأخرتش يعني، دا انتا لسة سايبنا من ساعتين، هوه انتا ما رحتش مناف ولا إيه؟
- لا رحت وجيت بسرعة، وجبت معايا عروستي، اسمع يا حمص قدام مراتك أهو، أنا دلوقتي إسمي القوصي وبس، واللي معايا دي حبييتي وإسمها "إبانا"، وببركة وزير ورع

هنتجوز دلوقتي، وعاوزين كاتب عقبالي عشان يجوزنا،  
تعرفو حد؟

الحلوانية سلمت علا إبابا وحضنتها بحنان وقالت:

- يا حبيبتى يا عروسة يا قمر، أنا دلوقتي فهمت سر سرعة  
ونخبطة سنفر، قصدي القوصي الشاب الطيب، أكيد انتو  
بتحبو بعض وقراييك عاوزين يجوزوكي لابن عمك ولا ابن  
خالك، المهم أي حد غير اللي انتي بتجبيه، متقلقوش يا  
حبايبي، أنا كنت شغالة الأول ف البراي، وسيبتهم أما  
اتجوزت حمص عشان أساعده ف المعيشة، وأعرف كهنة  
وكتاب كثير، وفيه واحد كاتب عقبالي قريبي ناخدكو  
دلوقتي ونروح له، وكفاية بيع بسبوسة  
النهاردة، شيل معايا يا حمص نرجع  
الصواني دي للبيت، ونروح مع القوصي  
وإبابا عشان يتجوزو ونفرح بيهم، وأهو  
نهيص ونغني ونرقص معاهم!



بيت الكاتب العقبالي قدامه جنية صغيرة، كان قاعد فيها علا  
كنبة عريضة وقدامه كرسي بط عريض، حاطط عليه حبارة

وريش وبوص أقلام للكتابة، أما شاف الحلوانية وحمص داخلين عليه ربح بهم، وقال لهم:

- منورين يا حبايبنا، ومين الشباب الطازة اللي معاكو دول،  
يا ترا جايين ف جواز وفرح وسعادة ولا طلاق و ... !

الحلوانية مخلص الكاتب العقبالي يكمل كلامه وقالت له:

- متكلمش، بركة رع ووزير مفيش إلا الفرحة والسعادة،  
عايزين نجوز جارنا القوسي لحبيته إباننا، وعازية أشوف  
معزتي عندك أما تجاملهم وتعمل عقد عقبال كويس  
وتسجله بسرعة ف البربا زاي ما بتعمل مع العرايس  
والعرسان، خليك فاكر إني مش قريبتك وبس، دا كان  
جوزي حمص هو اللي مصمم لك بيتك بجنيته دي، وكان  
مصمم وراسم حدود بيت العروسين دول اللي لسه البنانيين  
والنجارين بيشتغلوه فيه!

- ماشي يا بنت عمتي يا حلوانية الكلام، طب خلي بالك يا  
حمص بقا متنساش تعمل ف جنية بيت العروسين الجديد  
ده بركة مائة، ومتنساش زاي ما نسيت تعمل لي، وكل  
شوية آخذ العيال ونروح نستحما ف الترة، ههههه!

- ملحوقة ملحوقة، نعمل لك رسمة وتصميم البركة، ونجيب  
العمال يحفروها ويبنوها لك، اطلب اتا بس يا قريبي!

- نحفر إيه ونعمل إيه، احنا لسه فينا حيل للكلام ده؟ ياللا  
ياللا ببركة رع وبتاح ووزير، آدي يا ست الستات أحسن  
ورقة بردي عندي وسعرها سبيكة واحدة، وأنا مش هاخذ  
تاني غير سبيكتين بس، واحدة ليا والثانية عشان كاتب  
البربا اللي هيسجل عقد عقبالكو، يعني تكاليف العقبال  
كلها ثلاث سبايك!

سنفر شد صرة فلوس من حزام وسطه، طلع منها ثلاث سبايك  
وناولهم للكاتب:

- بسيطة عالبركة، اتفضل!
- اسم العريس إيه؟
- القوصي ابن صاحب وزير!
- واسم العروسة؟
- إباننا بنت صاحب حور!
- طبعن أسامي الشهود الإيتين (ست الدار وحمص) أنا  
عارفهم، والشربات من عندنا هدية العروسين، وزغرطي يا  
ست الدار، ألف مبروك!

عند بيت حمص وست الدار، قابلهم زنون اللي كان مستنيهم،  
واتجمعو البنات والولاد مع الجيران واللي واقفين بيتفرجو وزفو  
العروسين بالزغاريط والطبل والتزمير والتسقف وهو ما بيغنو:

يادي الليلة الهانو

عروستنا يا نفرو

يادي الليلة الهانو

وعريسنا يا نفرو

يادي الليلة الهانو

## صما-طاوي



القوصي سنفر كان يسافر مع زنون يشتغلو، يشترو ويبيعو، يجيو بضاعة ويتاجرو، وأما يرجعوا يلاقو مارية مستنياهم، كانت بتقضي وقتها ف تنظم حياتها مع العيلة الجديدة، وتأسيس بيتها الجديد، متابعة البنائين والنجارين والجنانية الي خلاص قربو يخلصو شغلهم ويسلموهم البيت!

تجارة القوصي كبرت واتوسعت، وأرباحه زادت، وقضو أيامهم ف غاية الإنبساط!

سافرو مع بعض لمدينة قوص مرة، وفاتو علا بهنوسا، واتأسفو لأهلهم ف قوص إنهم ميقدروش يرجعوا يعيشو معاهم دلوقتي أحسن حد من موظفين القصر ياخذ خبر بعنوانهم، ويمكن بعد شوية أما الأمور تهديا يقو يقدر و يرجعوا تاني لأهاليهم!

الأب عطفي كان مبارك خطواتهم واتمنا لهم الهنا:

- لازم تعرف يا سنفر إن وزير كان مبارك ليكو الجوازة دي، وأديني بلغتك رسالته ليك الي جتني ف المنام، وأنا

دلوقتي متأكد من مباركة وزير ليكو، وفرحان بدخلتكو  
وهناكو، ولو إني كان نفسي تعملو فرحكو هنا وتفرحو  
أمكو حصة معاكو، بس فرحتي زادت دلوقتي وأنا  
حاسس إن حفيدي خلاص عيوصل بالسلامة ويشيل  
إسمي واسمك!

- طبعن يابا بركتكو ورضاكو عننا إنتا وأمي هيا الأساس،  
وأكيد ياصاحب وزير إنتا أول واحد يعرف إن مارية  
حبله، ما انتا يابا مكشوف عنك حجاب الأرض والسما،  
واصل مع النظرو والأوليا، ومفيش حاجة تستخبا عليك،  
واحنا مقلناش لأي حد، حتا مكاش متأكدين، وكنت  
ناوي أما أفوت علا أختي ستوتة ف بهنوسا أخليها تروح مع  
مراي للهاميزي بتاع بربا البهنوسا، عشان تكشف عليها  
الحتحورات وتأكد!

من حلوان استعد سنفر ومارية للسفر للعاصمة مدينة مناف، بس ف  
السر، عشان يقابلو الأميرة نبيتو، اللي كانت بتيجي لهم مع العريفة  
زيزت راكبين مركبة سايقها حسي الجنائي، اللي سنفر كان متفق  
معاه علا مكان معين ينفع يتقابلو فيه، حسب مواعيد الأعياد  
الكبيرة اللي يقدر و يحضروها سوا ويتظمنو علا بعض!

كان أول معاد بينهم صباحية يوم واحد وعشرين، أول العاشورة  
الثالثة من شهر بابة عشان يتوهو ف زحمة العيد الكبير، عيد  
الجلوس عالعرش وعيد توحيد الأرضين!

سنفر ومارية سمعو صوت جاي من ناحية البربا، بصو عليه لقو  
نفس الكاهن أبو قفا طويل، اللي بينادي بالمناسبات، واقف  
وماسك وزه بيطيرها وبيقول:

- يا وزه قبلي، قولي ل اللي حتقابليه، ييجي يشرفنا، عندنا بكرة  
عيد توحيد الأرضين!

وبعدين الكاهن طير وزه تانية وتالته ورابعة ف باقي الإتجاهات:

- يا وزه بحري، قولي ل اللي حتقابليه، ييجي يشرفنا، عندنا بكرة  
عيد توحيد الأرضين!

- يا وزه اليمين، قولي ل اللي حتقابليه، ييجي يشرفنا، عندنا بكرة  
عيد توحيد الأرضين!

- يا وزه الشمال، قولي ل اللي حتقابليه، ييجي يشرفنا، عندنا  
بكرة عيد توحيد الأرضين!



سمعو أصوات ناس من المنافين ينادو من فوق البيوت، وشافو  
الناس بتتجمع عشان تتفرج عالمك بيبي، وهوه يجدد عهده،  
ساعتها كان اتنين ستات بيتكلمو!

- احنا المنافين خلاص اتعودنا ع الفرجة دي، بنستعد ليها،  
كل سنة م العيد للعيد، أهو بنتفرج، وبارضو بناخد اللي  
فيه النصيب!

- تعيشي يا ختي وتفتكري جدنا الملك ميناء، اللي جمع ووحيد  
الأرضين، القبلي والبحري، بعد ما كانوا متقسمين!

- أهو من ساعتها وكل ملك يحلف ف نفس اليوم ده، انه  
يفضل محافظ عالعهد، ويواصل لم شمل الشعب الواحد  
والأرض الواحدة!

الجموع كلها بتتحرك ماشية ناحية القصر الكبير، بسوره الأبيض،  
لون اللبن الحليب!

القصر مبني بالطوب الني، ومدهون بالجير الأبيض، أما السور  
العجيب اللي لافف حوالين القصر، مبني من جرجير الأبيض،  
يعني أبيض منه فيه!

- لازم وحتمن، إن الملك بنفسه يلف سبع مرات حوالين  
السور الأبيض!

مارية كان كل همها وسط الزحمة دي تشوف أبوها الأمير تتي  
وتطمئن عليه، وهو ماشي جنب الحقا الملك، ورغم إن أبوها هو  
سبب غربتها، إلا إنه كان واحشها أوي ومتحبلوش غير الخير.

سنفر بقا كان يسمع من المنافين كلام كتير جديد عليه، يعني  
كلمة (جري-حج)، هو عارف كل كلمة لوحدها معناها إيه؟  
جري يعني حيلة كبيرة أو سور عظيم، وجج يعني أبيض، انما عمره  
ما سمع الكلمتين لازقين ف بعض إلا هنا ف مناف!

أما شاف الملك يجري حوالين السور الأبيض، عرف الحكاية،  
وبقا يقول مع المنافين (جري-حج)، وهو ما يشجعو الملك عشان  
يقدر يكل الطقوس ويلف السبع لفات حوالين السور!

- واضح ان الملك تعبان من الجري!
- أوبة، بقا الملك معدش شباب، ربنا يديه الصحة، وبعدين  
هو يجري بعد ما الكهنة خلصو معاه طقوس توحيد  
الأرضين وجلوس العرش، اللي بيعملوها الصبح ف البربا،  
ودي بارضو فيها مجهود وتركيز جامد!
- طيب عشان ظروف الملك، مش كان كفاية أوي لفة  
واحدة؟ ولا لفتين ثلاثة وخلاص؟

- لازم السبع لفات، بعدد السبع بقرات، يعني السماوات السبعة، كل بقرة منهم بتضمن له خير وبركة بمساحة السما الي قاعدة فيها كلها!
- كده الملك بياكد عهده، ويحلف إنه يحافظ عالوعد ببركة السبع سماوات، يعني ده الوعد الي تنزله سبع سموات!
- طيب فيه حاجات تانية، غير الدوران حوالين القصر!
- آه، ف نفس اليوم م الصبح بدري، الملك يروح البربا، بيمثل جلوس عرش قبلي بالتاج الأبيض الحجة، ومرة تانية بيمثل جلوس عرش بحري بالتاج الأحمر الدشرة، وبعدين بتيجي كاهنة لابسة الحواية بتاعت أزة، الكرسي يعني، وبتقوم بتلبيس الملك تاج التوحيد الزخمة، تاج عرش مصر كلها، وهو قاعد علا كرسي العرش!
- وكان الكهنة بيعملو فريقين، فريق بشكل الصقر حور بنبات السوسن، وفريق بشكل الحمار ست بالبردي، وبعدين بيتجمعو ف فريق واحد مع الملك الي بقا لابس الزخمة!
- وده بياخد منهم كتير؟
- من طلوع الشمس لحد دلوقتي، وأدينا بقينا ف نص النهار!
- طيب دي حاجات الملك والكهنة بيعملوها، احنا هنا بنعمل ايه؟

- يا سيدي أدينا بنتفرج، وبنشجع ملكنا عشان بلدنا، وبعدين  
ف الآخر كل واحد بياخد نصيبه من لحمة التيران اللي  
بتندبح، والعيال كان بيهيصو بالعيدة اللي بيوزعها الكهنة!
- تعرف لو يسيبونا نجري ونلف معاه، مش يكون أحسن  
بارضو، دي بلدنا وواجبنا كلنا، نجدد عهد التوحيد!

سنفر لاحظ إن الملك بمجرد ما كمل لفة واحدة، كلمة التشجيع  
إتغيرت، بقا الناس بتهتف بكلمة تانية: (صما-طاوي)!

- أيوة يا قوصي، كل ما الملك بيلف لفة بنقول:  
(صما-طاوي)، يعني لرق ووحدة الأرضين!
- بس أنا سمعتها ف طيبة (حب-طاوي)، وف أييدوس  
(ضم-طاوي)!
- كلهم معناهم واحد، المهم البلد تفضل واحدة!
- طب، وايه اللي شايله الملك ده؟
- إيه يا سي قوصي، هو انت متعرفشي عمود ال (جد) وزير،  
أهو ده اللي بيضمن استمرار مصر والمصريين، ملايين  
السنين، جيل يسلم جيل!
- بشوفه كثير، بس دي أول مرة أعرف بيتعمل بيه إيه؟

بمجرد وصول الملك بيبي ل اللفة السابعة، بطلوع الروح، إلا  
والتشريفه جابت له كرسي العرش قعد ف الميدان قدام الباب

الكبير، وشاور لـ حمو رئيس الكهنة، واداله الأمر عشان يوزع  
اللحمة والعيدية عالناس:

- بنظام يا (حمو)، الكبير الأول، والستات قبل الرجال،  
والعيال الصغنين ياخذو عيديتهم بعيد عن الزحمة والهيصة،  
مش عاوزين حد يزعل ف العيد!

هيصة كبيرة عملها الناس عشان كل واحد ياخذ عيديته ومنابه م  
اللحمة، ووسط الهيصة دي نبيتو قابلت مارية وسنفر، وبعد السلام  
والتحيات طمنتهم علا القصر واللي فيه، وقالت لهم ان موقف  
أبوها متغيرش، انما طمنتهم انه مش مكلف حد يدور عليهم ولا  
بيراقبهم، وقال أنا صحيح مش موافق ع اللي عملته مارية، وإنها  
حرميني من فرحتي بيها، إنما مادام هيه اللي خرجت من القصر  
بإرادتها يبقا مهترم اللي هيه عاوزاه، ومعنديش ليها غير اني بتنا لها  
الهنا، ودعواتي لـ أزة وحوة ونية وسركة يحموها ويحرسوها لحد ما  
يجمعنا ربنا تاني!

العيد كان سعيد علا سنفر ومارية، انبسطو بحضور الإحتفالات  
وسط الناس، ودي كانت أول مرة تقدر الأميرة مارية تشترك  
كده ف الإحتفالات وسط الشعب، وكان انبسطو من مقابلة نبيتو

وزيزت وحسي، ريحة الحبايب، مش بس كده كان مارية  
اتظمنت علا أبوها الأمير، بس من غير ما يشوفها ولا يحس بيها!

كانو راجعين ف مركبة كبيرة مع ركاب كتير من اللي كانو  
حاضرين العيد الكبير، صحيح عيد توحيد الأرضين احتفالاته ف  
كل مكان ف مصر، إنما الإحتفالات ف مناف بحضور الملك  
بنفسه، وعمل طقوس العيد لها طعم ثاني!

الفرحة بالعيد ترجمها ركاب المركبة أما غنو مع بعض ترتيلة الشكر  
لخالق الكون:

•نورك يارب الكون، ملا الكون

•الصبح يطلع عالكل .. وينور طول النهار

•الضلمة بتغور .. أول ما يظهر نورك

•نور النهار بيكفي مصر كلها، شمال وجنوب

•الناس بتصحوا، ويقفو علا رجليهم، ف حضرتك

•بدنهم طاهر، وهدومهم نضيفة، رافعين أيديهم للسما

•بيصلو ويدعو لك .. سايبين أمورهم لك

•كل واحد ف شغله مبسوط برعايتك

•كل البهايم راضية بعلفها الناشف والطري، فضل وخير منك

الطيور بتطلع من عشاشها، جناحاتها بترفرف، وأرواحها بتسبح  
حتا الوحوش، بتجري تنشط .. يحيوك أول ما تطلع ويملا الدنيا  
نورك

المراكب بتجري ف حمايتك .. والسكك المقفولة تنفتح بمجرد  
ظهورك

السماك بيتنشط لفوق .. نفسه يطل ويشوفك  
.. خلقت الجنين الحي م الماية السائلة، وخليته يتنفس ف بطن أمه  
يارب .. نورك وخيرك ملا الكون.

## هانو



الأيام الحلوة بتضيع مرارة الفراق، والعشرة الطيبة أحسن دوا  
وترياق!

سنفر ومارية سابو بيت الحلوانية ست الدار وجوزها حمص، بس  
فضلو محافظين علا صحتهم، وبقاهم أهل وسند ف الجيرة الجديدة،  
أما سكنو ف بيتهم الجميل ف حلوان، اللي مارية نظمتة ونسقت  
جنيته وبركة مايته، وعينت جنايني من معارف ست الدار، عشان  
يهتم بالشجر والزرع، وكان عينت عريفة للبيت عشان تنظم  
وتراقب عمال مخازن التجارة!

البيت الجديد مش قصر، له جنيحة كبيرة ببركة مائة، وراه مخازن  
التجارة، ومن جواه كان فيه أوضة كبيرة للنوم، وست أوض  
فاضين، قدامهم صالة كبيرة مزيناها تحنيطة مومية التمساح  
سوبك، اللي كان سبب ف لقما مارية وسنفر!

مارية بقت شايفة مصالح بيتها، وبتحاول تسعد جوزها، وحافضة  
مواعيد الأعياد، حتا عيد بيت حور، اللي معروف بعيد الزوجات



اللي معاده ف آخر شهر بشنس، كانت هيه محضرة عزومة لحفلة ف البيت، فلما رجع جوزها التاجر القوسي من شغله وقدملها هدية أسورة ذهب عليها صورة ربة الجمال حتحور، لقاها مستعدة ومجهزة أكل وحلويات وزهور ومشروبات، وكان ف عيد دلح حور، يعني عيد تدليح الأزواج اللي معاده ف آخر شهر أييب، استعدت وخلت نحات من البربا يعمل تمسال رخام لجوزها وحبيبها سنفر!

المعاملة الطيبة والعشرة الحلوة كانت عنوان حياة الحبيين، سنفر ومارية، أو القوسي وإبانا، شوية ولما قررب معاد ولادة مارية، جت الأم حصة م البلد قعدت معاهم قبل الولادة بعاشورة كاملة، واتفقت الحلوانية ست الدار مع بربا النظرة تاورة عشان يعينو سبع حتحورات يحضرو الولادة ف البيت، يومين ومارية ولدت بنت زي القمر، وبقا البيت مليان ضيوف وزوار من قرايب سنفر، جاين من قوص وبهنوسا، عشان يباركو ويحضرو سبوع المولودة!

حصة أم سنفر قالت لهم ياللا كل واحد م الموجودين يختار اسم يعجبه للمولودة الجميلة، وبقا كل واحد منهم يختار اسم حلو، اللي يقول (كنة)، واللي تقول (بطرا)، و(تاتويا) و(ماريكا) و(سومة) و(مروة) و(وداد) و(سوسن) و(هانو)، وأما جه دور الأم حصة تختار قالت:

- اسم هانو يعني خير الفيضان اسم حلو أوي، بس أنا بختار  
لحفيدتي اسم رادوبي، عشان ده اسم أمي، اللي نفسي  
يفضل منور الدنيا ويملاها خير، زاي مكانت معانا أم مليانة  
خير وحنية، أصل اللي اسمه عيفضل موجود يبقا كأنه هوه  
كمان موجود، وزمان أما سألت أماتي عن معناه اسمها  
قالت لي انه يعني لون قشر سنابل القمح، لون الذهب  
ولون الشمس رع، وكنا الأول بننطق الاسم ده،  
رع-دوبي، بس دلوقتي رادوبي اسم خفيف ولطيف، ده  
راي وانتو بقا اختارو اللي يعجبكو!

مارية دحكت وقالت للماتها:

- يا أمي يا حبيبتني، رادوبي ده اسم جميل، وكمان كان اسم  
خالتي، ومن غير أي حاجة أنا عارفة ان رادوبي أما تكبر  
هتفرح أوي أما تعرف إن ستها حبيبتها هيه اللي اختارت  
لها اسمها، يعني أنا موافقة علا اسم رادوبي والرأي دلوقتي  
لأبوها سنفر!  
- وهوه انا أقدر أكسر كلمة لست الحبايب، حصاتي أماتي،  
يبقا عالبركة، اسم جميل لأجمل بنوته، رادوبي رادوبي  
رادوبي، وكمان يبقا اسم الدلع هانو، عشان يبقا رادوبي خير

القمح اللي بنعيش بيه، وهانو خير الفيضان اللي بيفيض  
عالكـل ويفرحنا بيه!

حصـة انبسطت أوي من كلام مارية وسنفر، وموافقـهم علا اسم  
رادوبي، وان اسم أمـها هيفضل منور حياتـها وحياة ابنـها ويملا  
بيوتهم بالهنا، وقامت الجدة حصـة وقفت وبقت تسقف حوالين  
المولودة وتغني لها:

يا دي الليلة الهانو

رادوبي يا حلوة يا نونو

يا دي اللية الهانو

روح جدو حبيبة ستو

يا دي الليلة الهانو

يوم سبوع رادوبي، اتجمع الضيوف والجيران، مع حصـة وست  
الدار، قعدو مارية وسطهم، وحطو رادوبي فـ غربال، دقوها  
الهون وزعو الحلاوة الحلواني ورشو السبع حبوب، وغنو لها:

حلاقاتك برجالاتك

هنحط الحلقة ف رجلك  
حلاقاتك برجالاتك  
حلقة ف ودانك وايدك  
حلاقاتك برجالاتك  
ذهب وفضة ما يغلو عليك  
حلاقاتك برجالاتك  
نورت وشرفت البيت  
حلاقاتك برجالاتك  
ياللا اكبر واسبق عالغيط  
حلاقاتك برجالاتك  
راقينك رعيت وتاييت  
حلاقاتك برجالاتك  
يا قلب أمك يا عين أبوك

حلاقاتك برجالاتك

ولاد عمك يهشتكوك، وولاد خالتك يدلعوك

حلاقاتك برجالاتك

بيتك عزك، أهلك سندك، كل الناس يحبوك

حلاقاتك برجالاتك

حلاقاتك برجالاتك

حلاقاتك برجالاتك

## رادوبي



كحكة القمح اللي بلون الشمس، رع-دوبي بتكبر وتنور، حبيت  
علا ايديها ورجليها، وقفت ومشيت تاتا تاتا، جريت ف الفسحة  
واتتططت ف الجنيينة وقدام البيت، عيطت أما وقعت، وسرخت  
أما هدومها اتوسخت، دحكت مع صاحبها وزقططت مع قطتها،  
اتشعبطت ف الشجر واتزحلق عالسلاالم!

كل شقاوة وبراءة الأطفال عاشتها رادوبي ف بيتها وجنيبتها،  
اتهنّت بالعيشة مع أمها وأبوها واللعب مع ابن عمّتها زنون ومع  
دادتها، واتمتعت بالصحبة مع ولاد وبنات جيرانهم اللي ساكنين ف  
شارعها وحارتها!

أيام وسنين مرت، و"رادوبي" كبرت، وأمها اهتمت بتعليمها،  
عرفتها كل اللي كانت بتتعلمه ف قصر أبوها الأمير تقي وف البرابي،  
القراية والكتابة والحساب والرسم والنحت والفلك والطب  
والحكاوي والغناوي والموسيقا، حاجة عن مصر، حاجة عن  
الأرض، حاجة عن السما، وبفروغ الصبر كانت بتستنا زيارة

جدتها حفصة من السنة للسنة، عشان تحكيها ولصحابتها أحلا  
الحواديت يوم مهرجان الحواديت!

مهرجان الحواديت ده، عبارة عن سهرات ليالي قمرية كل سنة ف  
أول يوم من آخر عاشورة (21) من شهر القمر خنسو (بشنس)!

المدن والبلاد اللي فيها برابي كبيرة، كان الكهنة ينظمو سهرة  
كبيرة، كاهن تحوتي وكاهنة عنقت وكاهن خنوم يستقبل الأهالي  
ف ساحة البربا، وكل كاهن يحكي عن النطرو، كاهن تحوت يحكي  
نكت وطرايف، وكاهنة عنقت تقول حكايات ومغامرات  
الوحوش والغابات والأحراش، وكاهن غنوم يحكي عن قصص  
الخلق من كل لون وكل نوع حي، وكان اللي بيقعدو ف الساحات  
دي عشان يسمعو حواديت الكهنة أغلبهم ستات وأطفال!

اللي ظروفهم بقا متسمحش إنهم يروحو ساحة البربا الكبير، وكانو  
بيتلمو ف البيوت الكبيرة ويسهرو لغاية الصبح مع حواديت الأمهات  
والجدات!

عشان كده كانت المناسبة دي بتفرح رادوبي أوي، وخصوص  
اللمة بتاعتها اللي بتجمع اللي شغالين ف البيت واللي شغالين ف التجارة  
مع أبوها، مع أطفال الجيران، ويقعدو كلهم ساكتين وهوما  
بيسمعو حواديت الجدة حفصة!

كان الأيام اللي مفيهاش سفر للشغل أو الزيارة للأهل، كل يوم بعد الظهر كان أبوها سنفر بيبجي بعد ميخلص شغله، يلعب مع رادوبي ويحكيها عن تجارته وشطارته ف البيع والشرا ومعاملته اللي بالطيبة للطيب وبالشدة للمفتري والطماع، بس رادوبي مكنتش تنام أما يكون أبوها موجود الا أما يحكي لها حكاية!

- اسمع يا سي سنفر يا أبا، فيه حاجة مش فهمها ف الحكايات اللي بسمعها، عن مباني الأهرامات الضخمة وطرق بنائها الصعبة!

- أنا عارفة ان بنا الهرم زاي بنا المسلة، الهدف منهم واحد رفع البان بان رمز الخلق والوجود الأولاني، وأما بنكر الرمز بنكرر كان فرص الوجود لنا واللي بعدنا!

- بس بنا الأهرامات نفسها هوه المشكلة اللي مش فاهماها، يعني كلنا عارفين ان المهندسين اللي ف البرابي بيرسموها ويخططوها، وكان بيشرفو عالعمال البنانيين والنحاتين، إنما اللي مش قادرة أفهمه ازاي يسيطرو عالعمل من كل الجهات وهوما مبيقدروش يشوفو غير جهة واحدة!

- يشوفوها ويراقبوها من فوق!

- يعني إيه من فوق؟ بيطيرو يعني؟

- آه بيطيرو يا ستي، البرديات وحيطان البرابي والأهرامات مليانة حكاوي عن الطيران وطلوع السما!



- زاي ايه؟  
- أول واحد انكتب إنه طار وطلع السما، الشمس رع  
بنفسه، أما ركب البقرة وطلع السما وهو طائر بيها!  
رادوبي رفعت صباعها وقالت لأبوها:

- عارفاها عارفاها، الحكاية دي خدناها ف البربا، اسمها حدوتة  
بقرة السما!

سنفر دحك وكل كلامه:

- كان الوزير محتب كان العمال يشوفوه طائر بنفسه عشان  
يعاين هرم صقارة المدرج، وكان بيتابع العمال من فوق!  
رادوبي انبهرت، فتحت بوقها وبرقت عينيها:

- معقولة محتب كان ييطير؟  
- أما أكثر حد طلع السما ف زمن قريب منا، كان الملك  
وينس، اللي كتب كل ده علا حيطان أوضة الدفنة جوه  
هرمه اللي أنتي شوفتيه معانا ف صقارة، مكتوب إن مرة  
النجارين عملو للحقا وينس سلم طلع عليه السما، ومرة ثانية  
ركب البساط اللي منسوج من خيطان الكنان، طار بيه  
وشاف مصر كلها من فوق، ومرة تالته ركب حيوان بجسم

أسد ومنقار صقر وديل تمساح، اسمه ال "سفر"، الحقا  
ونيس طار وطلع بيه السما سبع مرات!

زاي كل مرة وقت حكاية الحواديت، قبل ما سنفر يكل ويقول  
توتة توتة، كانت رادوبي نامت وراحت ف سابع نومة!

وأما رادوبي كملت خمس سنين، عملو لها عيد ميلاد!

الحلاونية ست الدار جابت لرادوبي صينية بسبوسة كبيرة، مخطوط  
فيها خمس شمعات بكار، وندهت ولادها وبناتها، وجمعت لها كمان  
الولاد والبنات من جيرانهم واصحابهم، عملو لها هيصة عيد الميلاد  
وغنو لها.

رودي يارده، يا قشر الفضة

شمسي وقمري، رودي يارده

قمح بلدنا، طرحه عجائب، دقيق ورده

اختي قالت لي، هادي حبيبك، اديله ورده

ستي قالت لي، قومي اتحي، بماية باردة

رودي يارده، يا قشر الفضة

شمسي وقمري، رودي يارده  
ترايع غيطنا، طارحة سنابل، مادة وفاردة  
أمي قالت لي، إكسي طيرك، إعملي قرده  
خالتي قالت لي، رودي رادوبي، بت يارده  
رودي يارده، يا قشر الفضة  
شمسي وقمري، رودي يارده

## وزير واست



بعد حفلة عيد ميلاد رادوبي ما خلصت، سنفر جمع اولاد الجيران البنات والولاد ووزع عليهم هدايا، وست الدار فرقت عليهم ملابس ونداغة وبسبوسة!

رادوبي قالت لأبوها:

- السنة دي عاوزاك تحكي لنا حكاية وزير وأزة أو است زاي ما حضرتك بتقولها، بس الحكاية كاملة عشان أما بسمعها من الدادة يوم مهرجان حديت (الحواديت)، أو من الكهنة والكتاب اللي بدرس معاهم يقولو حنت صغيرة منها بس، وبالمرة كان تقول لنا ليه إحنا بنقول عليها (أزة) وحضرتك وستي حصة وخالتي وأهلنا اللي ف قوص يقولو إن اسمها الصبح (است):

البنات والولاد والكبار اللي حاضرين العيد ميلاد وافقو رادوبي وبقو كلهم عاوزين يسمعو حكاية وزير وأزة، أو وزير واست!

- قبل كل حاجة موضوع الإسم ده حاجة بسيطة أوي، است هيه أزة، بس حسب نطقنا ف الجنوب بنقول عليها ستنا (است)، وهنا ف حلوان ومناف وكل بحري بينطقوها (أزة)، يعني الإسم واحد بس حسب اللهجة، وكويس انكو اخترتو الحدوتة دي عشان أحكيها لكو، لأنها أهم حدوتة من حواديت المصريين، لها علاقة بحضارتنا وبضميرنا، وحتفضل كده ملايين السنين!

كان يا ما كان، من قديم الزمان، النظر وزير كان أصله ملك عظيم، خد الملك ومملكة مصر عن أبوه الملك "جب" ملك الأرض، وورث شعار الحكم عصاية ال "حقا" ودقن ال "دول"، عن جده "أتوم" اللي هوه أول ملك ف الكون!

وزير مكنش ملك وبس، كان عالم وشاعر وفنان وحكواتي، علم الناس الزراعة والطب والفلك، ومكنش بيقد ف العرش زاي الملوك دلوقتي، كان سايب كرسي العرش لشريكته ف الملك "است"، وكان هوه بيتحرك ويبتقل بين شعبه عشان يعرف أحوالهم ف كل مكان، وكان أما يوصل لأي حته ف مملكته يختار شجرة جميزة كبيرة يقعد تحتها، ويطلع الناي بتاعه من جراب مخصوص اسمه الكانة، يقسم عليه بصوابه ويعزف أجمل الألحان، وأما يتجمع عليه الناس يسمعو ويستمتعو بالعزف الجميل، يبدأ يحكي

لهم حكايات عن العدل والرحمة، عن الحب والود، عن العطا والمشاركة، عن العفو والمسامحة، يعرفهم مواعيد وطرق الزراعة، ويعلمهم أصول تربية ورعاية الحيوان، وكان وسط الحكايات يعرفهم أي حاجة جديدة ف علوم الطب والفلك!

وزير كان شاب أسمر، ملامحه جميلة، وطباعه أصيلة، متجوز حبيبته است، وعندهم ولد وحداني إسمه حور، باختصار وزير كان ملك محبوب من أسرته وشعبه وربّه!

وزير كان له أخ شقيق إسمه سوت، بس ما يشبهش وزير ف حاجة، سوت كان طائش وعنيف وشراني، متجوز نبية-حوة، وملوش خلفه، حقد علا أخوه، وبقا يقول كلام كفر وسط الناس، معترض علا قسمة ربنا:

- اززاي يكون وزير هو الملك وأنا المحارب اللي يهزم العدو؟
- واززاي معنديش خلفه، وأنا ف عنفواني وصحتي مفيش زبي، ويبقا الضعيف النحيف وزير هو اللي عنده الخلفة؟

سوت نفسه اتملت بالحق ، ودبر مع صحابه انه هيعمل حفلة ف قصره، ويكون ف الحفلة مسابقة بين اللي هيحضروها، واللي يفوز ف المسابقة يهديه تابوت!

بعد ما عزفت فرقة العميان عالهاريات والكنرات والنايات، وبعد  
ما غنت المغنيات مواويل ومقامات، وبعد ما رقصت الرقاصات  
بالصاجات، سوت ضرب الجزز، يعني كله سكات:

- سمع هووووس، دلوقي فيه مسابقة وليها مكافأة، ده القوس  
الي ورثته عن جدي أتوم، والي هيقدر يشد وتر القوس  
بطول دراعه، هيكسب تابوت منحوت من حجر الصوان  
الأصواني، ياللا مين بقا البطل النختي الي هيقدر يشد وتر  
القوس الأتومي؟

كل الشبان الي حضرو الحفلة جربو، الي يشد الوتر قيراط والي  
يشده يادوب قيراطين تلاتة، كلهم خدو فرصتهم ف المسابقة، مرة  
واتنين وتلاتة، محدش قدر يشد الوتر بطول الدراع!

صحيح وزير كان نحيف ورقيق بس عفي، اتقدم وقال:

- ده قوس جدي، وأنا الي أقدر أشد وتره، وريني كده!

وزير من أول مرة شد الوتر لأبعد مسافة ف آخر دراعه، وعشان  
يظهر عافيته، رفع القوس ووجهه ناحية السما، طلع السهم لفوق  
واختفا وسط السحاب!

الحفلة هاصت، وكل اللي حضرو أتعجبو من فتوة وزير وعافيته  
وقدرته رغم نحافته، وقالو:

- وزير يستاهل المكافأة، وأهو القوس كده مش حيروح لحد  
غريب، قوس أتوم راح لحفيد أتوم، وكان يبقا هوه اللي  
يستحق التابوت الصواني المخصوص!

اصحاب السو، خدو وزير من ايديه وراحو بيه ناحية التابوت،  
وحلفو عليه لازم يجربه، وبجرد ما نزل وزير ف قلب التابوت، شدو  
عليه الغطا وقفلو باب التابوت!

است ونبت حوة سرخو وصوتو وزعقو:

- حرام عليكمو كده، دا زينة الشباب!  
- مينفعش تتآمرو كده علا أعدل وأحن الملوك!  
- ليه الخيانة يا ناس؟ فين الشهامة يا عالم؟ فين القراية يا  
مصريين؟ فين الحبايب والصحاب؟

سوت وصحبته رفعو التابوت ورموه ف النيل، ووسط الناس وقف  
سوت وقال:

- أنا القائد بتاعكو، وطول عمري بدافع عنكو، يعني أنا اللي  
استحق أبقا الملك وأستاهل المملكة من الأول، واللي



هيهالفتي مصيره هيكون كده، واللي هيعارضني معنديش  
له غير سوطي وحررتي وسيفي!

الناس خافت، والحفلة اتفضت، واست خدت كلبها "أنبو"  
وركبت مركبة وراحت تفتش وتدور وسط البرك والبراري  
وأحراش النيل عن تابوت حبيبها وزير!

مرت الأيام وسوت بقا هو حاكم المملكة، وكل ما يشوف زرة  
زرعها وزير يقلعها بغل، وكل ما يعرف ان فيه حد لسه يجب  
وزير يعاديه ويشيل منه، وكل ما أي حد يجب ف سيرة وزير  
يئذيه، وكل ما يسمع عن قرار أو نظام طلعو وزير، يترياً عليه  
ويلغيه، المملكة باظت والأحوال اتلخبطت!

بقت السرقة من البيوت وف الشوارع عيني عينك، والحرايق مالية  
البلد، والناس مخنوقة من ظلم سوت وعصأته!

وف يوم سمع سوت إن الناس متجمعة عند تابوت وزير اللي قدرت  
است وحبايها يطلعوه م النيل، وقالو إن است هتعمل سحر رباني  
يرجع الغريق للحياة من تاني، وبقت الناس تردد الكلام ده ف  
الشوارع والغيطان والأسواق:

- ستنا است حتعمل سحر رباني، يرجع الغريق للحياة من تاني!
- ستنا آزة هتعمل سحر رباني، يرجع الغريق للحياة من تاني!

- ستنا است حتعمل سحر رباني، يرجع الغريق للحياة من ثاني!
- ستنا آزة هتعمل سحر رباني، يرجع الغريق للحياة من ثاني!

سوت جمع عصابته وشال سوطه وحربته وسيفه، وراح ناحية التابوت، ضرب است بالسوط، وفتح التابوت بالحربة، وطلع جثة الغريق وزير وقطعها بسيفه أربعناشر حطة، وأمر عصابته يوزعو كل حطة ف ناحية من نواحي أرض مصر الأربعناشر!

است هربت من الظالم، خدت إبنها حور للبراري، ربه ودربته، وعرفته حكايته وحكاية أبوه وقصته، حمها ملكة البراري "سركت" وعقاربها المحاربة السبعة، اللي منعت عيون سوت توصل لهم، ودربو حور عالحرب والفتونة، وكان ساعدتها البقرة حتحور وحتحوراتها السبعة اللي اتكفلو بتربية وتعليم حور، بإختصار اللي زرعه وزير ف حكمه وعدله وحنيته، حصدته است وابنها حور من دعم وحب الناس ف كل مكان، وبقا عندهم استعداد يحاربو معاه عشان يرجع حقه ف مملكة أبوه اللي اتاخذت بالغدر والخيانة من عمه سوت وصحبته!

ف يوم من الأيام حور قال لأمه:

- خلاص يأمه أنا جاهز دلوقتي ولازم أحارب عدوي، عشان أرجع حقوقي!

است شكرت ربنا إن جه اليوم اللي هتترد فيه المظالم، فرحت بابنها  
وبشعبها من جيرانها وإصحابها وحبايبها اللي مستعدين يحاربو مع  
حور، لغاية ما يتحقق العدل وترجع الحقوق!

است مسكت دراع ابنها وقالت له:

- يا حبيبي يا حنة من كبدي، أخذ الحقوق له أصول  
وفنون، دلوقتي اللي عارفين حكايتنا ومتعاطفين معنا هوما  
الي معاك دول، انما بقية الشعب مش عارفين حاجة،  
وحكايتنا بقت قديمة، ولو حاربنا دلوقتي هيقولو علينا  
عصابات وخطافة، لأنهم مش دريانيين باللي حصل زمان،  
بيقا أخذ الحقوق لازم يكون له أصول وفنون!

- طيب نعمل ايه؟

- مش انتو اللي هتعملو، أنا هاخذك ونروح محكمة النطرو  
عشان نقدم لهم دليل حقوقنا، ونشهد الناس الي فاكدة  
المؤامرة الي اتعملت علا أبوك!

- كمان الوزير تحوتي لسه عايش وعارف كل الي حصل،  
نفوت عليه وناخده معنا يشهد باللي شافه واللي يعرفه!

حور قال لأمه:

- كده كويس أوي، ورأيك يأمي لازم يمشي عليا وعلا كل  
اللي معايا، بس لو حصل واتعرض لي سوت أو حد من  
عصابته أعمل ايه؟  
- ساعتها يا بني لازم تدافع عن نفسك، محدش يقدر يغلطك!

وبالفعل حصل اللي حور كان عامل حسابه، بمجرد لما است  
راحت المحكمة وسجلت شكوتها عند الكاتب الحقاني، وحددت  
جلسة عشان يسمعو كلام حور وشهوده، سوت اتجنن وأمر  
عصابته يقتلو حور!

أول شوية من عصابة سوت اتعرضو لحور حاربهم وقضا عليهم،  
عشان كده نزل سوت بنفسه وحارب حور، لغاية أما رئيس  
المحكمة عرف بالمشاكل اللي حصلت، قام أمر الملك سوت يلتزم  
بقانون الماعت ويستنا حكم المحكمة، وفرق بين الخصمين، وحكم إن  
اللي هيعتدي عالتاني قبل النطق بالحكم هينخر قضيته!

سوت اتغاض أوي، بس اتكمد واتحسر والتزم، واستنا أما طلع حكم  
المحكمة، ونهارها كل البلد فرحت:

- خلاص الظلم زال، والحق رجع لاصحابه!

ف النهاية حكمت المحكمة لصالح حور ابن است, رجع لبيته ولعرش  
أبوه وأمه، واستلم ملك مصر وحكم كل المملكة!

من يومها وكل اللي يحكم مصر, لازم يلتزم بتعليمات حور وأمه  
است, واللي يخالف يتقدم لمحكمة الماعت!

الولاد والبنات اللي كانوا ييسمعو الحدودة, استأذنو من صاحبهم  
عشان يرجعو لبيوتهم, أما رادوبي فقربت من أبوها التاجر القوسي  
حضنته وباسته, وقالتله:

- يارب يخليك لنا يا أحسن أب ف الدنيا, كنت عايزة أروح  
أزور عمتي ستيتة ف بلدها بهنوسا, عشان وحشتني, هيه  
واولاد عمتي سمر وسمير, وكمان عشان أقدملها هديتها ف عيد  
العمات والخلالات!

- صحيح دا معاد عيد العمات قرب أوي من معاده خامس  
يوم من أيام النسي, يعني آخر يوم ف السنة, شاطرة يا  
رادوبي إنك فاكرة مواعيد الأعياد والمناسبات وحافضة  
ود قرايبك, وأنا هجهزلك هدية كويسة تديها لعمتك!

## حج



أما رادوبي كبرت وبقا عندها حوالي اتناشر سنة، خلاص بقت عروسة، وتقدر تعتمد علا نفسها، أمها مارية قالت لها:

- خلاص كبرتي يا حبيبي، وتقدري تشيلي مسؤولية البيت، عشان أنا وأبوكي هنسافر نحج عند مقام رأس الحبيب وزير ف أييدوس، شهر وزيادة يا رادوبي، سفر وحج وزيارة، معاكي زنون ييتابع التجارة، ومعاكي ستك حصه جت م البلد مخصوص عشان تقعد معاكي تونسك لغاية ما نرجع، وكل واحدة وواحد معانا ف البيت عارفين شغلهم، انتي بس تتابعهم، وعندك جارتنا وصحبتى خالتك ست الدار، وجوزها حمص وإولادهم، تقدرى تعتمدى عليهم لو حصلت أي حاجة وإحنا مسافرين للحج!

سنفر ومراته حبيته مارية، استعدو لطلوع رحلة الحج!

طريق أبيدوس، معروف ل سنفر، وياما حضر موسم الحج لمقام  
راس وزير المدفون ف أبيدوس، بس كان حضوره لممارسة تجارته،  
يقوم بعرض البضاعة عالجحاج اللي بيشترو لوازمهم طول الأربعتاشر  
يوم بتوع مدة الحج، وكان بيشترو تذكارات عشان ياخدوها معاها  
وهوما راجعين لبلادهم، هدايا لأهاليهم وحبايهم، وبركة من ريحة  
الأراضي المقدسة، يعني كان بيرجع من موسم الحج مجبور  
وربحان، كمان الحج كل سنة كان فرصة للتاجر سنفر عشان  
يتعرف عالناس والتجار من كل بلاد مصر وأجوارها، وكثير كان  
يبتفق عالشرا والبيع بعد الحج ف بلادهم، يعني الحج بالنسبة لسنفر  
كان زي سوق تجاري كبير، ومضيعة للعيلة المصرية الكبيرة!

المرّة دي بقا زيارة أبيدوس كانت مختلفة عن كلّ مرّة، سنفر  
مخدش معاه أي بضاعة يبيعهها، كان هدفه يقوم بالطقوس ويعيش  
جو الحج بس، زاي أي حاج، وكان المرّة دي كانت معاه مراته،  
اللي كان نفسها تحج وتزرع شجرة جنب مقام راس النظر النذير  
وزير، رحمة ونور علا روح أمها!

سنفر كان مجهز قارب جديد، فيه كابينة كبيرة تكفيه هوه  
ومارية، وملا القارب بلوازم الطريق، عيش بتاو خفيف وناشف،  
بريك بالجبنة وبالعجوة وبالتين وبالعسل، بلاصي عسل وبلاصي  
مش بالجبنة القديمة، سبت فيه لحمة متجففة، سبت تين وسبت

بلح وسبت رومان، الأكل كله نواشف عشان تناسب السفر، مع صندوقين هدوم، واحد ليه وواحد لمراته!

ف ركنة من اركان القارب شوية شتل من سجر الشين والجميز وفروع الصفصاف، عشان اللي هيفضل منها ينفع للزراعة يبقا يزرعوه ف أيدوس، وبكده يحققو هدفهم من رحلة الحج: زراعة شجرة جنب راس وزير!

فوق كابينة المركبة راية صغيرة مرفوعة، من قماش الكتان الأبيض، لون مومية وزير البيضاء، وبنفس شكل علامة الأرباب المتقدسة (نطرو)!

بمجرد ما اتحركت المركبة وخرجت من فرعة التربة اللي قدام بيت سنفر، ودخلو ف بحر حابي الكبير، كان فيه قوارب ومراكب تانية رافعين نفس الراية البيضاء، راية سلام وزير ف عالمه، ولون مومية وزير البيضاء، كلهم قربو من بعض بدافع الصلابة ف أهم وأقدس رحلات عالمهم، رحلة الحج ل أيدوس!

الحجاج اتكلمو واتحاورو مع بعض ف الطريق، واتبادلو خبراتهم وحكاياتهم عن السفر والحج والبلاد!

• طقوس الحج بتبدأ أول يوم بعيد الشجرة، ده اليوم اللي يزرعوه فيه الشجر والفروع اللي جايينها معاهم من بلادهم!



شجرة وزير، شجرة كبيرة خضارها دائم، يزرعها الكهنة صباحية أول يوم ف الحج، جنب مقام راس وزير، تحتها يقعد الكتبة عشان يكتبو طلبات الناس علا برديات وشقافات صغيرة، ويسيوها تحت الشجرة!

- مع طلعة شمس ثاني يوم، بيتلف الحجاج حوالين الشجرة، ويشوفو الكهنة وهوما بيوزعو عالناس المحتاجين اللي لهم طلبات من وزير، كل واحد بياخذ حاجته حسب ما يقدر الكهنة، وكان الحجاج بيشاركو بنفسهم ف تزيين الشجرة الكبيرة وف تقديم الحسنات لأصحاب الحاجات!

- تالت يوم، للرّي والتنضيف والتوضيب ورعاية الشجر اللي انزرع دايرة كبيرة حوالين مقام راس وزير، كل واحد زرع زرعة رحمة ونور بإسم الميت اللي يخصه، اللي زارع شجرة ابنه، واللي زارعه شجرة جوزها، واللي زارعين لأبهاتهم وأمهاتهم، وكانّ يلقطو نفسهم شوية من تعب الرحلة وزرع الشجر، وكانو وهوما يزرعو الشجر ده بيرددو حكمة، لخصوها ف جملة:

- أدينا بنزرع النهاردة، عشان نلاقي اللي يزرع لنا بكرة!

- أدينا بنزرع النهاردة، عشان نلاقي اللي يزرع لنا بكرة!

- رابع يوم (ندريت) للندور، كل اللي عليه ندر يوفيه!

• خامس وسات وسابع يوم، ثلاثيام متخصصين لعرض المحاكمة، الحجاج يقومو بعرض مشاهد المسرحية الأوزيرية، اللي ينظمها الكهنة:

اليوم (الخامس) لتشكيل المحكمة، تنظيم الكتبة والشهود والقضاة الإثنين وأربعين!

اليوم (السات) الكهنة بيعلنو بداية مشهد محكمة وزير، عشان يبقا عرض عمومي بيشارك فيه ويشوفه كل الحجاج، اللي بيتقسمو فريقين، ناحية بتدافع عن التتر وزير وابنه حور والناحية الثانية بتدافع عن خصمهم سوت!

اليوم (السابع) مشهد التحطيط (عبط)، عبارة عن المعارك اللي قامت بين الخصمين، حور وسوت، ساعتين قبل متتعامد الشمس ويختفي الضل، بعدها كان ساعتين تحطيط بس مع تبديل الأدوار، يعني اللي كان يحطب بإسم وزير الصبح، بقا هو نفسه اللي يحطب بإسم سوت الضهر:

- كلنا وزير، كلنا سوت!

- كلنا وزير، كلنا سوت!

• تامن يوم مشهد حرت وبدر الأرض، إسمه يوم السعي،  
عبارة عن عرض كبير يشارك فيه اللي يقدر ويشوفه بس  
الحجاج اللي ميقدروش يشتركوا!

المشهد بيتقدم ف أربع صور:

- أول صورة: الصبح بدري، كاهن فلاح سايق محرات بتجره  
بقرتين سود، يبيدر بذرة قح ف ناحية وبذرة شعير ف ناحية  
تانية وبذرة كنان ف ناحية تالته، وراه ماشي حمار بيدفس  
البذرة ف الأرض، الفلاح اللي يبيدر البذرة بنظام بيمثل  
وزير، والحمار اللي بيغرزها بيمثل سوت، يعني كل واحد له  
وظيفة حسب طبيعته وامكانياته!
- ثاني صورة، قبل الضهر، الحجاج بنفسهم بيقيموا يقلدو مشهد  
الحرت والبذر بس بشكل بسيط، يعني يحفرو بإيديهم  
ويجيو حته من الطين، ويشكلوها (مسختيو) شبه مومية  
جسد وزير، ويغرزو أو يدفنو ف الطين حبات القمح  
والشعير والكنان، وبعدين يبللوها بالماء ويسبيوها تنبت!
- ثالث صورة، بعد الضهر، عرض ثاني كبير بيتفرج عليه  
ويشارك فيه بارضو اللي يقدر من الحجاج، واحدة من  
الكهان لابسة هدوم الفلاحين، بتمثل دور است (أزة)،  
وهيه بتنشب وتفتش ف ناحية من الأرض، وبعدها تجري

تنبش وتفتش ف ناحية ثانية وثالثة ورابعة وخامسة وسابعة  
وسابعة، بتنبش وتفتش عن جثة حبيبها وزير، بتدور عليه  
وبتحاول تجمعها من السبع نواحي، يعني الشمال واليمين  
والبحري والقبلي وفوق الجبل وف الجب اللي تحت الأرض  
وكان ف علاي السما، والمجاج اللي بيشتروكو ف عرض  
الصورة دي بيساعدوها ويدلوها، وبالأخص المجاج اللي  
جاين من بلاد فيها مقامات لوزير، عشان كل مقام فيه  
حتة من جسده!

- رابع صورة: قبل غروب شمس نهاية اليوم التامن، عروض  
العهد والأمانة، تقليد لمشهد مهم ف ختام يوم السعي،  
بيشارك ويقوم بيه المجاج، من كل بلد مدفون فيها حطة من  
الجسد الشريف، جسد وزير، واحدة من الكهنة لابسة  
أبيض بتمثل است وهيه بتستقبل وبترحب بوفود المجاج،  
من أهل كل بلد:

- احنا لقينا عندنا ف بلدنا الإيد اليمين من جثة وزير!  
- انتو أهل الأمانة المخلصين، وصيتكو إيد وزير اليمين، دي  
وديعة عنديكو، صونو الأمانة وحافظو عليها!

ويفضل المشهد والحوار يتكرر مع أهل كل بلد مدفون فيها حثة من جسد وزير، وكأنها حثة من جسد الوطن الكبير اللي لازم كلهم يحرسوه ويحافظو عليه!

- تاسع يوم، ييبقا زي مكافأة هدية من الكهنة الستات، اللي يقدمو عشا جماعي، اسمه عشا المزواد، أو الزوادة، وفيه بتظهر تفانين الطبخ والأكل المصري، اللي بينقلها الحجاج وينشروها ف بلادهم، سنة بعد سنة!

- عاشر يوم (حبيت)، اليوم الودي، الحجاج بيردو عالمكافأة الكبيرة اللي قدمها الكهنة، من فنون المطبخ المصري، بتاعت العشا الجماعي (المزواد)، ف يقدمولهم هدايا حبية، بنفوس كلها حب، يقدمو قماش وبخور وحبوب للكهنة إعتراف بدورهم ومجهودهم ف تنظيم الحج!

- اليوم الحداشر، يوم الطواف حوالين مقام وزير، تحقيق لوعده حور بأنه يفضل حارس لمقام أبوه، يحققه الحجاج كل سنة بالنيابة عن حور الإبن الوفي!


- اليوم الإتناسر، يوم الزكر، بمناسبة مهرجان انتصارات الصقر حور (سوكر)، اللي مصر كلها تحتفل بيه ف نفس اليوم اللي يحتفل فيه الحجاج، يحتفلو لأنه فاز بحكم المحكمة، وكان أنصاره فازو ف كل معارك التحطيب، تعبير عن ضرورة

انتصار الخير، وإن ف الآخر الحق يظهر والعدل يتطبق  
عالك:

- مسير الحق يرجع، مسير الحي يتلاقا!
- مسير الحق يرجع، مسير الحي يتلاقا!

- اليوم التلتاشر، يوم للنضافة، إسمه يوم التطيب  
(سطي-حب)، تطهير بماية النهر العظيم، وتطيب وتعطير  
بالزيوت والعمور، والتزيين بالزهور!
- آخر يوم من أيام الحج، اليوم الأربعتاشر نهاية وختام  
الطقوس بواحد من أهم الأعياد الرسمية والشعبية، عشان  
كده يحضره الملك بنفسه أو مندوبه، طقوس رفع عامود  
الجد وزير، رمز قيامة وزير من موته، ونهضته من رقدته،  
عبارة عن عامود خشب، أو شجرة وزير، المحمية بأربع  
ربات، من الأربع جهات اللي ف الأرض، شمال يمين قبلي  
بحري، الملك بيرفع عمود (جد) بإيديه ومعاها الكهنة  
ساندينه، وسط تهليل وفرحة الحجاج اللي بيرددو:
  - وزير آنسنا، خلاص آنسنا!
  - وزير آنسنا، خلاص آنسنا!

## نبية- حوة



رحلة الحج انتهت بأمان وسلام، ورجعوا لبيتهم ف حلوان، بس  
الست إباناً أو الأميرة مارية تعبت أوي، وجت زارتها ف البيت  
كاهنة سيشت الحكيمة، اللي كشت عليها ودهنتها بالمرهم  
ووصفت لها دوا ومشاريب، ووصتها تدفا كويس عشان اللي  
عندها ده سببه السفر والمجهود ف عز وقت البرد، كيهك وطوبة،  
وأما غطوها بفرشة من الكنان الثقيل والصوف، نامت وف المنام  
زارتها النظرة نبية- حوة، ف شكل البومة ربة الحماية، وهيه أما بتزور  
حد ف المنام يبقا خلاص أجله قرب!

النظرة نبية- حوة، وصت مارية ف المنام تفتكر وتراجع الأوراد  
الوزيرية بتاعتها وتردها بصوت مسموع، وتقرأ اعترافاتها بنفسها،  
وتوصل كل أمانة لصاحبها أو صاحبها، لأن أجلها المتحدد  
خلاص كده بقا ف نهايته!

مارية اتفرغت م النوم، وبقت تعيط علا نفسها، افكرت أبوها اللي  
مقدرتش تودعه، وافكرت أختها وبقية أهلها، وبقت خايفة علا

حبيبها سنفر اللي كان مسافر ف تجارته، وبقت قلقانة علا ضناها  
بنتها رادوبي من بعدها، البيت كله صحي أما سمعوها بتنادي  
بصوت عالي علا بنتها:

- هاتولي رادوبي، هاتولي رادوبي، هاتولي رادوبي!

رادوبي جريت لأوضة أمها وهيه بتعيط:

- مالك يا أماتي، سلامتك يا حبيبتى!  
- اسمعي يا رادوبي، أنا تعبانة أوي، وزارتني ف المنام البومة  
نبية حوة، يعني خلاص النهاية قربت، والأجل اتحدد،  
وهنتقل لمملكة وزير، عاوزاكي تخلي بالك من نفسك، ومن  
بيتنا وجنيتنا وتجارتنا، وتتابعي مع أبوكي كل صغيرة وكبيرة  
ف البيت وف التجارة، و.....!

مارية بصت عالصندوق وشاورت لرادوبي عليه:


- شايقة الصندوق اللي هناك ده، فيه الحاجات والمجوهرات  
الي هيه نصيبي من أمي الأميرة، وفيه الجزمة الي متحلية  
بالمجوهرات اتعملت مخصوص يوم جواز أمي، ووصت بها  
ليا، عشان كده خالتك الأميرة نبيتو حطيتها ف صندوقي يوم  
جوازي من أبوكي، وأنا عايزاكي تبقي تلبسيها يوم جوازك،  
عشان دي مش مجرد جزمة حلوة، دي فيها سر وحجاب



حماية عملته كاهنة النظرة نيت بنفسها، انتى طبعن عارفة إن  
اسمي الحقيقي هو مارية مش إباناء، أنا بنت الأمير تيتي،  
وأختي خالتك الأميرة نبيتو، وأبوكي عارف حكايتنا كلها،  
تبقي تتفقي مع أبوكي عشان يعرفك علا عيلتي ف الوقت  
المناسب، يعني خالتك وعماتي وأعمامي وبقية العيلة المالكة  
... و ... ياريت الظروف تسمح وكنت أعرفك عليهم  
بنفسي!

مارية خدت نفس طويل، وعينها متعلقة ببنتها، وبدأ كلامها يبقا  
بطيء ومتقطع، وبعدين سككت خالص، بس نظرتها وكأنها لسه  
بتتكلم، إنما الحقيقة إنها مقدرتش تكمل الكلام، ملاحظها جمدت  
وسلمت روحها لخالقها بأمان وسلام!

## سلكة



البيت الي اتبنا طوبة بالحب وطوبة بالإخلاص، بقا مسكون بالأم والإهمال!

بعد شهر من توديع مارية، رادوبي كانت بتنفذ وصية أمها بحماس وهمة، وتحاول تملأ فراغ غياب الأم، بقت ترتب البيت بنفسها، وتراجع المخازن، وتتابع العمال، إنما فيه حاجة مهمة غايبة، الأم أما بتغيب بيغيب الشعور بالأمان!

أما أبوها سنفر فكان زاي الي انضرب علا راسه، من صدمة فراق حبيبته، بقا دايم شارد ودأخ وسرحان وعينيه حيرانة وقلقانة، مش قادر يركز لا ف بيته ولا حتا ف تجارته، وبقا شغله ف خطر، وقرارته مهزوزة، بيعه كسبانة وبيعتين خسرانين، حتا إنه ف بعض الأحيان كان يشتري ويبيع بالخسارة!

ف يوم سنفر كان ف مينة حلوان بيستلم بضاعة جاية من صوان أبو،  
لقا واحدة ست بتستلم من مركبة كبيرة بضاعة متحملة ف زكايب  
وعفش بيت قديم، معاها بنتين واقفين بعيد عنها، ومش عارفة  
تتصرف مع العمال والمشرفين، قام بشهامة دخل عالعمال اللي  
كلهم عارفينه وخلص من ايديهم بضاعة وعفش الست!

الست قربت من سنفر، شكرته علا شهامته، وعرفته بنفسها إن  
إسمها سلكة، وإنها كانت متجوزة تاجر كبير اسمه رمزي، وأما  
مات جوزها سابلها ديون متتلة عليهم وكان سابلها البنتين دول،  
حتا البيت اللي كانو ساكنين فيه ف صوان أبو إتباع برخص التراب  
عشان يسددو أي حاجة من الديون اللي عليهم، وإنها جت حلوان  
عشان تسأل عن قرايب لها من بعيد يمگن يضيفوها عندهم شوية  
لحد ماتعرف هتعمل إيه ف حياتها وحياة البنتين اللي قربو من سن  
الجواز!

لما القوصي سنفر عرفها بنفسه، وقال ل سلكة عن إسمه ومهنته،  
برقت عينيها بطمع وقالت له:

- مش معقولة! يا ترا أنا ف حلم ولا إيه؟ التاجر القوصي ده  
كل الناس تعرفه، وبيتكلمو عن تجارته الكبيرة وأماتته  
وشهامته اللي ملهاش زاي، عشان كده اللي حضرتك عملته  
هوه هوه اللي بيتقال عنك ف كل مكان، الشكر لبتاح ورع

ووزير انهم بعتوك ليا وللبنتين المساكين اليوتما دول عشان  
تعطف علينا وتحمينا من اللي طمعانين فينا، وأرجوك ياريت  
حضرتك تكمل جمالك وتشوف لنا مطرح بمعرفتك عشان  
نبات فيه، ونبقا مطمئنين إن إصحابه من طرفك، وأنا  
مستعدة أدفع أي حاجة تطلبها!

- العفو يا ستي، أنا كنت أعرف التاجر رمزي واتعاملت  
معه مرة أو مرتين، ولا تدفعي ولا حاجة، إكرام الغريب  
واجب، وكله سلف ودين، اللي بنعمله ف حياتنا يفضل ف  
سيرتنا وسمعتنا لاولادنا واللي بعدنا!

- اتفضلي يا ست انتي والبنتين ضيوف عندي ف بيتي، لغاية  
ما ترتبو أموركو، والبضاعة والعفش بتاعكو هخلي الشياطين  
يخزنوهم عندي ف مخازن بيتي!

- ربنا يخليك ويبارك لك ف صحتك وعافيتك، وتفضل دايمين  
أهل للشهامة والكرم، يا زينة الرجالة من أهل قوص  
وحروان، يا كبير التجار ف كل مكان وزمان، يا سلام  
عالكرم اللي مفيش زيه، والأخلاق العالية!

التاجر القوصي سنفر من انشغاله بالست سلكة وبناتها، نسي  
خالص بضاعته وسابها وراه ف المينة، ولولا إن زنون كان راجع  
معه من السفر، بس ببضاعة تانية، وأما شاف بضاعة خاله سنفر  
لسه مركونة عالرصيف بتاع المينة، قام خدها وخلا العتالين

والشيلين يحملوها ويرصصوها مع البضاعة اللي كانت معاها، لولا كده كانت البضاعة دي اتنهبت أو اتهدلت وبأظت!

الحلوانية ست الدار كانت بتزور رادوبي وبتطمن عليها وأما شافت الست سلكة وبناتها بقت مش مستريحة لها، وف نفس الوقت مش عاوزة تتحشر ف حاجة متخصهاش، وف كل الأحوال صحيح انها لسه متعاملتش معاها ومتعرفهاش، والمفروض اننا منحكش عالناس من مجرد شكلها، حسب قواعد الماعت، ولازم نتعامل معاهم ونكلمهم قبل ما نحكم عليهم، انما بارضو قلبها واحساسها كانو مش مستريحينلها ورافضين وجودها، عشان كده قربت من القوسي سنفر وقالت له:

- اسمع يا سنفر، احنا عشرة عمر اتنا ومراتك المرحومة الست ابانا ألف رحمة ونور عليها، وعليزه اقولك ان مينفعش تدخل علا بنتك واحدة متعرفهاش، وان كان لازم تساعدنا وتضيفها يبقا مش ف بيت المرحومة، وأنا أقدر أشوف لها أوضة بالإيجار عشان تتلم فيها هيه وعيالها، بعيد عن البيت المحترم وإصحابه الكورما الطيبين!

سنفر مكنش مركز مع ست الدار ومسمعش من كلامها ولا كلمة، كان سرحان وعينيه مرغللة وتعبان، وأما لقاه مستنية منه الرد، قام قال لها:

- ربنا يسهل، ربنا يسهل!

سلكة كانت سامعة كلام ست الدار وواقفة ف حطة متدارية فيها، وبجرد مامشيت ست الدار، نطت ووقفت قدام القوسي سنفر:

- ازيك يا سنفرتي، ههههه، معلش أصلي عرفت ان اسمك الحقيقي سنفر، يبقا أسمح لي بعد كل آلي عملته معانا إني أدلعك، وكان اسمح لي أخدمك وأخدم بنتك وبيتك بكل علمي وخبرتي ف الدنيا، عشان أخليه أحسن بيت ف حروان، وأخلي بنتك زينة البنات، بس انتا تشاورلي وتؤمرني وأنا هبقا تحت أمرك وطوع إيديك!

سنفر كان لسة ف حالة السرحان والتوهان، رد علا سلكة من غير أي اهتمام:

- يعني عاوزه تعمل ايه؟

- لألألاً، مش معقولة واحد ف شبابك وجمالك ونباهتك يبقا مفهمش أنا قصدي ايه، ولو إني مقصدش الا كل خير لك ولبنتك داروبي!

- رادوبي رادوبي، اسمها رادوبي يا ست!  
- طبعن طبعن ست البنات كلها ومملكة البيت رادوبي، أنا  
من كتر حيي لها واعتازي بيها اتلخبطت ف اسمها، وبتاح  
ورع ووزير، أنا قلبي إنشرح لها بقيت بحبها أكثر من بناتي  
الإثنين، ريا وريما!

سنفر بقا زهقان من الكلام مع سلكة، وبقا عاوز يخلص  
عشان يروح يشوف المخازن وعمالها اللي كل شوية ييجي حد  
يشتكي منهم:

- طيب، أرجو كي هاتي م الآخر، وقولي عاوزه إيه؟

سلكة طبطبت علا صدرها وقالت له:

- عاوزاك طيب، عاوزاك تفضل أحسن واحد عليا وعلا بناتي،  
ويبقا لرادوبي أختين بدل ما هيه وحدانية كده، عاوزاك  
تبقا أبو بناتي، تتجوزني وأنا هبقا خدامة تحت رجلك،  
خدامة لك وليتك ولبنتك!

سلكة عملت مع سنفر كل حيل الستات الشمال عشان تغريه  
ويوافق يتجوزها، والحقيقة إن حالة سنفر وصحته ونفسيته وباله  
المشغول مكنوش محتاجين منها كل اللي هيه عملته، سنفر كان  
حاسس بالضعف والعجز، مقدرش يقاوم ولا حتا يفكر ف أي

حاجة تخالف رغبة سلكة، وكل اللي عمله انه خدها وراح للكاتب  
العقبالي واتجوزها!

بعد ما خرج سنفر وسلكة من بيت كاتب العقبال وهو ما  
متجوزين، شافوهم شوية بنات، رجل كبير وست كبيرة طالعين  
من كتابة عقبال، دحكو وغنو:

يا نظريا نظرو .. الشمال كترو

ولاد الحلال .. اتعشو وفطرو

يا نظريا نظرو .. الشمال كترو

كتابة العقبال .. بس للنفرو

يا نظريا نظرو .. الشمال كترو



## خبة

سلكة ما صدقت انها اتجوزت سنفر، وغيرت كل حاجة ف البيت، طردت العمال، ومنعت الحلوانية ست الدار وجوزها حمص يدخلو البيت أو يتصلو بسنفر ورادوبي، كان بقت تبيع ف البضاعة اللي ف المخازن بالخسارة، وتاخذ تمها!

حالة القوسي سنفر، بعد فراق حبيبته ومراته مارية، بقت كلها خبة وخسارة!

خبة وخسارة ف التجارة، بقت بضاعته بايرة، عشان يشتري البضاعة اللي الناس مش محتاجينها، ويبيع بضاعته ف غير أوانها، وكان معاملته مع التجار بقت كلها مشاكل بسبب نسيانه لوعوده واتفاقاته معاهم!

خبة وخسارة ف جوازته من سلكة، إتحمل ديونها ومصاريفها الكثيرة هيه وبناتها!

خبة وخسارة ف معارفه وعشرته القديمة اللي معدش بيودهم ولا يشوفهم زاي ما كان الحال ف وجود مراته مارية!

وختمت حياته بالخيبة الكبيرة، أما كان يحاول يشيل زكية سمسم  
بنفسه من غير ما حد يسند معاه، وقع تحت الزكية، وانكتم نفسه  
فطس مات!

حزن كبير وألم خطير مر بالعيلة الطيبة، عيلة الجد عطفى وحفيدة  
رادوبي، إنما كان عندهم إيمان قوي بإن الفرج جاي، وكل ماتكبر  
المصيبة يجي العوض!

## نخبة



بعد موت سنفر، زنون ورادوبي خدو تابوته وسافرو بيه لبلدهم  
قوص، واندفن جنب أخته ستوته، وبعد الأربعين، رادوبي  
صارحت جدها، انها مش مستريحة ف العيشة مع مرات أبوها  
سلكة وبناتها ريا وريما، وحت له الحالة الصعبة اللي كان فيها  
أبوها لما اتجوز من العقربة سلكة!

الجد عطفي، طبطب علا حفيدته، وقال لها:

- المكتوب ممنوش هروب، يا رادوبي انتي لسه ف أول  
المشوار ولازم تاخدي نصيبك ومكتوبك، اتطمني أنا  
عارف ومتأكد إن نصيبك اللي مكتوبك كله هيبقا طيب،  
بس ربنا يصبرك علا ما بلاكي، ترجعي بيت أبوكي تعمريه،  
واوعي تسمححي لحد يزهقك أو يطفشك من بيتك، إصبري  
علا جار السوء، واثأكدني إن المكتوب لك هيبقالك ومش  
عيروح لحد ثاني!

- يا رادوبي يا حبيبة جدك، انتي أصيلة زي المعدن الصافي،  
زي أبوكي وأماتك، والأصيل حساده وعدوينه كُتار،  
حافظي بقا وحرصتي علا أصلك ومعدنك الطيب، وعشان  
أخلصك الحكاية، خليني أفكرك بحدوتة من اللي كان  
المرحومين ولادي، أبوكي سنفر وعمتك ستوتة، ييجوها  
ودايمين يطلبو مني أحكيها لهم وهوما صغيرين:

زمان ف الغابة والأحراش حصل إن الأسود والنور والأفيال  
والنسور صابهم مرض محدش عارف سببه ولا حد عارف دواه  
إيه وفين، الوحوش كانت بتقع وتنهار من نفسها، ومات كتير  
منهم، واللي فضل عايش بقا ضعيف وماشي جمب الحيطه، أما  
الضبوعة والتعالب والخنازير ف لقوها فرصة ينفردو بزعامه الغابة،  
بقو هوما أقوا الحيوانات، وبقو شايفين أنفسهم أهم وأذكا  
الكائنات، قامو عملو مجلس حرب مخصوص ليهم، ميحضروش  
حد غيرهم، وميتقبلش فيه أي إقتراحات ولا تطلع منه أي  
قرارات غير منهم فيهم، وكانت أهم حاجة بيتكلمو فيها إنهم عايزين  
يشوفو أسرع طريقة يخلصو بيها من بقية أعداءهم بإيه؟ وهيسيطرو  
عالعالم كله إزاي؟

التعلب رفع ديله لفوق، وقاللهم، بس فيه حاجة انتو ناسينها، ولاد الصقر مصابهمش المرض خالص، أبوهم مات وسابهم صغيرين، ولو كبرو وهوما بصحتهم هيتعبونا أوي ومحدش مننا هيقدر عليهم!

واحد م الخنازير قال: بس كده؟ بسيطة أوي، إحنا نعين لهم خنزيرة شاطرة من عندنا، تأكلهم وتشربهم وهوما لسه بيصوصو ف عشهم، وبعدين وهيه بتأكلهم تتكلم معاهم وتلاعبهم وتغنيهم عشان تغيرلهم اللي ف دماغهم، وتملا امخاخهم بأي كلام احنا اللي محددينه، كل الكلام اللي يتوهمهم عن أصلهم!

الضبع الكبير قال: دي فكرة هائلة، وبدل ماهوما عارفين إنهم ولاد الصقر الشديد العالي، نخليهم يفتكرو إنهم ولاد أحقر حاجة ف الغابة، خنزير مسلن!

مرة واحدة الدنيا هاصت وباطت، صوت الخنازير طلع وبقا عالي، نخررو وخنخنو وهاجو وماجو:

- خنازير إيه اللي حقيرة يا ضبع يا سافل يا ....

- خلاص خلاص .. إحنا آسفين، كبيرنا الضبع أكيد ميقصدكوش إنتو خالص يا حبايبي، هوه يقصد أصغر نوع ف فصيلة الخنازير، الفيران يعني!

يادوب التعلب خالص كلامه، وطلع الضبع من الورطة الي حط نفسه فيها، إلا ورجع الهدوء وانبسط الخنازير وقالت:

- آه آه، إن كان كده مفيش مشكلة! إحنا نخلي الخنزيرة وهيه بتطبطب عليهم وبتغنيهم، تفهمهم إنهم ولاد الفأر وإنهم بيتكلمو لغة الفيران، وإن يوم القيامة محدش هيدخل الجنة غير الي أصلهم فيران وبيتكلمو زي الفيران!

الجدة حصه كانت سامعة كلام الجد عظمي مع حفيدته رادوبي:

- انتبي للحكم الي ف كلام جدك يا بتي، وخليكي فاكراها عشان محدش حسود ولا عدو يقدر يتوهك عن أصلك، لو صحتي تساعدني يا حبة عيني كنت جيت وبحرت معاكي، انما أنتي معاكي عزوتك، أخوكي وابن خالتك زنون راجل وشهم، ومعاها مراته سمر بنت عمك ستيتة، الي لما أبوكي كان مشغول بجوازته السوده، محضرتيش فرحهم، دمك ولحمك، هخليهم الإتين يبقو معاكي دايمن، ويسكنو جمبك عشان لو احتجتهم ف أي حاجة يكونو سندك لحد ما يحصل المكتوب الي جدك بيتكلم عليه، وخلي بالك يا

رادوبي إن عمر كلام جدك عظمي ما خيب أبدن، كل  
اللي يقوله يحصل!

رجعت رادوبي لبيتها ف حلوان، ورجع معاها زنون و سمر اللي  
سكنو جنبها ف بيت لازق ف سور بيت المرحوم خالهم سنفر!

وف يوم كانت رادوبي لوحدها ف بيتها، وكانت سلكة وبناتها ريا  
وريماء بره البيت، رادوبي قامت تشوف صندوق المجوهرات اللي  
سايباه أمها، واللي كانت مخبياه ف فتحة تحت سريرها، قامت  
مطلعاها وفتحاه عشان تفتكر ذكرياتها مع أمها، وهيه بتقلب ف  
الحاجات اللي ف الصندوق، شافت الجذمة اللي مشغولة بخيطان  
الذهب ومتطعمة بالمجوهرات، وافكرت وصية أمها لها، إنها تحافظ  
عليها، عشان هوه ده اللي هيعرفها بخالتها وأهلها، وكان عشان ستنا  
"إزة" كانت بتزورها في المنام، وبتبشرها إن الجذمة الذهب دي  
هيه اللي هترجعها تاني لقصر أبوها.

رادوبي لبست الجذمة وخرجت من أوضتها رايحة لبركة الماية،  
عشان تستحما، فرصة وهيه لوحدها، وبالفعل قلعت هدومها  
وحطت فوقهم الجذمة اللي بتلعب من خيطان الذهب وتحلية  
المجوهرات، ونزلت تعوم بين ورد السوسن ف ماية البركة، عايمة  
زاي الفراشة، بتعلم وتتعشم تغسل همومها وأحزان فراق أمها وأبوها.

فوق ف السما بتاعت جنية البيت، كانت النسرة نخبة طائرة، شافت حاجة بتلمع جنب الماية، لمعة نور الشمس اللي بيعكسه الذهب والمجوهرات بتوع الجذمة، النسرة نخبة افكرتها صيدة تتاكل، نزلت ف لمح البصر، وخطفت فردة واحدة من فردتين الجذمة وطارت بيها، رادوبي إنزعجت، خافت وطلعت م البركة عريانة، بتصرخ وبتنادي، سمعتها سمر بنت عمتها، مرات زنون، نطت من فوق سور البيت ونزلت تشوف بنت خالها بتصرخ ليه:

- مالك يا رادوبي؟ فيه ايه يا بنت خالي؟

رادوبي حكّت ل سمر كل حاجة، وشاورت عالنسرة نخبة اللي كانت لسه شايفها طائرة فوق فوق ف العاللي!

سمر طمنتها، وقالت لها:

- شوفي يا رادوبي يا بنت خالي، أنا اتعلمت من أماتي ومن خالي ومن جدي عطفي إن النسرة نخبت دي نظرة متقدسة، ومبتعملش حاجة إلا ويكون لها حكمة، وتنفيذ للقضا والمكتوب، وكان هيه عندنا ف بلاد قبلي نخبة رمز للحماية، يعني نخبة دي مبتمشيش الا ف الصح، إدعي بس بإسم نخبة وواجة، رمز حماية قبلي وبحري، وسيبي الباقي علا رب الكون الواحد اللي ملوش ثاني، فداكي كل



مجوهرات وكنوز الدنيا، وعمرك ما تفزعي ولا تخافي ولا  
تشوفي الشر أبدن يا ختي!

## أحموسي



النسرة نخبة بعد ما خطفت فردة الجذمة وطارت بيها شوية، شتمتها لقيتها لا بتتاكل ولا بتتشرب، زهدت فيها وفردت مخالبا عنها، وقعت الفردة عالارض ناحية جنينة كبيرة، وكانت الجنينة دي من جنين قصر الأمير أحموسي ابن الأمير سامو والأميرة نبيتو، نزلت الفردة بالظبط ف حجر الأمير أحموسي، وهو قاعد مع عساكر وموظفين القصر، كان ينظمهم ويراجع أشغالهم!

الأمير أحموسي انزعج، إتحض واستعجب من اللي عملته النسرة نخبة، لأنه شافها بترمي حاجة، وكان فاكر انها بترمي ريش ولا عضم طير افترسته، بص لقا فردة جذمة عجبية ملهاش زاي، الأمير استغرب م اللي حصل، وكل اللي معاه من حراسه وعماله، إستعجبو من الموقف، وإتفقو كلهم ف الرأي إن ضروري يكون ورا الحكاية العجبية دي سبب، ولازم يكون فيه حكمة أو رسالة!

الملكة نبيتو بعد ما شافت فردة الجذمة مع إبنها، حطت كفوف إيديها الإنتين على وشها وطلعت صرخة كبيرة مكتومة، لولا وجود الخدم، كانت عاوزة تطلعها أما شافت جذمة أختها الأميرة مارية، لكن مقدرتش تكتم الدموع اللي نزلت من عينيها، إنهارت وصرخت وقالت لإبنها:

- لازم تجيب لي فردة الجذمة الثانية، إتصرف اعمل أي حاجة، دي جذمة خالتك، أختي الأميرة مارية، بقالي سنين مشوفتهاش وبقيت مش عارفة مكانها، اختفت من ساعة معرفت واثأكدت إن المرحوم الأمير تيتي أبونا فضل مصمم علا إنكار جوازتها، والنسرة نخبة كده بتبعنا لنا رسالة عشان نعرف مكانها ونرجعها لقصر أبوها وملكها، إبعث الحرس يلفو ويدورو، إعمل مكافأة ل اللي يجيها، إبعث الحرس بتوعنا وبتوع أبوك الملك، النسرة خطف واحدة وأنا عاوزة الثانية اللي شبهها بالضبط، لأن هيه دي اللي هتعرفنا خالتك فين؟

الأمير "أحموسي" شاور صحابه وعساكره، وإستأذن أبوه الملك عشان تطلع معاه كتيبة م الجيش تساعد ف مهمته، لتحقيق رغبة أمه الملكة نبيتو.

إتوزعت عساكر الكتيبة ف المنطقة، يسألو ويدورو علا أي حاجة  
توصلهم لصاحبة فردة الجذمة اللي معاهم، وقالو إن اللي  
هيساعدهم له جائزة كبيرة.

اتفرقت العساكر ف كل البلاد اللي جنب مناف، من صقارة  
وبدرشين لحد حلوان، يسألو ويدورو علا فردة شبه الفردة اللي  
رمتها النسرة نخبة!

الحلوانية ست الدار، كانت فارشة بصينية البسوسة بتاعتها علا  
سور ترعة حابي، وسمعت الحكاية، عرفت إن المقصود هيه  
رادوبي وأمها المرحومة إباناء، اللي كانت مستأمنها علا سرها، انما  
خلاص الأميرة مارية بقت ف ذمة وزير، ماتت وأبوها الأمير اللي  
كان سبب هروبها أهو كان مات، يبقا خلاص الأميرة رادوبي  
لازم ترجع لأهل أمها وتعرفهم ويعرفوها، وكان عشان تخلص من  
الست العقربة خرابة البيوت اللي إسمها سلكة، ست الدار ندهت  
للعساكر وقالت لهم:

- ودوني قصر الأمير، أنا عارفة الحكاية كلها، وعارفة فردة  
الجزمة الذهبي بتاعت مين، وهيه دلوقتي فين.

## عيد راس السنة



صباحية أول يوم ف شهر توت، (ابة-رنبت)، قبة السنة!

الأمير أحموسي، زي كل سنة، كان عامل حفلة كبيرة ف قصره  
بمناسبة عيد راس السنة، إتجمعو المعازيم واتملا القصر بالضيوف  
والكهنة والموسيقيين والمطربين!

الأمير أحموسي كان باله مشغول بالحكاية اللي الملكة مكلفاه بيها،  
من إنه لازم يلاقي صاحبة فردة الجذمة، عشان دي اللي هتعرفه  
طريق خالته الأميرة مارية فين!

واحد من اصحاب الأمير جه وقف جنبه وسأله عن اللي شاغل  
باله ف ليلة العيد، الأمير حكا له لأنه كان عارف حكاية الجذمة،  
وساعتها صاحب الأمير قال له:

- طب سموك ما نسأل البنات والستات اللي هيحضرو الحفلة  
يمكن تكون واحدة منهم تعرف حاجة!

الأمير ارتاح لكلام صاحبه ووافقه علا اقتراحه، وقال:

- خلاص بعد كلمة الملك، وطقوس العيد ما تنتهي نبقا  
نسأل الضيوف الموجودين هنا عن فردة الجذمة الذهب،  
الي مفيش زايها ف المملكة، يعني مش ممكن تتلخبط مع  
أي فردة تانية، وبعدين احنا مش عاوزين فردة الجذمة  
بالتحديد، دي مجرد وسيلة عشان نعرف أي حاجة توصلنا  
نخالتي الأميرة مارية!

شوية وبدأت طقوس العيد بصوت جاي من ناحية البربا، بصو  
عليه لقوا الكاهن أبو قفا طويل، الي بينادي عالمناسبات، واقف  
وماسك وزه يطيرها ويقول:

- يا وزه قبلي، قولي ل الي حتقابليه، ييجي يشرفنا، عندنا  
النهاردة عيد راس السنة!

وبعدين الكاهن طير وزه تانية وتالته ورابعة ف باقي الإتجاهات:

- يا وزه بحري، قولي ل الي حتقابليه، ييجي يشرفنا، عندنا  
النهاردة عيد راس السنة!

- يا وزه يمين، قولي ل الي حتقابليه، ييجي يشرفنا، عندنا  
النهاردة عيد راس السنة!

- يا وزه شمال، قولي ل الي حتقابليه، ييجي يشرفنا، عندنا  
النهاردة عيد راس السنة!

سلكة وبناتها ريا وريما كانوا حاضرين ف الحفلة، وكانت سلكة بتتعرف عالضيوف وتتحشر ف كلامهم عشان تلاقي عرسان لبناتها، ومجبتش معاها رادوبي وحتا مجبتلهاش سيرة عن الحفلة وسابتها ف البيت، إنما كانت مشغولة زاي بقية الضيوف بحكاية الجذمة المشغولة بنحيطان الذهب والمجوهرات اللي الأمير بيدور علا صاحبها، ومحدث عارف أي حاجة عن الحكاية دي!

شوية ودخل زنون وسمروست الدار ومعاهم رادوبي، زنون أما عرف من الحلوانية ست الدار انهم بيدورو علا الفردة الثانية من جذمة الأميرة مارية، قال لهم إنه عارف القصر كويس وعارف كمان الأميرة نبيتو خالة رادوبي، من أيام ما سكن مع خاله ف جينة القصر أما اتعرفو هناك عالأميرة مارية لأول مرة، وإن هوه اللي حيقدر يعرفهم ببعض!

الملكة نبيتو كانت واقفة ف الحفلة جنب ابنها الأمير أحموسي اللي شاور للموسيقين يوقفو العزف وقال:

- اسمحولي يا ضيوف ليلة راس السنة أشغلکم بحكاية فردة الجذمة الذهب، اللي بندور علا صاحبها عشان .....!

الحلوانية ست الدار قاطعت الأمير وقالت:

- بعد اذن سموكو الحكاية دي كلها أنا عارفها وعارفة سرها،  
عشان الأميرة صاحبة الجذمة كانت متجوزة سنفر القوصي  
وعايشة معانا ف حلوان لغاية وفاتها، وأديني جبتلكو معايا  
بنتكو، رادوبي بنت الأميرة مارية صاحبة الجذمة اللي  
بتدورو علا فردتها، ومعها الفردة الثانية!

الملكة نبيتو دموعها ساحت لما سمعت خبر وفاة أختها الأميرة  
مارية، وطلبت يجييوها بنتها رادوبي، ولما شافتها لقتها نسخة،  
الخالق الناطق، من أختها مارية، خدتها ف حضنها، وواستها ف وفاة  
أمها، وطلبت من رادوبي تقعد معاها ف القصر.

رادوبي وافقت طلب خالتها بعد ما استأذنت من ولاد عماتها  
زنون وسمر، وكان استأذنت من خالتها ست الدار، اللي أول ما  
شافت العقربة سلكة جاية تتخجل ناحيتهم، طبقت ف زمارة رقبتها  
وزعقت وقالت:

- يا جلالة الملكة، الست العقربة دي هيه اللي خربت بيت  
الأميرة مارية وكانت السبب ف خراب تجارة القوصي سنفر  
لحد ما تعب ومات، وياما ظلمت بنتكو الأميرة رادوبي،  
وقشطت وباعت تعب السنين، وكان طردتني من بيت  
صاحبتي وعشرة عمري!



الملكة نبيتو شاورت للعساكر ياخذو سلكة لحد ما تتأكد من التهم  
اللي قالتها ست الدار، وتتعرض عالمحكمة!

الأميرة رادوبي خالتها خصصت لها جناح ف القصر، نفس الجناح  
اللي كان بتاع الأميرة مارية، ولما عرضو عليها موضوع العقربة  
سلكة، مرضتش تتهمها بحاجة، بس طلبت منهم يمنعوها تدخل  
بيت أبوها القوسي سنفر ثاني!

وف يوم كان الأمير أحموسي راجع القصر من شغله ف الجيش،  
شاف الأميرة رادوبي وهيه بتستعد تسبب القصر عشان ترجع  
لبيت أبوها ف حلوان، ركع على رجليه قدامها وقدم لها نؤارة  
بنفسجي، من ورد السوسن، وقال:

- النسرة نخبة لما حدفت عليا فردة الخدمة، إعتبرتها رسالة م  
السما، فهمتها كويس، وياريت تسمحلي لي أنفذها، أنا أتمنا  
إنك تقبلي تتجوزيني يا رادوبي يا بنت خالتي، دي رغبتني  
وتنفذي لإرادة السما.

رادوبي وشها نور وفرحت بعرض الجواز اللي قدمه ابن خالتها  
الأمير أحموسي، ووافقت عليه، وبصت للسما وإفتكرت كلام  
أما عن وصية ستنا إزة، وعرفت إن صندوق مجوهرات أما  
هوه اللي رجعها لبنت أهلها.

\*\*\*

وتوتا .. توتا، البردية اللي حكت الحدودة بتختم إن الأمير  
أحموسي اتجوز الأميرة رادوبي، وبعد شوية بقو ملك وملكة،  
وعاشو ف تبات ونبات وخلفو صبيان وبنات.

## الفهرس

5	خارجة
	وزير
	11
12	قوص
	ميناء
	18
بان	بان
	24
	بهنوسا
	35
والفار	الأسد
	48
58	حروان
62	مناف
الشبار	ؤنة
	66

72	مارية
79	سوبك
92	ناهية
	سبوع
	101
	أربعين
	109
113	نبيتو
116	بيتك بيتك
120	عقبال
125	صماطاوي
135	هانو
141	رادوبي
147	وزير واست
157	ج
166	ننية حوة

169	سلكة
176	خية
178	نجة
185	أحموسي
السنة	راس
	188

.....